

**FAASOLOGA O MATAUPU
VASEGA MATUTUA FAAPITOA 2020**

**MANATU AOAQ: SAILI MUAMUA LE MALO O LE
ATUA**

**IANUARI & FEPUARI: ‘AUA LE AUNOA LE ALII
MA TATOU:**

IANUARI:

26 O le loto talitonu moni i le Alii
(Aso Sa o Tupulaga) Neemia 2: 1 – 20

FEPUARI:

2 O le agasala o le faufau leaga
Faamasino 8: 29 - 9: 5
9 O le Atua o i ai i le mea lilo
Mataio 6: 1 – 8
16 E matalasi le tau i o le salamō faamaoni
Ioelu 2: 12 – 20
23 O le alu ese o Iesu Ioane 16: 1 – 11

MATI & APERILA: IA FUA MAI LE OLA I LE ALII

MATI:

1 O le fai-fafie ma le utuvai
Iosua 9: 16 – 27
8 O puapuagā o le lē tu’u mavaega
2 Samuelu 21: 1 – 9

15 O Iesu le mapusaga o agaga
Mataio 11: 20 – 30
22 Faafou le ola iā Keriso Roma 12: 1 – 8
29 E ala ona maua, o le fesili fua
Ioane 8: 1 – 11

APERILA:

5 Faatomuaga o le maliu o Iesu
(Aso Sa Laupama) Mareko 11: 1 – 10
12 “ALELUIA” (Aso Sa o le Toetu)
Fa’aaliga 19: 1 – 10
19 ‘Aua le ave le se ma mea mamafa
Faamasino 12: 1 – 7
26 Tupulaga; o’ofu i le loto maulalo
1 Peteru 5: 1 – 11

ME:

**FAALAGOLAGO I LE AGAGA O LE
ATUA.**

3 O le taavale o le Tala Lelei
Galuega 8: 26 – 40
10 O le tāua o tinā i le olaga faa-le- faatuatua
(Aso Sa Tinā) 2 Timoteo 1: 3 – 7
24 O le Alofa na faamaite e le Agaga
Filipi 1: 3 – 14
31 Tupulaga, o outou o le manuia o aiga
Salamo 144: 1 – 15

IUNI: INA ULUFALE MAI IA I LE FIAFIA O LOU ALII:

7	Olioli o le loto	Isaia 49: 8 - 13
14	Ua fa'aali le Atua ia Solomona	1 Tupu 9: 1 - 9
21	Ia mitamita i le Alii	Roma 15: 14 - 21
28	Savavali e tusa ma le Alii	2 Ioane 1- 13

IULAI: O LE MALO O LE ATUA I LE LALOLAGI:

5	Ia viia e tagata uma le Atua moni	Isaia 42: 10 - 13
12	O lo o i ai le Atua i tala atu o mea uma	Esoto 3: 1 - 15
19	Ua lata mai le malo o le Atua	Mataio 3: 1 - 6, 13 - 17
26	O mea lilo o le malo o le Atua	Mataio 5: 3 - 12

AUKUSO: FAIGAMALAGA I TOTONU O FAIGATĀ:

2	I totonu o faigatā	Iopu 2: 13 - 22
9	Ua gagana le poto	Faataoto 2: 1 - 9
	(Aso Sa o Tamā)	
16	O le Tusi i le Ekalesia i Laotikaia	Fa'aaliga 3: 14 - 21
23	O fanau i tatou a le Atua	Roma 8: 9 - 17
30	O feagaiga e lua	Kalatia 4: 21 - 31

SETEMA & OKETOPA: O LE ATUA GALUE

6	E te ai foi au mea e ai ma le afu o ou mata	(Aso Sa - Tala Lelei) Kenese 3: 17 - 19
13	Ia galue	2 Tesalonia 3: 6 - 13
20	E tāua galuega uma	Kenese 29: 15 - 27
27	O le faailoga o le faatuatua o le galue	Iakopo 2: 14 - 20

OKETOPA:

4	Tapena mo le Lotu Tamaiti	
11	Lotu Tamaiti	
18	Malologa Lotu Tamaiti	
25	O areto karite e lima ma i'a iti e lua	Ioane 6: 8 - 14

NOVEMA: O MANUIA MAI LE ALOFA TUNOA

1	O manuia mai le Alofa Tunoa	Esoto 1: 15 - 20
8	Ia faatuatua i le Alofa Tunoa	2 Korinito 12: 1 - 10
15	O le mata'u i le Atua e faaolaina ai	Iosua 6: 22 - 25
22	O galuega o le Alofa Tunoa	Luka 7: 18 - 23
29	O le faasoa alofa	1 Samuelu 30: 20 - 25

TESEMA: TALAI TAUSAGA E FINAGALO MALIE MAI AI LE ATUA

6	E alofa le Atua i e amiotonu	Malaki 3: 13 - 18
13	O le faailoga ua finagalo malie mai le Atua	Luka 2: 8 - 14

**MAFAUFAUGA TAIALA O IANUARI & FEPUARI:
‘AUA LE AUNOA LE ALII MA TATOU**

O lea foi ua amata la tatou savaliga o lenei tausaga fou. Ona o la tatou malaga e umi, ma tatou te lē o mailoa ni fatia o i luma, o le taua lena o lo tatou au faatasi pea ma le Atua, i la tatou savaliga, e mautinoa ai le taunuu manuia, ma a’e malo ai a tatou feau.

**ASO SA: 26 IANUARI 2020
(Aso Sa Tupulaga)**

**MATAUPU: O LE LOTO TALITONU MONI I
LE ALII**

SINI: Ia malamalama le vasega, o le loto talitonu faamaoni i le Alii le Atua, e le faigata ona tautino le mea o mana’o ai.

TUSI FAITAU: Neemia 2: 1 – 20

FESOASOANI MO FAIAOGA:

Manatu e lelei ona amata lenei tausaga, i le tapenaina lelei o o tatou loto, e talitonu faamaoni i le Alii lo tatou Atua, auā o le puna lea o mea sili tatou te fai, a’o tatou folau i lenei tausaga 2020. E le faigofie ona tatou iloa se tagata e talitonu moni i le Alii, i la tatou vaai atu i le tino, ae tatou te matauina mai ona uiga vaaia le mea o i lona loto; auā o le loto talitonu i le Alii, o le tagata ua soifua ma ola i le taitaiga a le Agaga o le Atua. O lona uiga faigofie, o le tagata tatou te iloa i ana mea e fai e fesili i le Atua, ma e le taumateina foi lona taunuuga manuia. O lea tagta, e fiafia lava ia e tautala i le mea sa’o, a’e le palaai foi pe fefe e fa’aali le mea o i lona loto. E lotomau, ma e tinou foi, i so o se mea e ole atu ai i le

Atua. E ia te ia le loto alofa, ma na te tausii foi mamalu o lona Atua.

O le ata atoa lea o matauina mai le taulealea Iutaia o i le tafeaga o nuu ese, o Neemia lona igoa. E ui o lo o i ai i nuu ese, ae lē o mafai ona aveesea lona alofa i lona nuu moni ma ona tagata, ae maise o le lē mafai ona galo i lona talitonuga, lona Atua o fai ma ona malosii.

O lo o iloa i le tala, le faamoemoeina o Neemia i luma o lona matai, le tupu o Aretaseta. Na pau le itu sa popole ai, o lona mata faanoanoa sa i ai. Auā o auauna uma i luma o le tupu, e mataalia ma laufofoga fiafia. O se mata faanoanoa, e ono tuliese, pe fasiotia foi, ona so o se auauna i totonu o le maota, ia tiotio ma mata fiafia. Peitai, po’o a lava uiga vaaia e aliali mai, o le loto talitonu moni i le Atua ma lona fesoasoani, e le’i faigata ai foi ona silafia e le tupu, le moni o le mea o i le loto o Neemia. Le amataga lena o le fetufaaiga, ma na tu’usa’o ai le manao, e ui o ia o le auauna, o le tagata foi o le tafeaga. Na ia ta’ua le pagatia o lona nuu, ae mai Ierusalema le aai pele, e ogatotonu i ai le tapuaiga i le Atua. O nei lavasiga, sa muai valaau lava Neemia i le Atua, mo se faasinoga o lona mana’o.

O le tala ua tatou iloa le tele o faafitauli sa fetaii ma Neemia, auā e o’o lava i lona ola sa taupuleina foi e le fili. Ae na tautino lava e Neemia ia i latou uma sa loto faatasi ma ia i le galuega tele. O le Atua lava le malosii e faamoemoe ma fesili i ai i le galuega atoa, e pei foi ona fa’aali mai le Atua ia te ia, e ala i le agalelei o le tupu i le faamoemoe.

Tupulaga talavou, o tatou e faalupe o le malosii o aiga, nuu ma malo, ae maise le galuega a le Atua. O mea e le tumau le latou matagofie, ma e le lelei mai lea taimi i lea taimi, lo ta tiute lenā. E le gata i le olaga i le tino nei, ao itu foi ua le atoatoa i le faa-le-Agaga. Faapei o Keriso foi, na ia toe faalelei ma fa’aatoatoa i tatou, ua malepelepe ma olopalaina e le agasala e ala i lona toetu mamalu mai le oti ma le tuugamau. Ia tumau faamaoni lou loto i le Atua.

Uiga o Upu ma Fuaitau:

- i) Nisani - o le taimi o le tausaga e feagai ma le masina o Mati Aperila i o tatou nei aso.
- Aretaseta - o le suafa e ave i tupu o Peresia
- f 13: Vaipuna o le tanimo - o le igoa o le vaipuna
: Faitotoa o le otaota - o le faitotoa o le nofoaga e la'u i ai otaota o manu
- f 14: faitotoa o le vaipuna – o le auala e alu i le vai e puna malosi
: vailepa o le tupu - o le vaitaele o le tupu.
- f 15: faitotoa o le vanu - o le ala e tau i le alia.

GALUEGA FAATINO: Taliga Fesili

Tali i lou malamalamaaga lautele i le tala ma lona uiga.

- 1. O le a sou silafia, o ai na faaosoina le tupu o Aretaseta, e faataga Neemia e alu? (Faamatala mai)
Tali: O le Atua; (faamatala po o le a sou iloa)
- 2. Aisea na tete'e ai i latou na i le laueleele, o lo o omai o latou uso e toe atia'e le aai?
Tali: Ua manatu o i latou lava e ona le nuu, e le toe aiaina e i latou ua tafea.
- 3. O ai le itu na malo i lenei finauga?
Tali: Itu a Neemia ma e na latou galulue.

PESE: O mai ia faamalosi (168)

A'OA'OGA:

- 1. Tumau ma faamaoni i le Atua
- 2. O le Atua e mafai ai mea faigata

3. E lelei le loto uso.

.....

ASO SA: 2 FEPUARI 2020

MATAUPU: O LE AGASALA, O LE FAUFAU LEAGA

SINI: Ia malamalama le vasega, so o se mea leaga e mafaufauina, ma faufau i le loto, o se agasala matuiā.

TUSI FAITAU: Faamasino 8: 29 – 9: 5

FESOASOANI MO FAIAOGA:

O le fesoasoani muamua lava, ae le o se faatonuga, 'aia nei muta lau faitau i fuaiupu o faasino atu e le tusi faitau o le mataupu.

O le tala i le mea leaga sa fafau e se tasi o le fanau a Kitiona, o Ierupaala lava lea; na oti uma ai ona uso, na o le uii o Iotama na sao mai le toa fitu sefulu. O le igoa o le tama lea o Apimeleko, o lona tinā e mai le nuu o Sekema, o se tasi o palake a Kitona. O Kitiona, o se tasi o taitai iloga o Isaraelu, na ia lavea'iina le nuu mai le tele o ona fili, ona o ia o se taitai sa faalagolago ma usita'i i le Atua. Ina ua oti Kitiona, na vave ona toe liliu Isaraelu i le olaga faapaupau ma le ifo i tupua, ina ua o ese ma le Atua. Sa latou fau le tupua o Paalaperita e ifo ma tapuai i ai. A leai le Atua i se nuu, po o se malo, po o ni tagata foi; ua mautinoa foi le lē toe i ai o se lelei ma se to'afilemu i ia vaega o tagata.

Ina ua oti Ierupaala, ona tulai mai lea o Apimeleko, ua fia fai ma taitai e sui lona tamā. O lona losilosu i le tofi, e le'i manatu ai e feiloai ma ona uso ma fai lelei se tala; ae ua ia mafaufau i se auala e tino ai lona mana'o ua na o le leaga

lava ua mafaufau i ai, auā ua le ‘au ma le Atua. O le manatu o Apimeleko, faatoa taunuu lona mana’o, pe a fasiotia uma ona uso, o le fanau e toa fitu-sefulu a Kitiona. O lea na alu ai loa i Sekema i tuagane o lona tinā, ma aiga uma o le tamā o lona tinā, ina ia latou auau faatasi ma tagata o le nuu, ina ia fai o ia ma taitai.

Na taunuu lava le mana o leaga o Apimeleko, e ui e le’i oti uma tama, na o le uii o Iotama na sao, ona sa sola ma lafi. O Iotama lea na sola i le mauga o Keresema, ma valaau mai ai i se faataoto, na taunuu lava mulimuli ane. Auā na mavae tausaga e tolu sa fai ai Apimeleko ma taitai o Isaraelu; ona tu’uina atu lea o le loto leaga e le Atua iā Apimeleko ma tagata o Sekema, i le ua toe felamata’i ai lava i latou. O le tala umi lava, ae o le tau faaiuga o ona taimi ma lona oti, ona na so’ona togi ifo e se tasi o fafine mai luga o le olo o Tipesa se ma’a, ma lavea ai Apimeleka ma oti ai. O le losilosu i le fia avea ma tagata aloaia sa nao auala leaga lava sa mafaufau i ai. E ui, sa o’o i ai, a’e ua na o se ata na toe vave mavae. Aua o le loto leaga ma faufau mo mea leaga, o le agasala e matuiā i le Alii.

Tupulaga, o outou o le faamoemoega o aiga, nuu, le atunuu ma le Ekalesia. ‘Aua le ola faufau ona o le mana; a’e ia lelei ma to’afilemu le loto, ma fesili i le Atua mo mea sili. Faapei o Iesu, na ia tu’u lona tulaga mamalu, a’e alu ifo e soifua faatasi ma tagata e ala i le taulaga faaola na ia saunia, ona o lona alofa

O le laueleele o “SEKEMA”:

Ona e umi tele le tala, e taua ai lou faitau pea i le mataupu atoa e Iva(9), e pei ona fautua atu i le amataga. O nisi nei o mea e iloga ai le nuu o ta’ua i luga, e aoga mo le silafia lautele o lea foi eleele o Sekema.

1. Na aloaia ai ona avea Apimeleko ma taitai o Isaraelu (Faamasino 9: 6)

2. O le tasi o eleele sa muai faamautū ai Aperamo i lona taunuu i Kanana (Kenese 12: 6 – 7)
3. Na fasiotia ai e atalii o Iakopo taulelea ma le perenise o Sekema (Kenese 34: 1 (ff))
4. O lo o tanu ai ivi o Iosefa (Iosua 24: 32)
5. Toe faafouina ai le Feagaiga a Isaraelu ma le Atua (Iosua 24: 1 (ff))
6. Na vaeluaina ai le malo o Isaraelu (1 Tupu 12: 1 (ff))

GALUEGA FAATINO: Taliga Fesili

1. O le a se isi tala o i le Tusi Paia, o aliali ai le faafitauli lea; O le ola faufau leaga i le isi, ae toe aafia ai lava?
Tali: O Hamanu ma Moretekai/Apialoma i lona tamā o Tavita.
2. O fea le nuu o le tinā o Apimeleko?
Tali: O Sekema
3. O ai le atalii o Kitiona sa ia faia le faataoto?
Tali: O Iotama
4. O fea le igoa o le nuu na fasiotia ai le fanau a Ierupaala?
Tali: O Ofira
5. O fea o tanu ai Ierupaala?
Tali: O Ofira

PESE: 142 (Le Alii e, ia mafaufau)

A’OA’OGA:

1. E i’u leaga le ola faufau.
2. Tumau i le Atua e manuia ai.
3. E taua le fealofani ma le nonofo faatasi o uso.

ASO SA: 9 FEPUARI 2020

MATAUPU: O LE ATUA O I AI I LE MEA LILO

SINI: Ia malamalama le vasega, ia latou iloa, o le Atua e afio i so o se mea, e leai foi se mea e lilo i lana silafaga paia.

TUSI FAITAU: Mataio 6: 1 – 8

FESOASOANI MO FAIAOGA:

O le mataupu leni o le tusi a Mataio, o lo’o faaulutalaina, “O isi upu o le lauga a Iesu i le mauga.” O le fuaiupu muamua e oo i le fuaiupu e sefulu ma le tolu, e ui ina foliga e eseese mataupu o tautala i ai mai le (fuaiupu 1 – 4; ma le fuaiupu 5 – 8), ae tasi lava le autu o tuliloa ma faamamafa mai mataupu na e lua; O le mea lilo: O le mea lilo, e faasino i se mea e te fai ae ‘aua nei faia i le agaga faalialiavale. O lona uiga, o se mea e te fai, o lo o faamalosia ma fautua mai, ia fai i le mea lilo e leiloa e ni tagata, ae o lo o moni lava i totonu o lou loto e tusa o le silasila mai o le Atua.

E i ai le tāua loloto lava o lea lagona, e mafua ai ona lapatai mai le Tusi Paia i lea tulaga. O lo o faatomua mai le manaoga autū o le mataupu i le fuaiupu 1, o lo o vaoia ai le fa’aaliali o le amiotonu i luma o tagata. O le amiotonu iinei, o lo o faasino lava i se mea lelei e te fai. Fai ma faataitaiga, (f) 2 – 4; O se meaalofa e te foa’i ma avatu mo se isi tagata. Aua nei ilia se pu, e pei ona faia e tagata faafiaamiotonu. O tagata e fia tonu a latou amio, latou te avatu pe foa’i atu meaalofa mo isi tagata, ae o toe tala’i ma ta’u atu i isi mea ua latou fai, ina ia viia ai latou e tagata ua latou ta’u atu i ai. O le viiga lenā mai isi tagata ona o a latou meaalofa na ave i ai; O le tau lava lenā. Ua le ganea la i le silasila a le Atua, ma ua le tauia mai foi mai luga le galuega

lelei sa fai, ona o lea lava ua tauia mai le viiga mai isi tagata. Manatua, o le Atua o i le mea lilo, e o’o lava i o tatou loto, na te silafia manatunatuga uma o o tatou loto. Na te tauia foi le mea lelei o lagona i lou loto ma fai. E faapenā foi le vavao, po o le timaiga e uiga i tatalo. Aua nei pei o tagata faafiaamiotonu; E o i fetaulaiga ala, o le mea e tumu ai tagata, e iloa ai i latou a’o tatalo. O le tatalo fa’aaliali-vale faapena, o lena lava ua i ai lo latou tau, e le mai le Alii o Iesu, a o le viiga mai i tagata o latou iloa atu i latou. Auā o le a faapea ane tagata o latou iloa atu i latou o tatalo; O tagata lelei i latou! O tagata o le Alii! O tagata amiotonu! Ma isi viiga ua ave i ai. E lē o iloa atu i o latou loto, o le ala lea na omai ai i le mea e tumu ai tagata e tatalo ai, e le gata o le fa’aaliali ia iloa mai i latou e tagata, a’o le loto foi ia viia mai i latou e tagata. O le fautuaga a Mataio e pei ona iloa ia Iesu i le tele o taimi e tatalo ai; O le ulu i le potu pupuni le faitotoa, ona tatalo ai lea ma le loto faamaoni. E ui ina e le o iloa mai e tagata, a’o lo’o silafia mai e le Atua, ma na avatu se tau ia te oe.

Ma le fautuaga mulimuli e uiga i le tatalo; “Aua le tautu ia outou upu, e pei o nuu ese.” Auā o le tautū i upu, e le gata o le faaumiumi-vale ai o le tatalo; a’e o le fa’aalialiga foi o le potu i upu, ma le fia fai upu matautia, o le o tatalo faapena. Manatua e silafia uma lava e le Atua mea uma, a’o le’i ofoina atu le tatalo. Tau lava la ina faailoa i le gagana faigofie ma le loto faatuatua moni. Tupulaga o teine ma tama talavou, ia mamao tatou ma ia lagona, pe a avatu se meaalofa, pe tatalo foi. E pei foi o Iesu, e tele na faasee atu o ia i mea tu’ufua e tatalo ai, o lana meaalofa sili foi, o le Taulaga lea na ia faia mo tatou ma le lalolagi uma lava, tatou te ola ai e ala i le faatuatua. O le tatalo pu’upu’u foi, ua tatou taua o le Tatalo a le Alii o le ata lenā o le tatalo e pu’upu’u, a’e anoa!

Uiga o Upu ma Fuaitau:

- 1. sunako (f.2) - O nofoaga po’o igoa o fale sa fai ai tapuaiga i la aso. E liliu mai le upu Peretania o le SYNAGOGUE
- O le tele o aai pe maua le sefulu pe sili atu foi aiga Iutaia o aofia ai, e i ai lo latou sunako. O le fale lea e potopoto i ai i le Aso Sapatu mo tapuaiga; ae fai foi ma faleaoga mo le vaiaso. O le taitai o le sunako e le o se failauga, ae o ia e vaaia ma pulea le fale (sunako). O lana galuega o le sue ma valaaulia se Rapi, (matai faiaoga) e a’oa’o ma lauga atu. O le aganuu e pei foi ona iloa i nei aso iā tatou, e valaaulia se matai faiaoga (faifeau) e asiasi mai i lo tatou nuu, e pei o Iesu, e susu mai e lauga.

GALUEGA FAATINO: (Tusiga tala) Tusi mai lau tala e ala i le tali mai o le fesili o i lalo)

- 1. O le a sou iloa, e uiga i le to’onai, po’o alofa o le faifeau, po’o so o se fa’aaloaloga lava lea e folafola ma faalauiloa faalauaitele mai. O fete’enai ma la tatou mataupu o fai nei? Faamatala lelei mai lava lou iloa. (Mafaufau i le a’oa’oga a Iesu mai le Tusi Paia, mafaufau foi i lau aganuu mamalu, ma nisi so’otaga e te iloa, ona faamatala lelei mai lea o lau tali.

PESE: Pese ma Viiga 368
(Fai mea tonu, o mea lelei)

A’OA’OGA:

- 1. ‘Aua le faalialia-vale, e silafia lava e le Atua mea uma.
- 2. O i ai le Atua i mea uma, e ui ina lē vaaia o Ia.
- 3. Tatalo i le loto faamaoni.

.....

ASO SA: 16 FEPUARI 2020

MATAUPU: E MATALASI LE TAUI O LE SALAMŌ FAAMAONI

SINI: Ia malamalama le vasega, ia latou iloa, o le lavea’iina o le ola mai puapuaga matautia o le ola nei, o le taui matagofie lena o le loto ua salamō faamaoni, ma lafoa’i agasala, ae foi i le Atua i le faatuatua.

TUSI FAITAU: Ioelu 2: 12 – 20

FESOASOANI MO FAIAOGA:

O le pu o ili i le amataga o le mataupu, o le iuleo lava lea o le lapataiga mai le Perofeta mo le nuu o le Atua. O le lapataiga po o le timaiga foi, o le foi nei loa i le Atua e ala i le loto ua salamō, ae lafoa’i le agasala; Auā o le salamō faamaoni, na pau lava lea o le ala e lavea’iina ai Isaraelu, mai le malaia e pei ona vaaia i le ata o sē ua lata mai. O le vaaiga matautia, ona o le vaega-‘au a sē, e ui ina foliga faatauva le iniseti i le vaai, ae o ta’ua mai lona matautia, e leai se mea e totoe i le fogaeleele pe a taunuu. Afai o le matautia lea o le puapuaga ua vaaia e le Perofeta e ono oo ia Isaraelu pe a lē salamō, o le

faailoga lena o le matautia ma le ogaoga o le agasala a le nuu i luma o le Atua.

O le salamō e iloa i le loto. O lo o taua i le f.12-13, na pau lava lea o le lavea’iina, e pei ona finagalo ai le Atua i lona nuu, o le foi i le Atua i loto, manū o maua le avanoa. Anapogi, tagiauē, ma fetagisi o tino ia o le loto ua salamō. O le salamō loloto e iloa le sasae o le ofu o se tasi, peitai, e lē o le ofu o finagalo ai le Atua, a o le loto. Ia nutimomoia loto ona o le matuiā o la latou agasala ua fai, ma toe foi i le Atua; Ona toe liliu lea o lona toasā, auā o le Atua e mutimutivale lona alofa. Auā a liliu le finagalo o le Atua, ma toe aumai le manuia i le nuu, ma lavea’iina i latou, o se tau tele lava lea. Ia faapaiaina tagata, mai lava i toeaiaina e oo i tamaiti fesusui. O ē faatoā faatasia, e oo i Ositaulaga, o ane uma i le va o le faapaologa ma le fata faitaulaga, e aoi ma augani i le Alofa o le Atua, e lavea’i mai latou. O tua o le alofa o le Atua, o le a toe lanu lauava le laueleele, fua fetiitii ma fua tele mai laau, ma fua mai foi le ola i mea lelei. O le a le toe i ai se mativa ma se matelāina, e le gata i mea o le tino nei, a o le ola faale-Agaga foi, se tau lava ina a tele ma matalasi, pe a moni ona salamō ma foi i le Atua.

Tupulaga o tama ma teine talavou, o le ala aupito sili lea ma fiafia ai le Atua ia tatou, o le salamō faamaoni ona o tatou o tagata, e leai se tasi e atoatoa, e tūa ai ona tatou lagona ifo i o tatou loto, o tatou o tagata sese, e fua mai ai i o tatou loto e lagona moni le faamaulalo i luma o le Atua, ma tatou faia ai lona finagalo. O le ala lea tatou te manumalo faatasi ai ma lo tatou Alii Toetu, e ala i le Taulaga faaola ua ia saunia.

GALUEGA FAATINO: Taliga Fesili

Taliga fesili: (Fa’aaoga lau Tusi Paia)

1. O le a le mea ua salamō ai fua le Atua, a’o Isaraelu lea e agasala? (f,13)
Tali: O le uiga o le f.13 – Afai e salamō faamaoni Isaraelu i luma o le Atua; Ona tigā alofa lea o le Atua (Salamo) ma le oo ai le malaia sa folafola i lona nuu.
2. O ai tagata e taga i le va o le faapaologa ma le fata-faitaulaga?
Tali: O Ositaulaga
3. O ai ia e fesili faapea “O ifea lo latou Atua?”, e pei ona tā’ua i le f. 17?
Tali: O tagata o nuu ese.
4. O le elo ma le sauga, o manogi ia o alu a’e (f 20)
(i) O manogi o le a?
(ii) A’e mafua i se a?
Tali: (i) O manogi o tagata oti o nuu ese.
(ii) O tagata o nuu ese, sa tauemu ma faifai-upu i tagata o le nuu o le Atua, ina o le a puapuagatia. Peitai, ua salamō faamaoni Isaraelu, ma ua toe alofaina ai e lo latou Atua. Ona lavea’i lea e le Atua lona nuu, a’e fasia nuu ese, lea ua alu a’e lo latou manogi faaletonu.

PESE: Pe mata e talia le Alii (133)

A’OA’OGA:

1. O le salamō moni, e iloa i le loto.
2. E taua i le Atua le salamō
3. O le ala i le manuia o le salamō.

.....

ASO SA: 23 FEPUARI 2020

MATAUPU: O LE ALU ESE O IESU

SINI: Ia malamalama le vasega i le tāua o le alu ese o Iesu ae tuua na o ona so’o, auā a le alu ese Iesu, e le afio ifo lo latou fesoasoani.

TUSI FAITAU: Ioane 16: 1 – 11

FESOASOANI MO FAIAOGA:

O la tatou mataupu o Ienei Aso Sa, o le vaega muamua lea o le saunoaga faamavae a Iesu i lona au-so’o. O le itu taua foi ia iloa, o lo o iloa i upu o le mavaega, o le alu ese o Iesu o tautala i ai la tatou mataupu, o lona afio a’e lea i le lagi, o lona uiga ua mavae lona toetu mai manumalo. E le’i tuua faapo-evaga a tamaiti i le ala, le alu o Iesu, leai o lea lava ua ia mua’i ta’u atu i lona a’u so’o, a’o lei alu. O le agaga o le lē alu gugu o Iesu Toetu; Muamua; ina nei tausuai ona so’o, pe a alu ese faafuasei e aunoa ma sana upu. Lua; Ina ia nofo sauni ai le au-so’o i taimi o le a alu ese ai lo latou matai, auā e i ai mea e tutupu. Tolu, ia fai ma faamaoniga i le au so’o, o lona alu ese, o le a afio ifo ai lo latou fesoasoani sili, o le Agaga Paia lea.

O le f.1 – 4, o lo o faasino i le taimi, ae le’i liliuina Saulo e avea ma Paulo. Auā o lona sauā i le au-Kerisiano, o le faatinoga moni ā o lana auaunaga i lona talitonuga sa i ai; ae na te le’i iloa lena o le Atua le Tamā atoa ma Iesu. A tutupu la mea ia, a o lea ua uma ona ta’u atu, ina ia le tausuai ai i latou. Sa le tau atua muamua foi, auā o la lava e i ai Iesu, ae leaga o lea o le a alu ese, e lelei ona latou iloa ma nofo sauni ai. Ma le vaega mulimuli e sili ona tāua,

E ui lava ina mautinoa o le faanoanoa o le au so’o pe a afio ese le Alii ma latou, ae silisili lava ona taua ma lelei lona alu ese nai lo lona nofo pea.

Muamua; afai e lē alu ese Iesu Toetu, o le a le afio ifo foi le Agaga Paia, o lo latou fesoasoani sili lea.

Lua; O le mafuta ma le Agaga Paia pe a afio ifo, e ona faamalosia, ma faamausaliina ai lo latou talitonu ma le faatuatua i le Atua. Auā o le a faalagolago i lo latou talitonu moni i le Agaga Paia e le vaaia e mata. Ae a vaai pea ia Iesu i le tino nei, o le a faalagolago ai lava ma faamoemoe mea uma ia Iesu, auā o loo vaai atu i ai ma latou faatasi. O le taua loloto lea o le afio ese o Iesu, auā o le Agaga Paia pe a afio ifo, na te faailoa mai le agasala, le amiotonu, ma le faamasinoga i le lalolagi. O le i ai o Iesu i le lalolagi, ua na o le nofoaga lava e tasi o i ai, a o le afio mai o le Agaga Paia, o le i ai lava lea o le Atua i le lalolagi uma e ala i lona Agaga. Na te faailoa atu i le lalolagi uma, e ala i lona Agaga; na te faailoa atu i le lalolagi lana agasala ma valaau atu ia salamō. Na te faailoa atu foi le tulaga o le amiotonu a le Atua ia i latou uma e talitonu ia Ia, auā e lē toe vaaia le Alii i le tino, a o le Agaga; na te ta’u atu foi le faamasinoga a le Atua ia satani le agasala.

Tupulaga talavou, o lo tatou talia o le Agaga Paia, o le faailoga lava lea o lo latou faatuatua i le Taulaga na faia e Iesu, ma lo tatou talia olona afio ese atu.

Uiga o Upu ma Fuaitau:

- i) tausuai (f.1) - faaletonu, o le le malamalama
- ii) sunako(f 2) - fale tapuai, (faa-Samoa o le upu Peretania o le synagogue)

GALUEGA FAATINO: (Mafaufauga loloto)

- Mafaufau i la oulua mafutaga ma lou tamā. Sa ia a’oa’o ma faatonu oe i mea e tatau, sa ia aoa’i foi oe i mea e tele e lelei ona e fai, ma mea e lē lelei, e lē tatau ona e fai. Sa e faalogo i ana upu alofa, ma lona alofa faatino ia oe. E faatau mea e te manaoga ai, faatau ou lavalava, mea ai, ma le tele o ou manaoga. Sa ia opoopo oe ma milimili, ma musumusu atu i lou taliga. Toaga i le aoga ia e poto, ina ia e le ola falōlō. Alofa i lou tinā, ma ou uso, tuagane poo tuafafine foi. Amio lelei ma fa’aaloalo i tagata. Ae ia sili ona e ava ma mata’u i le Atua. Talofa e, ua maluu tamā, ua lafo atu iā oe lana galuega e te faia.
- Faamatala mai, pe i ai se aogā ia oe o le alu ese atu o lou tamā? (O le mea mautinoa e te faanoanoa, ae o fia iloa, pe i ai se taua o lona alu ese ia oe, i lou tuua na o oe, ma lau vaai i le olaga o fai nei)

PESE: Na tu mai o Iesu (50)

A’OA’OGA:

1. O le Agaga Paia lo tatou fesoasoani sili.
2. Talitonu ma faatuatua ia Iesu.
3. Taofi mea lelei mai lou Matai.

.....

**MAFAUFAUGA TAIALA MATI & APERILA:
IA FUA MAI LE OLA I LE ALII**

O le mo’omo’oga autu lea o le soifuaga o tatou i ai nei; Ia fua mai lo tatou ola, o tatou o tagata o le Alii; Aua o tagata o ola i le Alii, o atagia mai lo latou soifua auauna mea lelei, o fa’aalia ai le loto fiafia ma le faatuatua i le Atua. Aua o le a faalagolago i lo latou talitonu moni i le Agaga paia

ASO SA: 1 MATI 2020

MATAUPU: O LE FAI-FAFIE MA LE UTUVAI

SINI: Ia malamalama le vasega, o galuega o ta’ua i le mataupu, o le tau i o le faa’ole’ole, ae o le faamanatu foi mo tagata o le Atua, ‘aua le ave māmāina a latou faaiuga.

TUSI FAITAU: Iosua 9: 16 – 27

FESOASOANI MO FAIAOGA:

Sa tatou faitau nei se vaega o le tala sa faapogai mai ai la tatou mataupu o lenei Aso Sa. O galuega tatou te masani ai, ma ua tatou iloa uma lava; O le la’u-vai po o le utu vai, ma le fai fafie. E ui ina aliali mai i la tatou faitau, o galuega o se tau i ona o le faa’ole’ole o tagata o Kipeona, a’o i ai foi ma le tele o itu taua, o fai ma faamanatu mo Isaraelu, i lo latou va nonofo ai ma lo latou Atua.

O le ulufale o Iosua ma Isaraelu i Kanana, sa latou muai olopalaina lava le aai o Ieriko, ma soloia i lalo ona pa ma olo malolosi; faasolo ane i le nuu o Ai, Petavene ma Peteli, o aai matautia ma logologoa, ae leai se faigata ia Iosua ma Isaraelu, ona sa fesili ma au ma le Atua i mea uma. O le tala-ave o lea matautia, sa salalau ma logo ai nuu uma o Kanana.

O le salalau foi o lea tala i le manumalo, ua masani Isaraelu i le itu e faasagatau mai, e lua ona vaega. O le agai sa’o mai, e pei o nuu sa afaatasi e faasagatau mai ia Isaraelu; ma le vaega e le agai sa’o mai, ae ese le ala e ui mai ai, e pei o Kipeona ma lo latou ta’u faaoleole. Tatou te manatu foi, o lo tatou usitaia o faatonuga a le Atua, e lua foi vaega e pei o lenei. O i latou e maua loa, usitai ma talia; ma i latou foi e talia, ae taamilomilo ona latou faatino. O le puipuiga lava la e faasaga i ia vaega faalavelave mai, o lo tatou faalagolago lava lea i le Atua, ma fesootai pea ia te Ia i aso uma. Na te aumaia le malosī e onosaia ai i latou e tete’e sa’o mai; ma le atamai po o le poto, e iloa ma tilofia ai togafiti a ē e taaamilomilo mai, e pei o Kipeona.

Fai mai Kipeona ia Iosua ma Isaraelu, o latou e omai mai le mea mamao lava, o le ala lena o le leaga o areto o le latou oso, pala se’evae, leaga fagu pa’u ma lavalava. Fai mai foi, sa latou faalogo i tala o le mata’utia o le Atua o Isaraelu, a’o i ai i le nuu i Aikupito, o le ala lenā o lo latou omai mamao e faalelei ma tagata o le Atua. E le’i mafai e Iosua ma Isaraelu ona iloa le tau-faavalea o Kipeona, ona latou te lei fesili i le Atua. A o lea ua latou osi le feagaiga, e le mafai ona latou toe oese ai. Ae ua uma ona poloai ma faatonu e le Atua ona tagata ma lona nuu, e ’aua nei latou osi feagaiga ma tagata o nuu o Kanana (Esoto 23: 32; Esoto 34: 12; Numera 33: 55; Teuterename 7: 2 Teuterename 20: 17 – 18). Ina ua iloa mulmulī ane, ua olegia e Kipeona Iosua ma Isaraelu, ona tuuina atu lea o Kipeona i lalo o le pule a Iosua. O lo latou tiute tausi ma tauave e oo mai le asō; o le fai o fafie mo le osiga o taulaga i le fata faitaulaga; ma la’u le vai mo tagata o le nuu, ma fa’aaoga foi i le fata mo le osiga o taulaga.

E ui lava la ina ua tauia le tau faaoleole o Kipeona, ae le mafai lava ona toe aveesea ai le sēsē o Iosua ma taitai o le nuu, auā e lē mafai ona toe oese ma le feagaiga ua fai, auā o lo o vaoia mai i le (Levitiko 5: 4; 27: 1, 28). O lenei mea ua tupu, ua faamalosia ai tatou uma, “E ’aua le ave mamaina a tatou tautoga.”

Tupulaga talavou o tama ma teine, e lelei ona fesili pea i le Atua i mea uma, auā o Ia na faasino mai le mea tonu e tatau ona fai, e manuia ai. Auā a oo ina sēsē a tatou faaiuga e le mafai ona toe faafoi mai. Na tuu lava foi le tulaga tupu o Iesu, ae sa fesili lava i le Atua lona Tamā, mo le faasinoga o le feau ma le galuega. Lea na tauluga i lona maliu ma lona Toetu mamalu, o le manumalo lava lea ma ē e faatuatua.

GALUEGA FAATINO: Faatinoga

- i) Fai sina faatinoga pu’upu’u o le tala.
- ii) Saunia pea e lau Susuga ni nai fesili e tuliloa ai ni mea taua o a’oa’oina ai tatou mai le tala.

PESE: E malie lava le tala (247)

A’OA’OGA:

- 1. Saili i le Atua le mea e tatau ona fai.
- 2. E lamatia lava oe i lau lava faaiuga.
- 3. Aua le ave mamaina a tatou tautoga.

.....

ASO SA: 8 MATI 2020

MATAUPU: O PUAPUAGA O LE LĒ TU’UMAVAEGA

SINI: Ia malamalama le vasega, o le taua o tautoga po’o feagaiga tuua i luma o le Atua, e le mafai ona sao ai se tasi na te solia.

TUSI FAITAU: 2 Samuelu 21: 1 – 9

FESOASOANI MO FAIAOGA:

O la tatou mataupu o le vaiaso talu ai, o lo o ta'ua ai le feagaiga sa osia e Iosua ma le nuu o Isaraelu, ma tagata o Kipeona. O le feagaiga sa iloa ai le faatamala o Iosua ma le nuu, ae na aliali ai le pepelo o Kipeona. E ui lava la i ia faaletonu, ae o le feagaiga lava sa fai, ua faamauina o le tautoga, po o le ioega i luma o le Atua, e le toe solia e se isi.

O la tatou tusi faitau o le Aso Sa lenei, o lo o faaulutalaina mai lona vaega muamua e faapea; “Ua faatautauina fanau a Saulo.” O le uiga tonu lava lena o le puapuaga o tautala i ai la tatou mataupu o le asō; O le puapuagā o le faatautauina, po o le fasiotia lea o fanau a Saulo, ona o lona solia o le feagaiga po o le tautoga ua uma ona fai, e pei ona ta'ua i luga. E ui e lē o faamauina aloaia mai i le Tusi Paia, le gaoioiga tete'e a Saulo ia Kipeona; ae o le maliliu ai o le toatele o Kipeona, o lona solia lava lea o le feagaiga ua uma ona faamauina, ua nofo sala ai foi ona o le toto o ia tagata (Iosua 9: 2)

O le tulai mai la o Tavita e avea ma tupu ina ua mavae atu Saulo, ae aliali mai ai se oge tele i tausaga soso'o e tolu i lana nofoaiga. Sa lē mautonu le tupu, o le ala lea o lona fesili atu i le Atua; po o le a tonu le mafuaaga o lea mafatiaga o tagata? Ae o le tali mai a le Atua, ona o le mea sa fai e Saulo i tagata Kipeona. O lona lē tuumavaega lea, po'o lona lē tausia lava lea o le feagaiga ua tuua ma faamamaluina (Iosua 9: 16 – 20). O le tete'e matuia lava lea i le tulafono a le Atua (Numerā 30: 1 – 2)

Sa tapā loa e Tavita se mana'oga o Kipeona; o le a lava lo latou mana'o, e faataunuu lava e Tavita, e fai ma faamaoniga ia Kipeona, e le pepelo le Atua i le tautoga ua uma ona fai. O le mana'o la lea o Kipeona, 'aua nei oti fua se tagata Isaraelu ona o latou; auā foi nei tauia i ni auro po o ni ario; a'e ia aumai se to'a fitu o le fanau a Saulo, lē na le manao e nonofo Kipeona i eleele o Isaraelu, ma sa taumafai e fasiotia i latou. Ona tuuina atu lea o Mefiposeta ma Aremoni, o le fanau a Risepa le afafine o Aia iā Saulo; ma tama e toalima, o le

fanau a Mekala le afafine o Saulo. Ona fasiotia lea e Kipeona o latou ia e toa fitu, ma faatautau i le mauga i luma o le Alii; a ua faasaoina e Tavita Mefiposeta le atalii o Ionatana, ona sa tautō ai i lana uo.

Tama ma teine talavou, ua tatou iloa le matautia o le mea e oo iā tatou, ma o tatou aiga, pe a oo ina tatou tulai mai e fai ma taitai, ae lē faautauta ma le tuu-aulafo i mea ua finagalo ai le Alii. I le ma lenei, o le a'afia ai fua o foaga ae le'i fai misa. Ua moni ai le upu, e ai e matua vine moto, ae magiagia ai nifo o le fanau. E a Saulo le agasala, ae ua aafia ai fua nai fanau. O Iesu lava ia, na Ia tuua lona tulaga tutusa ma le Atua, ae sa faalologo ma usiusita'i i lona Tama; lea na tau i le satauro ma le tuugamau, ae na toe faatuina mai le oti, i lona mamalu e faavavau.

GALUEGA FAATINO:

Taliga Fesili [E mafai ona fa'aaoga lau Tusi Paia e tali mai ai fesili; po o le vaai faamataupu silisili, po o lou silafia foi o le tala sa faamatalaina]

1. O le a se mea taua lava o taumafai Tavita e puipui, e tusa o lau faitau i le f.3?

Tali: O le mamalu ma le faamaoni o le Atua o tauave e Isaraelu lona nuu, e tusa o le feagaiga ua uma ona osi. Auā a le vaai tino Kipeona, ma latou fai se tauia ia Saulo ma lona aiga; ona manatu lea o Kipeona, e le faamaoni le Atua o Isaraelu.

2. O le a sau faamataupu silisiliina o le manao o Kipeona, e pei ona taua i le f. 6?

Tali: A fasiotia lava le toa-fitu e foliga mai ua fasiotia atoa lava le aiga o Saulo; Aua o le numera fitu (7) i le faa-Eperu, o le numera atoa.

3. O le a sou manatu, e i ai se fesootaiga o le “oge” o amata ai le tusi faitau, le fasiotia o fanau e toafitu a Saulo, ma le amataga o le seleselega saito o taua i le f.9?

Tali: (Mafaufauga loloto) – Afai o le oge na mafua ona o le agasala a Saulo ma lona aiga, o lea ua totogi atoa e tusa o le manao o Kipeona, o lona uiga, ua magalo i luma o le Atua. Ua lelei mea uma e oo i le laueleele, o lea ua toe fua mai i ona tau ma seleselega o le manuia.

Fai ane e lau susuga nisi fesili, po o nisi mafaufauga i tamaiti, e saga lautele ai la ta mataupu.

PESE: “Fai mea tonu, o mea lelei” (368)

A’OA’OGA:

- 1. ‘Aua le gaupule i le finagalo o le Atua.
- 2. Tausi feagaiga ma mavaega tuua.
- 3. Faamamalu le finagalo o le Atua.

.....

ASO SA: 15 MATI 2020

MATAUPU: O IESU LE MAPUSAGA O AGAGA

SINI: Ia malamalama le vasega, o le salamō, o le fulitua i le agasala, ae talia Iesu e mapu ai le agaga ma le mafaufau.

TUSI FAITAU: Mataio 11: 20 – 30

FESOASOANI MO FAIAOGA:

O le upu mapusaga o i ai i le autū, e mafai ona tatou faauigaina o le filemu, po o le to’omaga o le loto. O le finagalo moni lava lea o Iesu mo tagata, ia fiafia, to’afilemu ma mapu i le soifuaga lenei o soifua ai. Aua nei lofia i le popole, faanoanoa, ma le atuatuvaile, pei o ni tagata e le o mautonu, le o mautinoa, po o fea tonu le taunuuga e taunuu i ai lo latou ola o fai nei. Ae ia soifua ma ola ma le mautinoa, le taunuuga manuia e maua i le Atua; Ae o Iesu foi le ala e taunuu manuia ai, aua o Iesu e filemu ma to’amalie ai o latou loto.

O le ala tonu lenā o le sa’i o Iesu i nuu o tā’ua, o Kapanauami le aai o faamautū i ai o Ia, ma Koasini ma Petesaita, o nuu lava o le siosiomaga o le vai o Kenesareta, sa femaliua’i ai Iesu, faatino ai ana galuega mamana ma ana faamalologa. Na ona mulimuli ai, faalogo ma vaai o ia nuu, ae latou te lē talitonu ma le talia Iesu. O la le Alii, a oo mai le aso faamasino e le’i suia o le a fetaiiai loa i latou ma faigata, latou te lē maua se mapusaga i loto, ma se malologa i le tino, auā na o Iesu e maua ai mea ia.

Le uiga foi lea o le tatalo faafetai a Iesu, i le Atua lona Tamā, ona o le natia o ia mea i e popoto ma atamamai, ae na fa’aalia na o tama valevale. E lē o le uiga o le finagalo o le Alii, o faapito ni tagata o agai i ai le faaolataga. Leai! Ae o tagata popoto ma atamamai, e faigata ona latou talia Iesu, ona e i ai le lagona mimita ma le fia pule, e tusa o lo latou potu ma le iloa. Ae taliagofie e i latou e mu’a ma iti pei o tamaiti, o latou lagona, auā e mama o latou loto. A lē mafai la e tagata popoto ona salamō, ma pei o tama valevale i o latou lagona, e lē mafai foi ona latou iloa tino Iesu, e faatuatua i ai ma maua ai lo latou mapusaga.

E taua le iloa e tagata uma ma talitonu, o mea uma ua tu’uina e le Atua le Tamā i lona Atalii o Iesu; ma e leiloa e se tagata le Atua, vagana Iesu, ma le tagata ua finagalo Iesu e faailoa i ai. O Iesu e maua ai lo tatou mapusaga i le tino, ma o tatou

agaga. Talia nei Iesu Toetu, ma le Faaolataga ua Ia saunia mo tatou uma tupulaga talavou ma le lalolagi uma, e ala i le salamō ma le faatuatua.

Uiga o Upu ma Fuaitau:

- 1. faasai (f 20) - tuuaia/faasea
- 2. tama valevale (f.25) - tamaiti/tamaiti e mu’a ma māmā mafaufau

GALUEGA FAATINO:

- 1. Mafaufau loloto i le uiga o le mataupu. O le uiga o le mapusaga e maua ia Iesu; O le filemu po o le to’omaga. Ae le o lona uiga loloto o le nofonofu ma taotooto e leai se mea e faia, Leai! Faamatala lelei e lau susuga. O le olaga faa-Iesu e faigata lona faatinoga, a’e le lagona ni faigata, ona e fai ma le lagona fiafia, ma le loto talitonu i lona taunuuga lelei e le masalomia. Le uiga tonu lena o le mapusaga o agaga e maua i le Alii.
- 2. Saunia e lau susuga ni nai fesili e tuliloa ai le mataupu.

PESE: Aue loto ua leaga (222)

A’OA’OGA:

- 1. Talia Iesu i lou loto, e te filemu ai.
- 2. ‘Aua e te faalagolago i lou atamai, e te lē maua ai le Alii.
- 3. E te le iloa le Atua, pe a e leiloa Iesu.

.....

ASO SA: 22 MATI 2020

MATAUPU: FAAFOU LE OLA IA KERISO

SINI: Ia malamalama le vasega, o le olaga agasala ma le lē atoatoa o tatou ola ai, ua na o Keriso lava e toe faafouina ai.

TUSI FAITAU: Roma 12: 1 – 8

FESOASOANI MO FAIAOGA:

Ua silafia uma ma tatou iloa i le natura masani o le ola o tatou i ai nei, e ala ona toe faafou se mea, ona ua tuai. O lona uiga ua le manaia. Ua tuai ua tau leai se taua ma se aoga, e tatau ona toe faafou, ina ia taua pea ma aoga. E foliga faapena le manatu o le Aposetolo iinei, ma lana tusi atu i le au Kerisiano oi Roma, ma e uma e faitau ai. O le aoao o le vaai a le Aposetolo, mai le olaga faamataupu silisili, e agai atu i le olaga faatino, ua ia tuuina atu ai ni taiala, ina ia ola ai, o ni tagata ua faafouina mai le lalolagi agasala. Lea e faapea ai lana aoi i le uluai fuaiupu – “Ia outou tuuina atu o outou tino i le Atua, o le taulaga ola, ma le paia, ma le mālīe, o le mea e tatau ai ona outou faia.”

O le taulaga sa osia i manu e tusa o le tulafono, peitai o le finagalo moni o le Atua, o le taulaga sili o le usiusita’i i lona finagalo, o le mea tau le “loto” lenā. Ofo atu lā tatou o taulaga ola e ala i le soifua usiusita’i, a e lē o manu. ‘Aua tatou te faia le amio a le lalolagi, e le paia, e le mālīe, foi i luma o le Atua, ae ia liliuina i tatou, ua lē o ni tagata o le lalolagi, ae ua faafouina ma avea ma tagata fou ia Keriso, e ala i o tatou loto talitonu ma faatuatua faamaoni ia te Ia. O le ata vaaia la o lena ola ua faafouina ia Keriso, o le lē toe faia o le mea o manatu le tagata e sili iā ia lava, ae ia tusa ma le finagalo o le Atua.

O le a lava la le tofiga, po o le valaauina ua tofia ma valaauina ai oe e le Alii, faatino i le faatinoga a le tagata ua fou le loto, ua pulea e le Agaga le Alii, e fua mai i mea e malie, ma paia e te faia mo se viiga o le Atua. Aua a aunoa i tatou ma Keriso, tatou te le mafaia lava se mea. Na o Iesu e agavaa ai, ma taua ai i tatou i le mea e tatau i le Atua. O le galulue faatasi foi e pei o ni itu tino o se tino e tasi, e aoga toe taua, auā o lo o galulue tagata uma i lalo o le pule ma le faatonuga a Iesu Keriso.

Tupulaga talavou o teine ma tama, e le mafaitaulia feau ma galuega eseese ua valaauina i ai i tatou. O le itu o fia tuliloa ma faamamafa i le mataupu nei. O le faatinoga o lou tiute, o se auaunaga e paia ma malie i luma o le Alii. Faapei foi o le auaunaga a Iesu, e leai se mea na ponā ai i luma o lona Tamā, aua o le auaunaga ua atoatoa, paia ma malie, ua faaolaina ai le lalolagi uma i le faatuatua.

GALUEGA FAATINO:

Saunia e lau susuga i le faiaoga ni fesili, po o so o se galuega e faalautele ai la tatou mataupu o lenei Aso Sa.

PESE: “Le Alii e ia mafaufau” (142)

A’OA’OGA:

1. Faafou lou loto i le Alii.
2. E le paia lou ola ia te oe lava.
3. Ia usiusitai i le Atua.

.....

ASO SA: 29 MATI 2020

MATAUPU: E ALA ONA MAUA, O LE FESILI FUA

SINI: Ia malamalama le vasega i le leaga o le ola taulamalama.

TUSI FAITAU: Ioane 8: 1 – 11

FESOASOANI MO FAIAOGA:

O le tala masani lenei i le fafine sa molia atu e tagata o le nuu ia Iesu, o Faresaio lava ma le au-Tusiupu. Ua latou faapea, e maua atu, ma e faamaonia lava ua mulilua o ia. O lo o malamalama lelei foi i latou sa molia maia le fafine, i le tulafono a Mose, ma lona faatinoina. O le fesili tele lava, “Aisea na latou maua ai ma faamaonia, ma latou lē tauaia ai loa i maa ia oti ai, e pei ona latou iloa ma malamalama lelei i le tulafono? O lo o manino lelei mai i le Tusi Paia, le mafuaaga o lo latou lē faia, o le mea ua latou iloa e sa’o ma tatau; ona o lo latou uiga taulamalama i le Alii. Ua latou aumai ia Iesu po o le a sona finagalo, a o le ala e saili ai se mea e sese ai le Alii, ma latou molia ai, “A’o oe, pe se a se mea e te fetalai mai i ai?” Fai mai, a’o punou pea Iesu ma tusitusi lona lima i le palapala, ai ua lē uma le anau atu pea o Tusiupu ma Faresaio ia te ia, pe se a lana faaiuga?

O lo o manino lelei le tali a Iesu, o ta’u mai i le f (7). Ua lē tali sa’o atu Iesu i le fesili, ae ua ia fai atu ia te i latou, “O so outou e leai sana agasala, ia lua’i togi se maa ia te ia.”. E leai se isi! O lona uiga, o lea lava ua fai atu Iesu, o lo o ia te outou lava le tali. Afai tou te lē agasala, fetagofi loa e tauai; A o lea e leai se isi na ia togi se ma’a, o le faamaoniga lena, e agasala uma lava i latou sa latou molia mai nei le fafine. O latou e le’i iloa e tagata e agasala, a’e ua aveva lo latou fesili fia tofotofa ia Iesu, ma ala ua maua ai ma latou.

A e o le finagalo moni lea o Iesu mo tatou uma lava. ‘Aua tatou te faafia-amiotonu, a o tatou foi o tagata agasala. Ina nei pei tatou o Faresaio ma la latou mea faafefete, o le faafiaamiotonu (Luka 12: 1). Ae afai ua tatou iloa le ua agasala, apoapoai i ai, ma faamafanafana, ma tatalo foi mo ia, aua o lo o tatalo foi i si mo tatou; Aua e lē puaoa le silafaga a le Atua ia i tatou uma lava, taoto pea le faamasinoga ma le faaiuga i le Alii. O la Iesu i le fafine; “alu ia oe, ‘aua e te toe agasala, aua ou te le faasala foi a’u ia oe.” Ua sa’o ai le upu faaulaula e masani ai toeaia; “E ala ona ta’e le ulu, o le oso-vale” “Ua ala ona maua o le fesili fua.”

Tupulaga talavou, ‘aua le sailiili fua masei o isi, ae manatu ifo lava le tagata ia, o tatou uma lava o tagata agasala, na maliu Iesu mo tatou uma.

Uiga o Upu ma Fuitau

- i) segisegi o le taeao (f.1) - o le taeao po lava
- ii) mulilua (f 3) - agasala
- iii) lua’i togi (f 8) - togi muamua

GALUEGA FAATINO:

1. Fai sina faatinoga pu’upu’u o le tala, e malamalama atili ai.
2. Saunia e lau susuga i le faiaoga, ni nai fesili faigofie, e tuliloa ai la tatou mataupu.

PESE: Le masalosalo ia tia’i ai (224)

A’OA’OGA:

1. ‘Aua e te tofotofo i le Alii lou Atua.
2. Ia e iloa e agasala isi tagata e pei foi o oe.
3. Alofa i lou uso, pe afai ua sese.

**ASO SA: 5 APERILA 2020
(ASO SA LAUPAMA)**

MATAUPU: FAATOMUAGA O LE MALIU O IESU

SINI: Ia malamalama le vasega, o le malaga faatupu a Iesu i Ierusalem, o le faatomuaga lea o lona maliu.

TUSI FAITAU: Mareko 11 : 1 – 10

FESOASOANI MO FAIAOGA:

O le tala masani lea i le malaga faatupu a Iesu, o lo o faamauina e isi foi fai-Evagelia, o Mataio, Luka ma Ioane. O lo’o faamanatu foi i le Aso Sa lenei i aoga Aso Sa, lea lava malaga a le Alii. Ae o le matau atu i mea o tutupu, i lenei vaiaso atoa i totonu o Ierusalem, ae maise le malaga lenei a Iesu, e foliga mai o faailoilo ia, po o mea o fai ma faatomuaga o lona maliu. Auā o lo o faatali pea Iutaia mo le Mesia sa valoia, o Iesu lea. O lo latou manatu foi, o le tupu faamiliteli, na te aumaia le manumalo ma le saolotoga i tagata Iutaia. O le ala lea sa amata ai lenei malaga, i le sagisagi ane o tagata i le Alii ma lona Afio atu. E le gata o o latou laei, o la laau, ua la’u ane e fola ai le auala o Afio atu ai le tupu mamalu, a’e sa latou alalaga foi; Osana!!! Ia manuia le Afio mai i le suafa o le Alii. Ia manuia le malō ua oo mai o lo tatou tamā o Tavita; Osana i mea e aupito aluga.”

O la latou alalaga ma le gaoioiga ua faia, o lo o sa’o lava latou i lo latou faaeaea, auā o Iesu lava o le Tupu; Peitai e lē o le ituaiga tupu lea o manatu ai, o se tupu e afio mai i le ala maulalo ma le faatauvaa, e pei ona tietie mai i le tamai asini. O le ala lea na liliu ai lenei tauvalaau, “Osana! Faaola mai,” i le faapea atu, “Ina faasatauro ia ia te Ia.” E le o malamalama tagata, o le toetu mai o Iesu, mai le oti ma le tuugamau, o le

uiga loloto lea o le Taulaga o le Faaolataga mo latou, lea e gasolo i le aai o Ierusalem e faamanatu, e ala i le aiga o le Paseka, e pei ona faamauina i le Esoto 12: 1 (ff).

Tupulaga talavou, o outou le saofaiga taeao, e fai ma taitai o nuu le malo ma le Ekalesia. Ia avea outou ma iuleo o le au faatuatua faamaoni e le liliu ese mai le Alii. Auā o Iesu ma le Taulaga na Ia osia, o lo tatou saolotoga moni lena mai le agasala e ala i le faatuatua.

GALUEGA FAATINO: Taliga fesili.

1. O le tietie atu o Iesu i le tamai asini, o le faailoga lea o se tupu filemu, po o se toa malosi?
Tali: Tupu filemu.
2. O le a le uiga o le upu, “Osana”?
Tali: Faaola mai.
3. Na fola e tagata le ala i la-laau ma o latou ofu, ina nei palapala vae o le asini, po o se isi mafuaaga?
Tali: O le faaeaea lava i le Mesia ua Afio atu.
4. O ai e ona le asini na tietie ai Iesu?
Tali: E le’i ta’ua mai le tala.
5. Na i ai se nofoa na tietie ai Iesu i le asini, pe na tietie fua mai?
Tali: E leai se nofoa, ae sa avea ofu o tagata ma nofoa i le papatua o le asini, sa tietie mai ai le Alii.

PESE: Ia pepese tatou nei.... (24)

A’OA’OGA:

1. E leaga le faalotolotolua.
2. O Iesu le faaola moni.

3. A mana’o mai le Alii, ave loa.

.....

ASO SA: 12 APERILA 2020

MATAUPU: “ALELUIA”

SINI: Ia malamalama le vasega, o le upu Aleluia, o lona uiga, Ia viia le Alii, o le iuleo lea ma le lagona o le au faatuatua i le faaolataga ua faia e le Atua e ala i le Toetu manumalo o Iesu.

TUSI FAITAU: Fa’aaliga 19: 1 – 8

FESOASOANI MO FAIAOGA:

O le Aso Sa lenei o le TOETU manumalo mai o Iesu mai le tuugamau ma le oti, e pei ona faamanatu e le au Kerisiano i le lalolagi. E ui e le o se tala o le Toetu, ae o lo o feso’otai lava le Toetu Mamalu o Iesu, ma le lagona o faapogai mai ai le alaga; ALELUIA! Auā o le Aleluia, o le alalaga lava lea – Ia viia le Alii. O le lagona tumatie lea o lea taeao, mo le au faatuatua uma; O le vivii i le Alii manumalo ma le faaolataga ua taunuu.

O le fa’aaliga lava ia sa vaaia e Ioane, o au e tele a le lagi, o pepese ma alalaga e faamanu ma vivii i le mamalu ma le silisili ese o le Atua.

O le f 1 – 4, o le uluai pese, na iloa le vanimonimo ua faatumulia i au o le lagi, o alalaga ma faaeaea lo latou Atua i le mamalu ma le viiga. O la Ioane; o se faamanatuga silisili lava lea i le lagi; auā o le au paia atoa, o toeaiina e luasefulu ma le fa, o meaola e fa, ma isi au uma o le lagi. Ua ta’alili le leo o le viiga o faapea mai; “Aleluia, Ia viia le Alii.” O le viiga, auā ua paū ma faaleagaina atoatoa le fafine talitane; O

faasino i le malo o Papelonia tele, o ana tu ma aga faapaupau sa leaga uma ai tagata o le Atua.

O le pese e lua, f 5 – 8, fai mai o le pese o le faaipoipoga a le Tamai Mamoe. O le Tamai Mamoe, o faasino lava ia Iesu le Tupu, ma le faatoā nofo tane, o faasino i auauna, o ē matatau ma faatuatua i le Alii. O tagata taitoatasi uma o le a tutu i lua o le faamasinoga, e suesueina ai le tagata e tusa o mea sa faia i le tino nei. O le alalaga foi ua taalili tele lava i lo latou faapea atu, “Aua ua fai ma tupu le Alii le Atua e ona le malosi uma lava.” O le maea ai o le faamasinoga, ona faaofuina lea o tagata o le Atua i le ie-lino, e mamā ma pa’epa’e, auā o le toto o le tamai mamoe ua fufulueseina ai a latou agasala. O le a fai meaalofo atu foi i latou i le Tamai Mamoe, i le mea moni ma le mama. O le aiga o le faaipoipoga, o tagata faatuatua uma le valaaulia a o i latou lava tuufaatasi, le faatoanofotane. Aleluia. Ia viia le Alii, le Atua ua toetu manumalo.

Tupulaga talavou, ia fai i tatou ma faatoa nofotane i le faatuatua faamaoni, auā o le mafutaga tumau lea ma Iesu le Tamai Mamoe, o Ia le Alii o le ola.

GALUEGA FAATINO:

1. Saunia e lau susuga ni fesili e fua i lau faamatalaga o le mataupu, e tuliloa ai le mataupu o le Toetu.
2. Faamalamalama i tamaiti le uiga o fuaitau o lo o ta’u atu i lalo.
 - (i) fafine talitane e sili (f 2) – O faasino i le malo o Papelonia sa tele ina fa’aaoga e le Atua e fai ma sasa e a’oaiina ai lona nuu i le Feagaiga Tuai. Peitai, o Papelonia lava foi le talitane sili, na faaleaga tagata o le Atua ma le lalolagi, e ala i lona olaga ifo-i-tupua ma le faapaupau.

- (ii) toeaiina e luasefulu ma le fa (f.4) – E 12 ituaiga o Isaraelu i le Feagaiga Tuai. E 12 foi so’o o Iesu i le Feagaiga Fou. O le aofaiga e 24, o suia tagata faatuatua uma i le Alii le Atua, i luma atu ma tua mai, o le Toetu mamalu o Iesu. O i latou o suitulaga ia Iutaia ma nuu ese tagata uma ua avea ma aiga o le Alii, o pepese ma vivii i lona suafa.
- (iii) meaola e fa (f.4) – O faamatalaina uiga e fa o le Atua, e pei ona taua i le 4: 6b (ff) – Mamalu ma malosi (liona), faatuatuaina (povi). Iloa ma le malamalama (tagata) ma le, aoao o lana pule (aeto). E le o ni manu moi e pei o le kerupi, o le faatonu maualuga o agelu a le Atua; ao manu ia e fa, ua na o ni faatusa (symbolic names).

PESE: “Le Alii e, le viia” (87) [fati o le pese 235]

A’OA’OGA:

1. Ia tatou faapea atu lava; “Ia viia le Alii”
2. O Iesu Toetu, o le Tamai Mamoe.
3. Ia avea ma tagata moni o le Alii.

.....

ASO SA: 19 APERILA 2020

MATAUPU: ‘AUA LE AVEA LE SE MA MEA MAMAF

SINI: Ia malamalama le vasega, o le auala faigofie e foia ai ni faaletonu, o le ‘aua le faamamafaina i le mafaufau, ae faagalo.

TUSI FAITAU: Faamasino 12: 1 – 7

FESOASOANI MO FAIAOGA:

O la tatou mataupu o lenei Aso Sa, ua faaulutalaina i se tasi o fuaitau faamua-gagana a le atunuu, e pei ona ta'ua i luga. O le uiga o lea fuaitau; O le a lava se faaletonu e tulai mai, o le auala faigofie e galo ai, o le 'auala le faamamafaina i le mafaufau, aua e le galo ai lava, ma tupu ai pea le ita. Ona o tagata uma lava foi, o le mea mautinoa, e leai se isi e atoatoa, e sese uma lava tagata; Ona manatu lea, o le auala sili lea mo tagata uma, "O le 'auala le avea le sese ma mea mamafa."

O lea faatoa uma le taua tele, sa faatoilalo ai Amoni e Iefata ma Isaraelu; E ui la o le iuga o le manumalo, ae o le manumalo po o le fiafia, ua omai faatasi ma le feitaga'i ma le le fealofani faatasi. Auā o lea ua omai Efaraima, o le uso lava, ua faaoo mai lo latou le fiafia ia Iefata, ona o le lē valaauliaina o latou i le fasiga o Amoni. O le taofi o Efaraima, e sesē le mea lea ua fai e Iefata, e ui o lo o aliali ai lo latou fuā ma le loto eleelea. Fai mai Efaraima, latou te o atu nei lava e susunu le fale o Iefata, ma mu ai ma ia.

O lo o tautino atu e Iefata, sa ia valaauina i latou, ae latou te le'i tali mai, latou te le'i fia fesoasoani mai ia ia. O lea na ia tuu ai lona ola i ona lava lima, i lalo o le fesoasoani mai o le Atua, ma alu atu ai loa e tau le taua ma Amoni. Peitai, e ui lava ina tautino atu e Iefata, ua lē mafai lava Efaraima i lo latou ita. Ua avea lava sia mea itiiti ma le faatauva'a ma mea mamafa. Sa tatou faitau nei le tala, na tau lava Efaraima ma Iefata ma lona nuu o Kiliata. Ae o le upu moni lava, ua fai e Efaraima le mea leaga, e pei foi ona sa latou fai ia Kitiona (8: 1 – 3). Fai mai na faatali lelei e Iefata ma tagata o Kiliata, so o se Efaraima e ui mai i vanu o tuaoi o Efaraima e ala i le vaitafe, e maua uma ai lava ma fasiotia. A fesili atu e ta'u le upu "seepoleta" a'e ta'u ane o "sepoleta", ona iloa lea o le Efaraima, ma fasiotia loa. O le tala sa tatou faitau nei, e 42,000 tagata Efaraima na fasiotia i lea vevesi. Ae pogai mai, i le faamamafa o si mea faatauvaava lava.

Tupulaga o tama ma teine talavou, o le isi lea mafuaaga o le le faigofie ona fealofani faatasi tupulaga ma tagata o nei aso,, ona o le leai o se loto faamagalo. Ua faamamafa lava le mea faatauvaava o i le mafaufau, e ui e le o se mea sa'o. O le ola le fia toilalo, o le tasi lea lagona e tutusa ma le faamauluga, o le lafotuina ma le toilalo popo lona iuga, e pei o Efaraima.

O Iesu lava ia, e ui e leai sona sese, ae na ia talia tuuaiga, ma na faamagalo atu foi ia i latou o tu'uaia o Ia. Lea na tualuga i le satauro, tuugamau, ae na toetu mai i lona manumalo, faatasi ma ē faatuatua i lona suafa.

Uiga o Upu ma Fuaitau:

- i) seepoleta }
 sepoleta } (f 6) o le upu seepoleta o lo o taua mai, o le upu mo le vaitafe. (E le mafai e tagata o Efaraima ona sa'o lo latou faaleoina, ona latou te le iloa)

GALUEGA FAATINO:

1. Mafaufauga loloto Faamatala mai se mea na tupu, po o se misa, po o se feeseeseaiga, sa e vaai i ai; e foliga tutusa ma le tala sa fai nei.
2. Saunia e lau susuga i le faiaoga ni nai fesili e tuliloa ai la tatou mataupu, e fua i le taimi.

PESE: E lou Alii, le Faaola e," (160)

A'OA'OGA:

1. E leaga le loto ita.
2. E lelei le loto maualalo ma faamagalo.
3. O mea lelei e mai le Atua.

ASO SA: 26 APERILA 2020

MATAUPU: TUPULAGA: OOFU I LE LOTO MAULALO

SINI: Ia malamalama le vasega, o le loto maulalo, o le lagona na te taofiofi le tagata mai le loto fefete ma le mimita, ae faigofie ona lagona ai le pai mai o le Atua.

TUSI FAITAU: 1 Peteru 5: 1 – 11

FESOASOANI MO FAIAOGA:

O le mataupu lenei e lima (5), o le uluai tusi a le Aposetolo o Peteru, o lo o tusi atu ai, e le gata o toeaia, a o le lautele foi o tagata. O le atoaga o le Mataupu lenei, o le faamaopoopoina ma le leoleoina lea o le fanau a le Atua, mai le totonugalemu o sauaga. O lo o amata le upu faa-taitai a Peteru i toeaia e pei o ia, e le o ia o se pule, ao ia o le uso faatoeaina i le galuega. O e ua tofusua i le alofa ma manuia o le Alii o Iesu, le Leoleo Mamoe sili, e tatau foi ona fa'aa'oa'o mo le lautele, e le o le fosi, ae o le loto maulalo. O le lapataiga faatoeaina, ona o le tulaga po o le tofi toeaia, ua tele ina faaosoosoina, ia amanaia ma aloaia mai e tagata; a latou mea o fai. Ae o fautuaina mai tagata uma e le tusitala; ia tatou manatua, o le amanaia faale-Atua, e faitau e sili atu nai lo le viiga a le tagata. E mafai e le Atua, ma o lo o finagalo foi o Ia e faamanuia mai ia tatou e tusa o lona lava taimi. O le ususitai ma le loto faamaulalo i le Atua, na te faaeaina ai le tagata, po o le taimi nei, po o lona toe afio mai, oi ia te ia le pule i le taimi.

Ave i le Atua o tatou mafatiaga uma, ina ua tatou iloa o manatu mai le Atua, ma tausi mai i tatou. Ae o lou tauamoina o mea mamafa i lou loto, ma mea faatalatala mai o

le ola i aso uma, o le faailoga e te le o faatuatua i le Atua; o lona uiga foi e le o faamaulalo lou loto. E i ai taimi tatou te manatu ai o lo tatou tigaina ona o a tatou agasala, e leai se feau i ai a le Atua. Peitai, a tatou liliu ma tuuina atu ma le faamaoni i le Atua, e ala i le salamō, e moni lava ona tauave e le Atua lena mamafa.

Ona faaiu lea o le lapataiga i le loto maulalo mai le Aposetolo, i lona toe faapea mai, Ia faautauta ma mataala! Leaga o le tiapolo (agasala) e pei o le leona lona matautia. O le leona na te osofaia le manu vaivai, laitiiti, ma ua toatasi, latou te vaavaai i manu e aafia gofie faapena. E faapenā le agasala po o le tiapolo, e lamalama i tagata toafilemu, ma loto maulalo, ina ia latou maua ma faaleaga.

Tupulaga o tama ma teine talavou, ia outou faautauta ma mataala, o le tele vave o le atamai i nei aso, ua o mai faatasi ma le matautia o mea sēsē, ua lamatia ai le ola. O le lē fai foi o le loto maulalo ma ofu, e ufitia ai lou tagata i aso uma, o le lamatia gofie foi lena o oe e le fili. O Iesu ma le taulaga faaola na Ia faia mo le lalolagi, e aunoa ma sona sēsē, o le loto lava ina maulalo ma usita'i i lona Tamā.

GALUEGA FAATINO:

Taliga Fesili

1. O Peteru le e tusi le tusi lenei, o le so'o o Iesu pe leai?
Tali: O le so'o o Iesu.
2. E faapefea ona faamaonia lau tali, pe afai ioe, po o le leai foi? Aumai se mau mai le Tusi Paia e faamaonia.
Tali: O lo o tautino lava e Peteru, o ia o le molimau i tigā, o lona uiga na vaai i le faasatauroina ma le maliu o Iesu.

3. O a ni mea e iloa ai, le toeaina o faamoemoe i ai le tausiga o le lafu mamoe? Tusi mai ni mea se lua pe tolu foi o iloa e tusa o le tusi faitau.

- Tali: (i) Leoleo le lafu ma le loto, ‘aua ma le mana’o i oloa.
(ii) Avea ma fa’aa’oa’o, e lē o le pule sauā
(iii) Ia loto maulalo i le galuega faa-leoleo mamoe

4. O ai o faatusa i ai le matautia o le leona, o fai mai ai Peteru, o le a?

Tali: O satani, po o le agasala.

5. O le lapataiga ona o le matautia o le leona, o fai mai ai Peteru o le a?

Tali: Faautauta ma mataala.

PESE: “Ieova e, ia malulu mai” (143)

A’OA’OGA:

1. Ia loto maulalo.
2. E fia silasila le Atua i lou loto.
3. O Iesu le agamalu ma finagalo maulalo.

.....

MAFAUFAUGA TAIALA O ME:

FAALAGOLAGO I LE AGAGA O LE ATUA:

O la Iesu i lona au so’o, ina o le a afio i le lagi, “Aua nei o outou tuua Ierusalema, seia afio ifo le Agaga Paia, o lo outou fesoasoani sili, ma lo outou malosi i le galuega.” O lena foi mo tatou uma. Fesili ma faalagolago pea i le musumusū mai o le Agaga o le Atua, o lo tatou mafai lena ma le malosi, tatou te faatino ai so o se mea i le lelei e tusa o lona finagalo.

ASO SA: 3 ME 2020

MATAUPU: O LE TAAVALE O LE TALA LELEI

SINI: Ia a’oa’o tamaiti ia latou iloa e tusa o la tatou Tusi Faitau, o le taavale a le Eunuka, sa aoga tele mo lona faatalaleleiina.

TUSI FAITAU: Galuega 8: 26 – 40

FESOASOANI MO FAIAOGA:

O aso anamua, o aso o le mativa ma le lē tagolima o nai o tatou tagata; sa leai ni taavale. Sa tele lava ina savavali e leai ni taavale. O aso nei, ua tele taavale; o le tele foi o mea e fai o le galuega o le Tala Lelei, ua vave ma faigofie ona o taavale. Po o le a lava le mamao, ma le vave o le taimi i nei aso, ua faigofie ma vave ona ua felaua’i tagata lotu, ma faatino le tele o feau o le Tala Lelei i taavale.

O le tala foi sa tatou faitau nei, o lo o manino lelei mai ai le taua o le taavale sa fa’aaogaina i nisi tiute faale-Tala Lelei. O le taimi o le sauaina o le Ekalesia, e ta’ape’ape lava la faatasi le au Kerisiano, ma le tala’iina o le suafa o Iesu. O Filipino la o ta’ua, ua sola i Samaria mai Ierusalema, ona o sauaga e pei foi ona fasiotia ai Setefano, sa faatonu e le agelu a le Alii e alu, i le ala mai Ierusalema i Kasa i Samaria. Ao iina sa fetau ai ma le Eunuka, o le auauna e vaaia tupe a le tupu tamaitai o Aitiupe. O le Eunuka ua foi mai i Ierusalema. Sa faatonu e le agelu e faalatalata i le taavale a le Eunuka ma lā o faatasi. O iina ua amata ai le talanoaga e ala i le fesili a Filipino i le Eunuka, po o malamalama i le Tusi o ia faitauina? Fai mai le Eunuka, e faapefea ona ou iloa e aunoa ma se tasi na te faamalamalama maia? Oso maia i le taavale, ta te o faatasi ma faamatala mai. O le vaega sa faitauina o le Isaia

53: 7 – 8. Sa fesili le Eunuka na te fia iloa ia upu o fai mai ai le Perofeta; “po o faasino i se isi, po’o ia lava?” Ona faamalamalama lea i ai e Filipino i le Eunuka, e faasino ia Iesu ma ona puapuaga. A o Iesu lea, o le Mesia valoia, e fai ma faaola o le lalolagi, i latou uma e talitonu ma faatuatua ia te Ia, ma faamaufaailogaina i le papatisoga i lona suafa. Ua oo atu le taavale i le mea o i ai le vai, ona tautino lea e le Eunuka, o Iesu Keriso o le Alo o le Atua, ua Ia talitonu i ai; ma ua loto foi ina ia papatisoina o ia. Ona faapenā lea ona fai. Fai mai le tala, na uma loa le papatisoga, ona segia lea o Filipino e le Agaga, ua lē toe iloa o ia e le Eunuka, ona alu ai lea o le taavale a le Eunuka, ua fa’auau atu le malaga i le ala na sau ai, ma le olioli tele.

Tupulaga talavou, e mafai foi ona avea tatou ma ala vave e momolia le Tala Lelei o le faaolataga a Iesu, i so o se mea tatou te femalagaai i ai. O le Tala Lelei o le Faaolataga sa saunia e Iesu mo tatou ma le lalolagi uma. Tatou te o atu ia e pei ona sa ia fetalai i lona au so’o. Ō atu ia outou ma talai atu ma papatiso atu i le lalolagi uma i le suafa o Iesu le Alii Faaola.

Uiga o Upu ma Fuaitau:

- i) itu i toga (f 26) - sauté
- ii) Eunuka (f 27) - leoleo i tofaga o le tupu
- iii) segia (f 39) - aveesea faalilolilo e le vaaia e mata/mou

GALUEGA FAATINO:

- 1. Fai se faatinoga o le tala.
- 2. Saunia e lau susuga ni fesili e tuliloa ai le mataupu.

- PESE:**
- i) “Talai le tala moni” (185)
 - ii) “O le taavale o le Tala Lelei sau ta o ai ai nei” (pese Aoga Aso Sa)

A’OA’OGA:

- 1. Avea tatou ma avefeau o le Tala Lelei.
- 2. O Iesu o le tamai mamoe, na te aveese agasala a le lalolagi.
- 3. Fa’aaoga lau taavale, e ave ai tagata i le lotu, ma asi ai i e o mama’i.

.....

ASO SA: 10 ME 2020 (ASO SA O TINĀ)

MATAUPU: O LE TĀUA O TINĀ I LE OLAGA FAA-LE-FAATUATUA

SINI: Ia malamalama le vasega, o tinā, o isi ia tagata aupito sili ona tele ma taua lo latou sao i le olaga faale-faatuatua o tatou i ai nei.

TUSI FAITAU: 2 Timoteo 1: 1 – 7

FESOASOANI MO FAIAOGA:

O le tusi lenei a Paulo i lona atalii faale-Agaga e pei ona masani ai la tatou ta’u, a o Timoteo lea; o le alii faifeau o le Ekalesia i Efeso. O uluai fuaiupu e fitu o le tusi lenei. O alofaaga ma faamanuia a le Aposetolo ia Timoteo, o lo o agai i ai fuaiupu muamua e lua. O isi fuaiupu e lima o mulimuli ane, o lana faafetai lea ia Timoteo, ma lana faamalosi, ina ia tumau ma faamalos i le galuega, e pei ona tuuina mai e le Atua le Agaga, ina ia le mata’u ai, a ia faamalos ai, alofa ai, ma pulea ai loto. O le faafetai lea a le Aposetolo o ave i le Atua ona o Timoteo ma lona faamalos i le galuega, ae lē o māmā ai foi i le Aposetolo, le galuega tāua a tu’aā o Timoteo. O lona tinā o Eunike, ma le tinā o lona tinā o Loi, O tinā sa

la fesoasoani tele i le ola faa-le-faatuatua o Timoteo le atalii, lea ua fa'aaogaina e le Atua, i lalo o le taitaiga a Paulo le Aposetolo, lē ua avea ma o latou taitai.

O le Aso Sa lenei o tinā, ma e lei so'ona faia fua lenei Aso Sa e faapitoa mo tinā. Ua atofa e fai ma faamanatuga o le sao tāua o tinā, e le gata i totonu o aiga, nuu, malo ma le sosaiete o tagata soifua, ae ua sili foi ona fai ma aso e faatāuaina ai lo latou sao i le Tala Lelei, po o le faaolataga a Iesu i le lalolagi. O le tusi sa faitau nei, e lei tāua fua suafa o Loi ma Eunike; o ni tinā sa matua iloga lo la tulai i le faafaileleina o le ola o Timoteo, i le tino nei. Ae o silafia lelei e le Aposetolo, o le itu foi faa-le-Agaga, e lei alo tamala i ai Eunike lona tinā, ma Loi le tinā o lona tinā. O le ala lena o le mana'o i ai o Paulo iā Timoteo, la te o ma ia i le galuega talai. Auā sa ia iloa, o le tinā o Timoteo, o le Iutaia, ae ua nofo i le tamaloa Eleni. O se fafine faatuatua i le Atua. Afai sa faigofie ona iloa e Paulo le lelei o le olaga o Timoteo, ma le talafeagai mo le galuega tala'i, e le'i lelei fua e aunoa ma se galuega tele ma le malosi o le tinā sa fa'aaluina ai i le atina'eina o lana tama i le itu faale-Agaga.

Fai mai Paulo f 5 – “Ua ou manatua le faatuatua faamaoni ua ia te oe, sa muai i ai iā Loi le tinā o lou tinā, atoa ma Eunike lou tinā, o la'u taofi, o lo o ia te oe foi.” Tatou tatalo ma tu'ualalo i o tatou foi tinā tatou te le aoai, a'e o se feofofoaiga faa-fanau ma tinā, ina ia saga iloa ma aliali mai pea lo latou nafa-tausi lea, o le faafaileleina o le ola faa-le-faatuatua o fanau, e fai ma viiga o le Atua, i lo latou Aso Sa lenei. O Keriso lava, ua ia tapenaina faa-tinā toaga le atoatoaga o lo tatou ola ma le manuia, e ala i le Taulaga Faaola sa Ia saunia.

GALUEGA FAATINO:

1. Ave le avanoa i taimi o le vasega, e mafaufau ai i nisi tinā o ta'ua mai i le Tusi Paia. Ta'u mai se tinā ma se

galuega, po o le a lava se mea sa ia faia, o iloa ai sona sao i le ola faatuatua o tagata.

- (eg) - Tinā o taua i le Faataoto 31: 1(ff)
- Tina o Mose/afafine o Farao
- Raava [Iosua 6: 17 (ff)]
- Ma isi

PESE: “O mai ia outou le au meamamae (244)

A'OA'OGA:

1. Ia fai ma tinā faatuatua i le Atua.
2. Ia pei o Loi ma Eunike
3. Ia faamaoni e pei o Timoteo

.....

ASO SA: 24 ME 2020

MATAUPU: O LE ALOFA SA FAAMAITE E LE AGAGA

SINI: Ia malamalama le vasega, o uiga lelei uma lava, e pei o le alofa, e pogai mai le Agaga o le Atua.

TUSI FAITAU: Filipi 1: 3 – 11

FESOASOANI MO FAIAOGA:

O le tusi lenei a Paulo ia Filipi, e le o faamamafaina tele, le faatofusia ai o isi Ekalesia, e pei o le tusi ia Efeso ma isi. A o lana lava tusi e faailoa ai le agaga o le faafetai tele ia Filipi, ona o lo latou alolofa iā Paulo. O Paulo sa falepuipui i Filipi (Galuega 16: 22 – 36). E ui i ona mafatiaga o tā'ua, ae sa sili

lona olioli ma le agaga faafetai iā Filipi, ona e le gata o lo latou loto atu i le Tala Lelei i leAlii o Iesu, a o la latou foa'i foi mo Paulo, a o i ai i le falepuipui. O lenei agalelei o Filipi, ua māmā ai tigā o le Aposetolo; ona o lona talitonuga, o nei uiga lelei uma o Filipi, e faamaite mai e le Agaga o le Atua ia i latou. O se faamalosiā'u tele mo ia, ma ua le galo ai Filipi i le tatalo a Paulo i aso uma lava. O le manatu o Paulo, ua naunau lava Filipi ina ia fa'aaogaina latou e le Atua, mo so o se mea o finagalo ai le Alii mo latou. E talitonu foi le Aposetolo, o le Atua lava e ala i lona Agaga Paia, na amataina le galuega lelei i totonu o Filipi, o le Agaga lava foi lea na te fa'aatoatoaina Filipi, i le faasalalauina o le Tala Lelei a le Atua. O le tatalo foi a le Aposetolo, ia saga faatuputeleina pea nei uiga lelei o Filipi, auā e le faigatā ai foi ona latou iloa mea faaletonu e alo ese ai, ma tumau ai lava i le faamaoni e oo i le iuga.

Tupulaga, ia avea outou ma tupulaga, e faia mea sili ma lelei i aiga, nuu, malo ma le Ekalesia, ina ua atoatoa ona outou maua le Agaga o le Atua, auā o le puna lena o mea lelei uma, i loto so o se tagata. O le Agaga na te faamaite mea sili i ō tatou loto. E pei foi ona faia ai e Iesu le Taulaga Faaola mo le lalolagi ma tagata uma, auā o le mea lava lea na finagalo ai lona Tamā.

GALUEGA FAATINO: (Mafaufauga loloto)

1. O oe o le tama po o le teine aoga

Tusi mai ni mea lelei se lima, e te faia, e fai ma fesoasoani, pe fai foi ma faamāmā-avega, i le galuega mamafa o feagai ma ou matua, o le faiga o lau aoga, ma le tausiga o le aiga. So o se mea lava e te iloa e fai ma fesoasoani, e pei o le tala sa tatou faitau nei.

PESE: Matou te fia sauni nei (22)

A'OA'OGA:

1. O le Atua o le puna o mea lelei.
2. Faatalitali i le musumusuga a le Agaga
3. Ia alofa i tagata mafatia.

.....

ASO SA: 31 ME 2020

MATAUPU: TUPULAGA, O OUTOU O LE MANUIA O AIGA

SINI: Ia malamalama le vasega, o le manuia ma le mautū o fanau, o le faamanuiaga mo matua ma le aiga mai le Atua.

TUSI FAITAU: Salamo 144: 1 – 15

FESOASOANI MO FAIAOGA:

O le tele o Salamo o tatalo, a'e o le tele foi o tatalo o aofia ai le viiga i le Atua, a o viiga o faailoa atu ai le ofoofogia o mea o faia e le Atua, faailoa atu ai le olioli i le Atua, ma le faafetai ia te Ia.

O le Salamo la lenei, Salamo 144: 1 – 15, o fa'aalia ai le olioli o Tavita i le tausiga alofa a le Atua, i taimi o le tamaoiga ma le solo lelei, atoa foi ma taimi o le lē tagolima ma le taugalemu. I le ma le lagona fa'aamuia, ia i latou uma o fai le Atua ma o latou Alii. O le aotelega atoa lena o le Salamo po o le pese lenei a Tavita; ae a faitau i fuaiupu taitasi uma lava, o lo o manino mai ai lagona na o le fatupese, e pei ona ta'ua i luga.

O le f 1 – 2, o le faafetai, auā o le Atua e toatasi sa aumai ai le malosi ma le tomai, i taimi o ta'ua sa manumalo ai; auā o le Atua lava le olo ma le talitā.

O le f 3 – 4, o fa'aalia manino mai ai le pu'upu'u o le ola lenei o tatou i ai. Ma o le ala lea e matuā tatau ai lava ona ola i le Atua, manū o maua le taimi. 'Aua le maumauina le taimi.

O le f 5 – 11, a oo ina faamanuia mai le Atua, e matuā aafia tagata i le faatuatua, ae tele fa'aaliga o lona mamalu, e saga faamausali ai le faatuatua o ē pipii pea i le Alii.

O le f 12 – 13, o se vaega lea o faamanuiaga fa'aaliali a le Atua i le tagata e tumau ia te Ia. O ana fanau, o faatusa tama i laau totō; e le gata ina tupu tetele ma malolosi a'o talavou, ae o le a fua mai foi o ni faamanuiaga mo matua ma aiga, ae maise le galuega a le Atua. O fanau teine foi, o faatusa i "tulimanu o fale ua togitogiina." O tulimanu o faatusa i ai le sa'o, malosi o se fale; o tama-teine e au le inailau, ma sagatonu ai mea e fai a se aiga, "o le togitogiina," o faatusa i teine, le matagofie o se aiga e ola filemu ma fialia, ona o le pipii i le Atua. Ua faaiu le tala i manuia faa-le-tino, ao ia mea uma o le a atili ai ona le galo le Atua, ma viia ai pea o Ia e faavavau.

O le mataupu lava ia o faasino tonu i le f 12 – O fanau, po o tupulaga talavou, o i latou lava e avea ma faamanuiaga mo matua ma le aiga pe a oo ina fananau mai, ma tutupu a'e, o ni fanau e ava ma matata'u i le Atua. O le faamanatu taua foi lena mo tatou tama ma teine o le vasega, ia tutupu a'e, avea outou e pei o laau tōtō ma pei o tulimanu ua togitogiina o se maota. O le taulaga osi na faia e Iesu, o le malosi lava lenā, le matagofie, ma le atoatoa mo so o se tagata na talia ma faatuatua iā te Ia.

GALUEGA FAATINO: (Taliga Fesili – Fa'aaoga lau Tusi Paia)

1. O le f 1- 2, o i ai le upu e tasi lava, e mafua ai ona maua e Tavita ia lelei uma mai le Atua; o le a lea upu?

Tali: Faatuatua

2. O le a se lagona o le tusitala, ua mafua ai ona ia faatusa le tagata i le mea le aogā, e pei ona taua i le f 4. O le a sou manatu i ai?

Tali: O le lagona o le le taitai ona tutusa ma le Atua. Auā afai o le Atua na faia le tagata, o le a la se mea e mafai e le tagata, pe a le tusa ma le finagalo o le Atua.

3. E faapefea ona lolo'u ifo le lagi o le Atua, ma papai i mauga ina ia pusa?

Tali: O le faaupuga lava ia a le tusitala, ae foliga o lo o aioi i le Atua e afio ifo; auā e mafai lava e le Atua so o se mea pe a finagalo ai. Manatua o le talitonuga faa-lutaia, o le mauga o le Afioga a le Atua, o isi taimi, e faatusa le ao i lona agaga mana.

4. Faamatala mai, pe i ai se tāua o le faatusa e le tusitala o ona atalii i laau toto, ae le o ni laau tupu ma ola talaulau?

Tali: E ese le laau totō lelei, mai le laau e tupu a'e lava ia mai le see (tupu mai le a'a sosolo). E ono oo uma le tupu e avea ma laau tetele tupu laulauā ma fua mai, ae mausalī ma le maluelue le laau toto mai matagi; a'o laau e ola a'e lava latou, e mafulifuli gofie, auā e le tōtōina lelei.

5. O ai se talavou o taua i le Tusi Paia, na manuia ai lona aiga, ma ona matua ia te ia?

Tali: O Iesu.

PESE: Mafaufau ia tamaiti (365)

A'OA'OGA:

1. Ia avea tatou ma fanau e ola i le Atua.

2. Ia fua tele mai le ola i le faatuatua.

3. O le aulelei sili o le amio pulea.

**MANATU TAIALA O IUNI:
INA ULUFALE MAI IA I LE FIAFIA O LOU ALII**

O le malo o le Atua, o le malo o le olioli. O lona uiga o le fiafia e tumau e le toe mavae ese pe a ulufale ai. A o le mea e ao ona malamalama i ai le tagata, o le ulufale i le olioli, e i ai ona aiaiga ma alafua taua e ao ona faia ma ola ai le tagata. Mai lava i le Feagaiga Tuai e oo mai i le Feagaiga Fou, ua uma ona faailoa ma faataoto e le Atua ma Iesu Keriso aiaiga ma alafua e ao ona savavali ai Isaraelu ma le tagata.

Ese le faigata i le tagata ona faatino mea ua finagalo ai le Alii e ulufale ai i le olioli, o le malo o le Atua. Ae, e le tua'iina foi le tagata, aua e ese le matagofie ma suamalie o mea faatosina loto o le malo i lalo nei, e faigofie ona faananau i ai le manao o le tagata.

O mataupu mo le masina lenesi o Iuni, o le a taumafai ai e faamalalama nisi o aiaiga ma alafua e nofo tapena i ai le fanau, e ulufale ai i le olioli o le Alii. A o le olioli foi, e maua i lalo nei.

ASO SA: 7 IUNI 2020

**MATAUPU: OLIOLI O LE LOTO
(A joyful heart)**

SINI: Ia malamalama le vasega i le valaauina o Isaraelu e le Atua e fai ma ana auauna e avea ma malamalama i nuu ese.

TUSI FAITAU: Isaia 49: 8 – 13

FESOASOANI MO FAIAOGA:

O le mataupu lenesi e 49 o lo o faaulutalaina – “O le auauna, o le malamalama mo nuu ese.” E lua lava uiga tāua o le tusi lenesi a Isaia, “O le auauna puapuagatia ma le Afio mai o le tupu.” Ma e lima vaega ua vaevaeina ai lenesi tusi:

1. Faamasinoga mo agasala
2. O le faataua le auaunaga
3. O le faamoemoe o le toefuataina
4. O le Afio mai o le Mesia
5. O le finagalo o le Atua mo le lalolagi.

O le vaega o le mataupu e 49 lea na fai ma tusi faitau mo lenesi Aso Sa. O lo o faamatalaina ai le faamoemoe o le Atua mo lona nuu o Isaraelu. O le faamoemoe ua loa ona faataoto mai e le Atua i le amataga ina ua agasala le tagata. O le valaauina ai o Isaraelu ma avea ai ma feagaiga a le Atua, o le faamoemoe lava ina ia oo le Suafa o le Atua i tuluiga o le lalolagi ma malamalama le lalolagi uma i le Silisiliese o le alofa o le Atua.

O le nuu o Isaraelu, o se nuu e le tausii feagaiga. O se nuu e femoumoua'i ma faaoleole i le Atua. Tele ia o vavega ma mea lelei na faia e le Alii mo lona nuu. O le saolotoga na saoloto mai ai i le ola pologa, sa iloga ona pagatia ai ma alalaga ai ma le leo tetele i le fia ola, na faia lava e le Atua mo i latou. Ae na maua loa toe foi lava i le ola tuai. Na aoa'i le Atua ma faatafea ai i nuu ese ae ua manatu ifo ua lafoa'i e le Atua ma e le oo le malosii o le Alii i malo o nuu ese. Ua manatu faatauvaa i le malosii ma le mamalu o le Atua. Ua le talitonu i le silisiliese o le sa la osi feagaiga. Ae ui lava i le leaga o le nuu. O lea lava na fetalai mai le Alii – “O ona po o le alofa ou te tali atu ai ia te oe.”

O le alofa o le Atua, na aumai ai le olioli mo lona nuu. O mea ia o le a faia e le Atua, e tali mai ai i lona alofa i lona nuu.

- O le a faaolaina ai le nuu
- E leoleo le Atua i lona nuu
- E fai lona nuu ma feagaiga o nuu
- O nuu o le a faatafunaina, e fai mona tofi
- O oe ua nofo i le pouliuli ma le pologa o le a ulufale i le malamalama ma le saolotoga.
- E le fia aai, pe fia feinu
- E le ogotia i le vevela, ma le la, aua e taitaiina e le Atua i vaipuna

Le alofa faamaoni lea o le Atua mo lona nuu, na taunuu lava mea na ia fetalai mai ai. E le gata la o le faaolaina o le nuu ma faafoi mai i le tafeaga. A o lea foi ua fai lenei mataupu ma valoaga, o le faaolaina o le tagata agasala e ala i le Afio mai o le Mesia. O le Mesia, e fai ma malamalama mo le lalolagi atoa. O le faaolataga e aafia uma ai le tino, mafaufau ma le loto.

Ia alaga oe le lagi e, ia olioli oe le lalolagi e, ia leo tetele oe mauga, ma ia alalaga fiafia, auā ua faamafanafanaina e le Alii lona nuu, ua ia alofa foi i ona tagata ua tigaina.”

O le lagi ma le lalolagi ma mea uma o le natura o lo o i ai, ia alalaga ma le olioli. Aua o le alofa o le Atua, e faamaoni lea, o le olioli sili lea.

GALUEGA FAATINO:

Fesili ma Tali

1. O le a le feagaiga lea na osi e le Atua ma Isaraelu?

Tali: E fai oe mou nuu, e fai au mo outou Atua.

2. O a vaega e lima ua vaevaeina ai le tusi a Isaia?

- Tali:
- 1) Faataua le auaunaga
 - 2) Faamasinoga mo agasala
 - 3) O le toe fuataina

- 4) O le Afio mai o le Mesia
- 5) O le finagalo o le Atua mo le lalolagi.

3. O a ni mea se tolu na tali atu ai le Atua i le alofa i lona nuu?

- Tali:
- 1) Faaolaina o lona nuu
 - 2) Leoleo lona nuu
 - 3) E ulufale i le malamalama ma le saolotoga

4. Na mafai e Isaraelu ona faataunuu le finagalo o le Atua?

Tali: Leai – ona e faaoleole ma femoumouai

5. Ae faapefea ona oo le finagalo o le Atua i tuluiga o le lalolagi?

Tali: O le Afio mai o le Mesia, o le taunuuga lea o mea uma.

PESE: Pese ma Viiga 144 (fuaiupu 1 & 2)

A’OA’OGA:

- 1. O le olioli e mai le Atua lea.
- 2. E tali pea le Atua i lona alofa i aso uma.
- 3. O le fiafia ma le olioli o le finagalo lea o le Atua mo le tagata.

.....

ASO SA: 14 IUNI 2020

MATAUPU: UA FA'AALI LE ATUA IA SOLOMONA (“God appeared to Solomon)

SINI: Ia malamalama le vasega i le finagalo o le Atua mo Solomona ina ua maea ona fausia le malumalu.

TUSI FAITAU: 1 Tupu 9: 1 – 9

FESOASOANI MO FAIAOGA:

Ina ua maea ona fausia e Solomona le malumalu mo le Alii ma mea uma na manao ai le tupu e faia, ona tatalo ai lea o Solomona i le Atua mo lana faamanuiaga mo le galuega ua uma ona faataunuu. Ona fa'aali mai ai lea o le Alii i le tupu e pei foi ona fa'aali ia te ia i lana miti i Kipeona. Ua tali le Alii i le manao o Solomona, ma o mea ia na finagalo le Atua e faia mo ia. Ua faapaiaina e le Atua le malumalu ma ua finagalo le Atua e tuu ai lona suafa e oo i le faavavau. Ae ua finagalo foi le Alii ina ia usita'i Solomona ma faia mea uma ua ia fetalai atu ai.

Ia faasaga ou mata i le malumalu ma le loto atoa i aso uma. Ia savali ma le loto sao ma le amio lelei. Afai e faalogo ma usita'i Solomona, ona tauia lea e le Atua i le manuia, e pei ona la faia ma Tavita. E faatumauina le nofoalii o lona malo i Isaraelu e faavavau. E le motu foi lona gafa i le nofoalii o Isaraelu. O le mea taua lava i le Atua, o le ola manuia lona nuu ma auauna atu mo ia. Ae ua fetalai foi le Atua, ia aua lava nei liliu ese le loto o Solomona mai le Atua. Afai e lilliu ese ma lē toe mulimuli Solomona i ala o le Alii ae auauna atu i atua o nuu ese, ona lafoa'i lea o i latou e le Atua.

E faaumatia e le Atua Isaraelu ai le fogaeleele. E lafoa'i foi e le Alii le malumalu ma le toe Afio ai. E avea Isarelu ma upu

faatusa ma tauemu ai nuu uma. E avea foi le malumalu ma fale e faifai upu i ai tagata – “Aisea ua fai ai faapea e le Atua lenei nuu.”

E le lilo i tagata le mafuaaga, e mafua ona ua tuua e Isaraelu le Atua.

Ua galo foi ia Isaraelu lona faaolataga mai le ola pologa sa ola ai i Aikupito.

E le taufesiligia le fa'aali mai o le Atua i le tagata. O le taimi lava e fa'aali mai ai le Atua, o lona uiga e i ai le mea e finagalo ai le Alii. A o le finagalo foi o le Alii, e tasi lava le mea e mana'o ai le Atua, ia manuia ma ola fiafia le tagata. O le taua lea o le faalogo ma usita'i i le finagalo o le Atua.

Tele ia o mea o lo o fa'aali mai ai le Atua mo i tatou, ae ua le mafai ona tatou malamalama ma iloa ona o le sese ona tatou faauigaina. Ua tatou manao e faauiga lava i mea tatou te loto i ai, ae galo ai le finagalo o le Atua.

GALUEGA FAATINO: Taliga Fesili

Taliga mai fesili nei, fa'aaoga ai le Tusi Paia

1. E faafia ona fa'aali le Atua ia Solomona?
2. O ifea na uluai fa'aali ai le Alii ia Solomona?
3. Afai e usita'i Solomona i le finagalo o le Atua, e tauia o ia e le Alii. Tau mai ni tau se 2 e maua e Solomona.
4. Afai e liliu ese le loto o Solomona mai le Alii, o a ni mea se lua e tupu i lana nofoaiga?
5. “E le motu lou gafa i le nofoalii o Isaraelu.” O le a le uiga o lea faaupuga?
6. O le a le uiga o le upu, “uisa”?
7. O ifea na nofo pologa ai Isaraelu?
8. “Ona ou faaumatia lea o Isaraelu ai le fogaeleele? O le a lona uiga?
9. Tali i le ‘Ioe’ po o le ‘Leai’

- i) Na finagalo le Atua e fausia e Solomona le malumalu?
- ii) O Tavita o le atalii o Solomona?

10. O le a le mea e sili ona manao ai le Atua mo lona nuu?

A’OA’OGA:

- 1. E fa’aali mai pea le alofa o le Atua i aso uma.
- 2. E finagalo le Alii ina ia ola manuia le tagata.
- 3. Faalogo ma usita’i.

.....

ASO SA: 21 IUNI 2020

MATAUPU: IA MITAMITA I LE ALII

SINI: Ia malamalama le vasega, o le mitamita i le Alii, o le tagata lea e talitonu faamaoni i le Alofa Tunoa o le Atua.

TUSI FAITAU: Roma 15: 14 – 21

FESOASOANI MO FAIAOGA:

I le vaega lenei o le mataupu e 15 o le tusi a Roma, o lo o talanoa ai le Aposetolo i alafua na ia faatino ai le galuega na valaauina ai o ia e le Atua mo nuu ese. O le faatumuina ai o le loto o Paulo i le olioli mai le Alii e ala i lona Alofa Tunoa, ua manatu le Aposetolo, o le olioli foi lea mai le Alii e ao ona faatutumuina ai loto o e ua naunau e auauna mo le Alii. O le olioli e o faatasi ma le malamalama ma o le iloa, e mafai ai ona auauna le tasi mo le isi.

O le galuega atoa lava a Paulo sa faavae lea i le Alofa Tunoa o le Atua. Afai la ua faaolaina le tagata talitonu ona o le Alofa Tunoa o le Atua, ia iloa foi la ona auauna atu ma le alofa. Ia auauna le tagata Kerisiano ma le mautinoa o lona tau, o lo o i le Alii. O le upu auauna e faavae mai i le auauna faa-Ositaulaga. E auauna atoa ai le ola ua faasatauroina mo Keriso. O le auaunaga faa-Tala Lelei, e le na o le faaolaina ma le papatisoina o le tagata ina ia avea ma Kerisiano, ae ia faasatauroina foi le ua avea ma auauna, e ala i lona ola faaletino.

O le mafuaaga tonu lea ua mitamita ai le Aposetolo, e le ona o ia ma lana galuega ae ona ua faasatauroina lona ola mo le Alii, ma mea lelei ua ia mafai ona faia mo Keriso. O le mafuaaga foi lea na a’oa’o atu ai Paulo i tagata o nuu ese, ia o faatasi upu ma galuega. Ua avea foi ia ma molimau sili, i le Toetu o Keriso ma lona faamaoni. O upu ma galuega faatasi ai ma le avea ma molimau mo Keriso o nisi ia o alafua e avea ai le tagata ma auauna lelei.

O le va o Ierusalema ma Iluriko e tusa lea ma le 1,400 maila. O Iluriko o se vaega i totonu o Europe lea ua avea nei ma Alapania (Albania) ma Ugosalavia (Yugoslavia). O nuu e le’i oo muamua ai le Tala Lelei ae faatoa taunuu ai ina ua tala’i ai le Aposetolo. Na vave ona talia e nei tagata o nuu ese Paulo ma lana tala’iga. E le na o le tala’i, ae na faatuina ma tōtō ai e le Aposetolo le lotu, na ia fesoasoani foi i faafitauli ma faaleleia fevaevaeaiga. O nei mea uma na faia e Paulo mo nuu ese, sa avea lea ma mafuaaga ua mitamita ai lona loto i le Alii. O ia o le auauna mo tagata o nuu ese, ma ua avea ai foi i latou ma auauna mo Keriso. Ia auauna ma le loto mitamita i le Alii, ona maua lea o le olioli loloto ina ua avea ma Kerisiano faamaoni.

GALUEGA FAATINO: Suesuega i le Tusi o le mataupu.

Uiga o faaupuga: Tau mai po o le a le uiga o faaupuga nei

- 1) “Ua apelepele i le poto uma lava.”
Tali: Ua faatumuina i le poto o le Atua.
- 2) “Apoapoi le tasi i le tasi.”
Tali: Ia galulue faatasi i le alofa.
- 3) “Ia ia te au ni mea e mitamita ai ia Keriso Iesu.”
Tali: Ia faasilisili lou fai mea lelei mo le Alii.
- 4) “Ina nei ou ati ae i luga o le faavae o se tasi tagata.”
Tali: E tasi lava le faavae o le ola, ua na o Iesu Keriso.
- 5) “O a ni mea se lua e ao ona faia e le tagata ma le loto mitamita i le Alii?
Tali: (i) Ia faasatauroina lona ola faaletino mo le Alii (Sacrifice)
(ii) Tumau i le faatuatua (Faith)

(Fa’aaoga le Tusi Faitau mo lenei galuega faatasi ai ma le fesoasoani a le susuga i le faiaoga)

A’OA’OGA:

- 1. Avea ma auauna e mitamtia i le Alii.
- 2. E taua upu ma galuega.
- 3. Ia faasatauroina le ola mo le Alii.

.....

ASO SA: 28 IUNI 2020

MATAUPU: SAVAVALI E TUSA MA LE ALII

SINI: Ia malamalama le vasega, i mea ua finagalo ai le Atua ma ala e ao ona savavali ai mo le ola manuia. Ia mataala foi i a’oa’oga sese a nisi tagata e uiga ia Iesu Keriso.

TUSI FAITAU: 2 Ioane 1 – 13

FESOASOANI MO FAIAOGA:

E lua lava mataupu taua o le tusi lenei a le Aposetolo o Ioane. Muamua o le “faailoga o e ua valaauina” ma le “feau a Ioane” (Identity of the Recipients and John’s pointed message). Ua faaigoaina e Ioane e ua valaauina, “O le fafine filifilia ma lana fanau,” (The elect lady and her children). A o le feau o le tusi lenei a Ioane, o lo o faamalosi atu le Aposetolo i le Ekalesia i Efeso, ina ia “tumau i le faatuatua.” O le tamaitai (fafine) ma ana tama (fanau), e i ai le manatu, o lo o faatusaina le tamaitai i le ‘lotu’ a o lana fanau o e ua avea ma Ekalesia ua faa Kerisianoina. O lona uiga, o le tusi e faatatau i le lotu i totonu o Efeso, atoa ai ma tagata lotu. O le feau a Ioane, o lo o faataua ai e Ioane le tumau o Efeso i le faatuatua. Ia tumau i mea ua a’oa’oaina ai i latou, e ala iā Iesu Keriso. Ae le gata i lea, ia mataala foi i a’oa’oga taufaasēsē ua lolofi atu i totonu o Efeso. O se tasi o a’oa’oga malosi ua tupu i totonu o Efeso, o e ua aoao e leai se itu faaletino o Keriso (Christ is not human). Ua foliga mai ua tele ina talia e nisi o tagata lenei talitonuga. O le mafuaaga lea na tusi atu ai le Aposetolo, ia aua nei talia ma mulimuli ai le Ekalesia. Ia tumau pea lo latou talitonu i mea ua a’oa’oaina ai i latou, e ala i le ola na olaina e Iesu

Keriso, ina ua liutino tagata le Atua ma afio mai ai i le lalolagi.

E tolu vaega o le ola o lo o faamamafa e le tusi lenei:-

1) Malamalama

E lei atoa le tausaga talu ona faavae le lotu i totonu o Efeso, a o lea ua lolofi atu le mau talaiga eseese i totonu o le Ekalesia. Lea ua apoapoi atu Ioane ina ia maua le malamalama e iloa ai ona faamasino nei ituaiga talaiga, ina ia iloa ai mea sēsē ma tala'iga sēsē ina ia 'aua nei talia i totonu o le Ekalesia. O le malamalama e faamasino ai le mea moni ma le mea sēsē.

2) Alofa

O le manatu a le Aposetolo, e le mafai ona fai mai le tagata e alofa ia Iesu ma le lotu ae lē savavali ma le faatuatua i le upu moni. O le alofa ma le upu moni, e iloa ai e ua savavali i le malamalama o le Alii ma e ua savavali i le pouliuli ina ua talia talaiga sese.

3) Alofa i tagata ese

O le alofa i tagata ese o le matafaioi lea a le tagata Kerisiano ma o le faailoga foi lea o le Alofa. Ae o le manatu o le tusi lenei a Ioane, o le alofa e i ai ona tuaoi. O tagata o le Atua, e ao ona aua nei o latou talia, pe lagolagoina tagata ua latou manatu faatauvaa i le Tala Lelei iā Iesu Keriso.

O le savavali ai e tusa ma le Alii, o lona uiga, ia malamalama, e talia e le tagata mea uma ua a'oa'o ma faia e Iesu Keriso, ao i ai o ia i le lalolagi. Ia iloa foi ma le talitonu atoatoa e le tagata, e faaolaina le lalolagi uma pe a tumau i le finagalo o Keriso pe a toe afio mai o ia.

GALUEGA FAATINO: Taliga Fesili

Tali mai i fesili nei

1. E fia mataupu taua o loo aumai e le tusi lenei a Ioane?
Tali: E lua
2. O a nei mataupu?
Tali: i) Faailoga o e ua valaauina
ii) Feau a Ioane
3. O a vaega e tolu o le ola o lo o faamamafa e le tusi lenei a Ioane?
Tali: i) Malamalama
ii) Alofa
iii) Alofa i tagata ese
4. O le a le faaperetania o le upu malamalama?
Tali: Knowledge
5. Faaperetania o le upu Alofa ma le faaupuga Alofa i tagata ese?
Tali: Alofa – Love
Alofa i tagata ese – Hospitality

A'OA'OGA:

1. Mataala i le mau lotu eseese ua ofi mai i Samoa.
2. Ia tumau i le ola faa-Kerisianoina
3. E manuia e e savavali ma le loto tumau i le finagalo o Iesu.

.....

MANATU TAIALA O IULAI:

O LE MALO O LE ATUA I LE LALOLAGI:

O le upu moni, e leai lava se tagata ua alu i le lagi ona toe foi mai lea, ia po o le oti foi ma toe ola mai. E foliga mai o lo tatou ala lava i le lagi o le oti, ae a amio lelei i le taimi na ola ai i le lalolagi, ona ulufale lea i le malo o le Atua. Atonu o le mea lea, e iloa loa e le tagata ua lata mai le oti, ona faalatalata lea o lona loto i le Atua. Ae faapefea le amataga mai o le ola i taimi na maua ai le malosi? E manao e ulufale i le malo o le Atua, ae musu e talia le Atua i le loto. E le faatali sei oo mai le oti, ona ulufale lea i le malo o le Atua, aua e tusa lava pe ulufale le tagata i le malo o le Atua, ae a le talia i lona loto, e leai lava se taua. O le talia ai o le tagata o le Atua, e ala ia Iesu Keriso, ma tumau ai i le ola faa-Kerisianoina, o le i ai lava lea o le malo o le Atua i le lalolagi. O loo ia te oe le malo o le Atua. “The kingdom of God is inside you.” O loo i totonu o lou loto, pe afai e tatala e ulufale ai le Alii.

.....

ASO SA: 5 IULAI 2020

MATAUPU: IA VIIA E TAGATA UMA LE ATUA MONI

SINI: Ia malamalama le vasega, o le Atua e ou le viiga uma lava. E leai se isi atua e tutussa ma lona Silisili Ese. O le matafaioi a le tagata e ao lava ona faafoi le viiga i le Atua e le aunoa. Ia aua lava nei i le tagata le viiga.

TUSI FAITAU: Isaia 42: 10 – 13

FESOASOANI MO FAIAOGA:

O le tusi lenei a Isaia e 5 – Manatu Autu o lo o faamamafa ai tusitusiga a le tusitala:

1. Faamasinoga mo Agasala (Judgement for sin)

O Israelu ua faatusaina i le tovine, na toto, tapu’e, faasusu ma faatupu e le Atua ma le naunautaiga o le Alii ia tupu malosi ma fua mai i ni fua lelei. Ua tupu le nuu, ua malosi, ae ua fua mai i fua lē lelei. O le mafuaaga lea na faamasino ai e le Atua lona nuu e ala i le fa’aaogaina o nuu faapaupau e a’oai ai lona nuu.

2. Taua o le Auauna

O Israelu na filifili e le Atua e avea ma ana auauna. O le matafaioi na filifili ai e le Atua, ia avea Israelu o se auauna usita’i ma filiga e tala’i atu i nuu ese le silisili ese ma le mamalu o le Atua. A o se galuega e lei mafaia e Israelu ona faataunuu lea na mafua ai ona afio mai le Mesia e faataunuu le finagalo o le Atua.

3. Faamoemoe mo le toe faafoisia

O le toe faafoi mai ai o le tafeaga, o le faamoemoe fou lea mo Israelu, ma o le faamafanafana foi lea o le Atua mo lona nuu mai tigā ma faigatā o i ai i nuu ese. O le ata vaaia lea o le faamaoni o le Atua.

4. O le Afio mai o le Mesia

O le mafuaaga o le Afio mai o le Mesia:- (i) O le avea ai o Ia ma ‘Auauna Puapuagatia (Suffering Servant) ona o le tauaveina o agasala a tagata. (ii) O le faailoa mai ai i le lalolagi le silisili ese o le Atua ma lana pule e leai sona gataaga.

5. O le finagalo o le Atua mo le lalolagi.
O le Afio mai ai o le Mesia na avea ma auala e pogisa ai le vaai a tagata Iutaia i le finagalo o le Atua. A o le finagalo o le Atua, e manao ina ia avea Iutaia ma malamalama susulu o le faaolataga e soluia atu ai ma tagata o nuu ese.

O le mafuaaga tonu lea e ao ai ona viia e malo uma le Atua, auā o lona finagalo mo le faaolataga, ua lē faapito lea mo na o Isaraelu, ae mo tagata uma, o malo uma e oo atu i tuluiga o le lalolagi. O lona finagalo mo le manuia mo tagata uma, e le na o sina taimi, ae o le manuia e leai sona gataaga.

GALUEGA FAATINO: Tusitusiga

Toe faamatala mai e tamaiti le uiga o manatu autu e 3 o le tusi a Isaia. E tai tasi parakalafa i le manatu autu e tasi.

- i) Faamasinoga mo agasala
- ii) Taua o le Auauna
- iii) O le Afio mai o le Mesia

PESE: 2 (Pese ma Viiga)

A’OA’OGA:

- 1. E le faapito le Alofa o le Atua.
- 2. Ia avea ma auauna faamaoni.
- 3. O malo uma o le lalolagi e pule ai le Atua.

.....

ASO SA: 12 IULAI 2020

MATAUPU: O LO O I AI LE ATUA I TALA ATU O MEA UMA.

SINI: Ia malamalama le vasega, ma a’oa’oina i tala atu o mea uma i le lagi ma le lalolagi o lo o i ai le Atua. E oo lava i le ola o le tagata.

TUSI FAITAU: Esoto 3: 1 – 15

FESOASOANI MO FAIAOGA:

O le uiga o le upu “Esoto” i le gagana Eleni, o le ‘o ese’ po o le ‘ulufafo’ (exit). O le tusi lona lua lenei o tusi a tulafono na tusia e Mose, lea e faaigoaina o le ‘Penitatuka’ (Pentateuch). O le tusi a Esoto o lo o aumai ai le ata vaaia o le Natura o le Atua. O lo o aumai ai foi le ‘Mataupu Silisili Faavae’ o ai le Atua, e faapefea ona tapuai i le Atua, o ana tulafono, o lana feagaiga ma Isaraelu ma le faaolaina o lona nuu. O tulafono e sefulu ma isi tulafono o lo o i totonu o le tusi lenei a Esoto, o lo o faamatalatalaina ai le natura alofa o le Atua ma lona Silisili Ese. E lē o se tala fou lenei tala e uiga iā Mose ma lona valaauina e le Atua e alu i Aikupito e aumai lona nuu. E tolu faaupuga o lo o i le tusi sa faitauina mo le mataupu, e fia fa’aaoga mo le mataupu o le Aso Sa lenei.

1) Ua fa’aali mai ia te ia le agelu a le Atua.
I le amataga o le tala lenei, o lo o leoleo mamoe ai Mose i le lafu mamoe a Ietero le tamā o lana avā. Ua ta’ita’iina e Mose le lafu mamoe i tala atu o le vao e saili se vao mua lelei ma le vai e fafaga ma faainu ai le lafu mamoe, ma ua oo atu ai le savaliga a Mose ma le lafu mamoe i le mauga o Horepa. O le mauga lea, e faapea e Afio ai le Atua. O i tonu lea na fa’aali

ai le agelu a le Atua ia Mose. O le fa'aali mai ai o le agelu ia Mose, o le valaauina lava lea o ia e le Atua, faatasi ai ma le feau ua manao le Atua i ai. O le agelu o le ave-feau a le Atua (Messenger). O le fa'aali mai ai o le agelu o le faailoga lea o le taua o le feau ua finagalo ai le Atua mo Mose. O le feau e ao ona faalogo ma usita'i ai ma le loto faamaoni Mose.

2. O le afi mumu i totonu o le laau talatala

Tasi lenei fa'aaliga iloga lona ofoofogia i totonu o tala o le Feagaiga Tuai. E tele foi faamatalaga o lo o tau faauiga ai lenei fa'aaliga. O le afi i totonu o le laau talatala, o se mea e faigatā ona talitonu ai le vaaiga o mata, auā foi e mūmū le afi e lē faaumatia le laau. O le afi, o lo o faatusaina i le Atua. O le afi e faamamaina ma e faaumatia foi. O lona uiga o le Atua e faamamaina lona nuu, na te aumaia foi le manuia i lona nuu, pe afai e faalogo ma usita'i i Lona finagalo, a o le Atua foi na te faaumatia iā Isaraelu, pe afai e liliu ese o latou loto mai le Atua.

O le laau, ua faatusaina ia Isaraelu, le nuu ua filifilia e le Atua. E tupu ma ola malosi, e faamāmāina ma ave ma nuu e faapaolo ai nuu uma o le lalolagi. Ae a fulitua i le Atua, ona liaina lea ma faatafunaina.

3. To ese ou seevae, ua sa le eleele o lo o e tu ai.

O le tō ese ai o seevae, o le faailoga o le 'matatau' 'ava' ai o le tagata pe a feagai ma le Atua. E afua lea tulaga o le tō ese o seevae, ona o le eleele ua sā, o le eleele ua Afio ai le Atua. Afai e finagalo le Atua, ina ia tofia le tagata mo se feau taua e ao ona tuu ese e le tagata mea uma, o lo o manao ma naunau i ai lona loto, ae fai le finagalo o le Atua. 'Aua foi nei fefe pe palaai le tagata e faatino mea ua finagalo ai le Atua auā le ola manuia o tagata. Ia iloa foi e le tagata, o le ola mata'u i le Atua, e faatumuina ai i meaalofa sili o le Agaga o le Atua. E lē mafai ona tuulafoa'iina e le Atua le tagata, e faia lona finagalo.

O faitau ia mai le mataupu, o lo o faamatalatalaina ai nisi o natura o le Atua. O Ia o le malosi, o le ola, na te faamāmāina le tagata agasala, e Silisili ese lona mamalu. A o le natura sili lava o le Atua o le Alofa.

GALUEGA FAATINO: Tusitusiga

Faamatala mai i parakalafa tai tasi, natura ia o le Atua.

- (1) O le Atua na te faamamaina
- (2) O le Atua na te faaumatia
- (3) O le Atua o le Alofa

A maea le galuega faatino, ona faatalatalanoa lea ma tamaiti a latou tali ma fesoasoani ai le faiaoga e ala i ni faataitaiga o natura ia o le Atua o lo o i le tagata.

A'OA'OGA:

- 1. E pule aoao le Atua.
- 2. I tala atu o le tagata o le Atua.
- 3. O le natura sili o le Atua o le Alofa.

.....

ASO SA: 19 IULAI 2020

MATAUPU: UA LATA MAI LE MALO O LE ATUA

SINI: Ia malamalama le vasega, o le lata mai ai o le malo o le Atua o le Afio faalua mai ai o Keriso. A o papatisoina ai o Iesu e Ioane, o le tapenaina lea o le tagata mo le toe Afio mai ai o Iesu. (second coming)

TUSI FAITAU: Mataio 3: 1 – 6; 13 – 17

FESOASOANI MO FAIAOGA:

O le mataupu e 3 o le tusi lenei a Mataio, o lo o faamatalaina i le papatisoina o Iesu e Ioane. Ae o lo o faaulutalaina ‘O le talaiga a Ioane le papatiso.’ O le talaiga o lo o a’oa’o atu ai Ioane i le motu o tagata ina ia salamō auā ua latalata mai le malo o le Atua. E eseese le manatu o nisi o le au fai-Evagelia ma Mataio e uiga ia Ioane le papatiso.

E manatu nisi e le iloa e Ioane Iesu, faatoa iloa lava ina ua oo i le taimi o le papatisoga. A o Mataio, o lo o faamatalaina faapea ua leva ona masani Iesu ma Ioane a o laiti. Sa feola faatasi auā e aiga i laua. Na valavala i laua ina ua valaauina Ioane e avea ma tuetue ala (fore-runner) auā le toe Afio mai ai o Iesu.

O le papatisoina ai o Iesu e Ioane, o le faailoa atu lava lea i tagata, o Ia o le Alo o le Atua, o le Mesia, ma o Ia foi o le Faaola mo le lalolagi uma.

O le papatisoina ai o Iesu, o le amataga lea o lana galuega i le lalolagi. E tolu vaega taua o le papatisoina ai o Iesu.

1. “O le atoatoaga o le Amiotonu”

O le papatisoina ai o Iesu o le avea ai lea o Iesu ma sui o le Atua i le lalolagi. O le atoatoa o le Atua e ala i lona natura alofa ua ia Iesu lea. O le amiotonu o le Atua ua Afio mai ma Iesu i le lalolagi, ina ia a’oa’o atu i le tagata.

2. O le faataunuuina o valoaga

Ua leva ona alaga Ioane ma tala’i atu le Mesia ua Afio mai i le lalolagi. Na faamatala ma faamalamalama e Ioane o Iesu. O le papatisoga o Iesu, o le ta’u atu lea ia Iutaia, ua i le lalolagi le Mesia.

3. Faamagaloina o agasala.

Ua fesui ai Iesu ma le agasala a le tagata. E ui ina le agasala le Alii, ae ua Ia Afio mai ina ia magalo le tagata ma ola saoloto mai i le agasala. O le finagalo tonu lea o le Atua.

O le Afio mai ai o Iesu i le lalolagi, na Afio mai i lona itu faaletagata (Humanity) A o Iesu lava ia ua atoa i ai le Tolu Tasi Paia. O le siufofoga mai le lagi o le faailoga lea o le Atua le Tamā, ua fetalai mai. O le lupe o le Agaga Paia lea ma Iesu o Ia o le Alo o le Atua.

Tele manatu e faapea o le i ai o Iesu i le lalolagi, o le malo lava lea o le Atua. O le upu moni, o le i ai o Iesu i le lalolagi, o le fa’aaliga lava lea o le Silisili Ese o le Atua ina ia vaai ma iloa e tagata. A o a’oa’oga ma tala’iga a Keriso, o le tapenapena lea o le ola faale-Agaga o le tagata auā le malo o le Atua i le lagi (Heavenly Kingdom). O lona uiga, o le Afio mai ai o Keriso i le lalolagi ma galue, a’oa’o, faamalolo ma ola faatasi ma tagata, na faia ma le mautinoa e toe Afio o Ia i le lagi, ina ia tuu le avanoa i le tagata e fai ai lana filifiliga.

O le ola ai o Iesu i le lalolagi, o le faailoga lea ua lata mai lona malo. O le malo o le Atua, e le maua ai mea o lo o tutupu i le lalolagi. O le toe Afio mai ai o Iesu, e Afio mai o ia e avatu le tagata i lona malo pe afai ua salamō ma talia Lona finagalo.

GALUEGA FAATINO: Faatinoga

Faatinoga le papatisoina o Iesu e Ioane (5 minute)

A’OA’OGA:

1. E toe Afio mai le Alii.
2. Ola sauniuni ma tapenapena
3. O Iesu o le ala i le lagi (Heavens)

.....

ASO SA: 26 IULAI 2020

MATAUPU: O MEA LILO O LE MALO O LE ATUA

SINI: Ia malamalama le vasega, o le lauga faa-amuia leni a Iesu o lo o faapupula ai i le tagata meaalofa lilo a le Atua o lo o i totonu o le loto o le tagata, e ao ona ola ma fa'aaoga e le tagata e avea ai ma Kerisiano moni mo le Alii.

TUSI FAITAU: Mataio 5: 3 – 12
(Faatonu le fanau e ao faatauloto le tusi faitau leni)

FESOASOANI MO FAIAOGA:

Faamatalaga e uiga ia Mataio:

Sa galue Mataio o le ao lafoga mo le malo o Roma i totonu o Iutaia, lalo o le taitaiga a Herota Anetipa le atalii o Herota le sili. O le tagata tamaoiga ma taualoa pe a fua i lana galuega. Na valaauina Mataio a o faatino lana galuega i le faapaologa o le malumalu. O le igoa muamua o Mataio o Levi, lea na suia ia Mataio ina ua valaauina e le Alii.

Na tuua uma e Mataio lona tamaoiga, o lona tulaga maualuga faapea lona talitonuga i le lotu Iutaia ina ua valaau e le Alii. O le amataga lea o le avea ai o Mataio ma ao lafoga mo le Alii. Ua avea foi o ia ma tagata fou i le Alii.

O le Afio mai ai o Keriso i le lalolagi, o le ata vaaia lea o le Malo Fou o le Alii. E 5 manatu autu o le tusi leni a Mataio.

1. O le Malo Faalelalolagi

O le lauga a Iesu i luga o le mauga, po o le lauga fa'a-amuia o lo o faailoa ai e le Alii le malo fou o le a oo mai i le

lalolagi. O le malo e tuufaafegai ma a'oa'oga o tulafono o le Feagaiga Tuai mai faiga le tonu a malo o le lalolagi. E 32 taimi o lo o taua ai e le tusi a Mataio le faaupuga leni "Malo o le Lagi" (Kingdom of Heaven) O le malo lea na valoia e le Perofeta o Tanielu (2: 44)

2. O le Mesia

O le sini o le tusi a Mataio, o le tau faailoa lea o Iesu o le Mesia mo Iutaia ma o le tupu o Isaraelu, lea e faaigoa ai le Alii o le "Atalii o Tavita" (Son of David).

3. Faataunuuga o Valoaga a le Feagaiga Tuai

E tele lava ina fa'aaoga e Mataio valoaga mai tusi o le Feagaiga Tuai e uiga i le Mesia, e faamautinoa ai o Iesu o le taunuuga lea o nei valoaga uma.

4. A'oa'oga ma Galuega

O le faamauina e Mataio o a'oa'oga ma galuega a Iesu, e i ai le manatu e mafua ona o lo o taumafai Mataio ina ia o faatasi Aoaoga ma Galuega a le Alii ma tusi o tulafono e 5 o lo o i le Feagaiga Tuai (Kenese – Teuterenome). E faailoa ai foi le eseese o galuega a Mose ma le Alii.

5. O le Matautia o le ola le talitonu.

O a'oa'oga a le Alii e ala i faataoto, o lo o aumai ai le matautia o le faamasinoga a le Atua mo e e le talitonu. O le faamasinoga mo e e le faalogo ma le talia le Tala Lelei mo le faaolataga e ala ia Iesu Keriso.

O le malo fou, e pei ona a'oa'o mai ai Iesu. O lo o i totonu o a'oa'oga a le Alii le ala e ao ona savali ai le tagata e ulufale ai i lea malo. O le lauga fa'aamuia a le Alii o se tasi lea o a'oa'oga a le Alii, ua iloga lona matagofie i le faalogo, ao lona faatinoina, e ese le faigata mo le tagata. O le lauga o lo o tau fafagu mai ai mea lilo o lo o i totonu o le loto o le tagata ua taotaomia ona o faiga ma mea faalelalolagi ua naunau ai le

loto o le tagata. O le fesili – “O a mea lilo o le malo o le Atua.”

O le loto mama, o le faanoanoa, agamalu, amiotonu, o le alofa, loto maualalo, ma le filemu, o mea lilo ia o le malo o le Atua. E mafua ona lilo, ona o mea ia o lo o taoto i le loto o le tagata, e le gata ina faigata ona iloa, ae faigata foi i le tagata ona faatino. O le upu moni, ua loa ona silafia e le Alii le natura faaletagata, e manao lava le loto i le tamaoiga, o le mamalu, o le fia sili ma le ola faamaualuga. O mea ia e le mafai ona ulufale ai le tagata i le malo fou o le Atua.

O le upu ‘amuia’ o lo o taoto ai le tau i le tagata, pe afai e maua meaalofo lilo ia o le malo o le Atua ma ola ai.

A o mea lilo ia, e maua ai foi meaalofo lilo o le mafaufau, o le poto ma le atamai faale-Atua. O mea lilo o le malo o le Atua, ua leva ona i totonu o le loto o le tagata, a o le mea e mana’o ai Keriso, ia faasusulu atu mea lilo ia, e ala i meaalofo a le Agaga, ia faasusulu atu i le lalolagi ma tagata uma, ona iloa ai lea ua avea i tatou ma Kerisiano moni.

GALUEGA FAATINO:

Faamatala mai i ou lava manatu ma lagona le uiga o upu nei:-

- 1) Agamalu
- 2) Loto mama
- 3) Amitonu
- 4) Loto maualalo
- 5) Alofa
- 6) Filemu

E mafai ona galulue faatasi lau susuga i le faiaoga ma tamaiti. A maea, ona lau mai lea e le tamaitiiti lana galuega i luma o le vasega. E mafai foi ona vaevae le vasega i vaega e

lua pe tolu. Ona galulue mai ai lea i uiga o upu nei. Avea le taitai na te tolaulau maia vaega taitasi.

PESE: 259 (Pese ma Viiga)

A’OA’OGA:

1. E taua le faatino o mea ua a’oa’o mai ai e Iesu.
2. O mea lilo o le malo o le Atua, o lo o i totonu o le loto.
3. O le finagalo o le Alii, o lo tatou ala lava lea i le malo o le Atua.

.....

MANATU TAIALA O AUKUSO:

FAIGAMALAGA I TOTONU O FAIGATA:

Tele ia o luitau ma faigata sa feagai ma le nuu o Isaraelu mai lava i lona tau faavaeina. O faigata e fesouaina ai le ola faaletino, ao le ola faale-agaga foi e tele ina leai se toamalie. A fua foi i le tala faasolopito o Isaraelu e pei ona faamatala i tusi o le Feagaiga Tuai, e luitauina pea le nuu i faigata ma puapuaga. E itiiti lava le taimi e faatumauina ai lo latou manuia.

O le mafutaga foi a Iesu ma le tagata ina ua afio mai o Ia i le lalolagi, na manino ai lava le saisaitia o le ola o le tagata ona o le tele o mea e tauave i le loto. O le fesili, aisea lava e tele ai ina faimalaga le tagata i totonu o faigata o le ola nei? E eseese lava faafitauli ma luitau e feagai ma tagata, ae tasi lava le mafuaaga o le tagata lava ia. Ae tasi foi, le ala e malaga ai le tagata i totonu o le filemu ma le manuia ua na o le Alii. O le malaga faaletino, e afatia lava i faigata faalenatura, a o le malaga faale-Agaga e afatia lava i faigata e tupu mai i le loto.

ASO SA: 2 AOKUSO 2020

MATAUPU: I TOTONU O FAIGATĀ

SINI: Ia a’oa’oina le fanau ia iloa e le na o le agasala o le tagata e oo mai ai puapuaga i le ola. O puapuagā ma tigā e luitauina ai foi le amiotonu o le tagata ma lona faatuatua.

TUSI FAITAU: Iopu 2: 13 - 22

FESOASOANI MO FAIAOGA:

O le tusi lenei a Iopu o lo o faamatalaina ai le matuitui o tigā na oo ia te ia. O se tala masani ua tatou faalogo so’o ai. Ae taua o lo o tatou faitau atili ai, e malamalama ai i le uiga tonu ma le mafuaaga na mafua ai ona oo mai puapuaga i le ola nei, ona o le agasala. Ae a fua ia Iopu, o ia o le tagata ua tauamiotonuina i luma o le Atua. O le tagata ua alofaina e le Alii. A o lea lava na feagai Iopu ma tigā sa iloga ona mafatia ai lona loto. O le aogā lea o lo tatou sailiili pea i le tusi lenei a Iopu.

E tolu vaega taua ua vaevaeina ai le tusi lenei a Iopu, e faamalamalama ai le uiga o puapuaga e oo mai i le ola nei.

1. Natura o le Atua

O le tusi lenei a Iopu o lo o tamauina ai le faatuatua o Iopu i le natura alofa ma le amiotonu o lona Atua, e ui ina leaga ma agasala le lalolagi. E ui e lei iloa ma malamalama Iopu i le finauga a le Atua ma satani i lona ola, ae na taunuu lava Iopu i le aotelega o ona manatu ma lagona, “o le Atua e tonu lava ma lelei.” O le feau lea mo ē o lo o fesiligaia pea le Atua ona o mea e tutupu mai i le ola nei.

2. Talitonu (Faatuatua)

Na ola Iopu i lona talitonu atoatoa i lona Atua, ae lē o mea na ia maua ma lona tamaoaiga. E le’i faalogo Iopu i upu faifai a ana uo ma lona toalua. O le talitonu atoatoa o Iopu i le Atua, o lo o faaupuina i le fuaiupu e 13: 15, “*E ui lava ina fasioti o ia ia te au, ou te faamoemoe pea ia te ia, ae peitai ou te faatonu atu ou ala i ona luma.*” E ui ina finau pea Iopu i lana amiotonu i luma o le Atua, ae na sauni pea o ia e oti ma lona loto talitonu pea i le Alii.

3. O le Pule Aoa o le Atua.

E ui ina faaumatia e satani mea uma sa ia Iopu ma faaoo tiga i le tino o Iopu, e le i mafai ona pa’i atu satani i le ola o Iopu. O le ola o le tagata e pule toatasi ai le Atua. O mea uma foi na faaumatia e satani, e mafai ona toe fausia e le Atua. O le tiapolo na te faaumatia, a o le Atua na te toe fausia. O le manatu o Iopu, o le oti o le taunuuga lea o ona tigā. E lei iloa ma malamalama Iopu e lē o le finagalo lea o le Atua. O le upu moni, na oo tigā ia Iopu ona o lana amiotonu. O tigā na oo ia Iopu, e leai, leai lava se tagata o le ola nei e mafai ona talia.

O le faaumatia ai o mea sa ia Iopu o lona tamaoaiga ma ona fale. O le feoti o lana fanau i le afi, o lona toalua ma ana uo ua mananao e oti o ia, o lona tino, ua lilofia i le ma’i papala, ua toe lava o le ola ua totoe mo Iopu. O totonu ia o tigā na nofo ai Iopu ma loimata, ma oo ai ina finau atu lona loto i le Atua.

O totonu o tigā ia o Iopu, na tofotofoina ai lona faatuatua ma lona talitonu atoatoa. O le manumalo ai o Iopu i ona tigā, na manumalo ai foi ma le Atua i le laua finauga ma satani. I totonu o tigā na toe faaeaina ma faasiliina ai le tamaoagia o Iopu ma mea na ia toe maua.

Ia tatou malamalama, po o le a lava lo tatou toaga e tatalo, o i le lotu, ma ola i se olaga lelei ma maua le manuia, e oo mai

lava puapuagā ma tigā. A o totonu o ia tigā o lo o taoto ai le moni o lo tatou faatuatua.

GALUEGA FAATINO: Faatino le tala (5 minute)

A’OA’OGA:

1. E tofotofoina i tatou i tigā o le ola nei.
2. E tofotofo e le Atua le tagata, ae tau faaosooso Satani.
3. E faaumatia e Satani, ae o le Atua e toe fausia.

.....

ASO SA: 9 AOKUSO 2020 (Aso Sa Tamā)

MATAUPU: UA GAGANA LE POTO

SINI: Ia malamalama le vasega, o le aoaiga a le tamā, o upu ia a le poto, ina ia teufatu i le loto o le fanau ona manuia lea o lona lumanai.

TUSI FAITAU: Faataoto 2: 1 - 9

FESOASOANI MO FAIAOGA:

O le poto na te tavavaeina ese mai le ola manuia mai le ola toilalo, o le amanaia mai le lē amanaia, o le ola mauoloa mai le mativa. O le poto o se mea e faalilolilo ona mana’o ai le tele o tagata, ae lē tutusa lona mauaina. O le poto na te liliuina le soona nunumi o mea o le olaga i ona tulaga lelei, o le lē mautonu i le toamalie ma le saogalemu. O le poto o le manatu autu lava lea o le tusi lenei a Faataoto. E tolu vaega ua vaevaeina ai le manatu autu o le tusi a Faataoto.

1. Poto ma le valea

O vaega ia e lua ua faamatalaina ai le eseese o tagata. E iloa le poto i le tagata ua loto atu i le finagalo o le Atua ma lona poto. A o le tagata valea ua tete’e atu i le finagalo o le Atua ma upu a le poto. O le tusi lenei a Faataoto o lo o aumai manino ai le eseese o le tagata ua maua le poto ma iloa ola i le malo o le Atua, ma le tagata e ola ae aunoa ma le poto o le Atua. O le Atua o le faapogai lea o le poto.

2. O le poto a’oai atu

“Lou atalii e,” E 23 taimi o lo o taua ai le faaupuga lenei i totonu o le tusi a Faataoto. O se faaupuga o lo o aumai ai se tasi o vaega taua, o le tusi a Faataoto. O le va o matua ma fanau. O le aiga, o i o lo o taoto ai le matafaioi taua a matua, o le aoai lea o le fanau, ina ia iloa ma malamalama i ala o le Atua, ma ia avea ma fanau e ola matata’u i le Alii.

3. Aoaiga

O tagata ola uma e moomia le aoaiga. E le atoatoa se poto o le tagata, e moomia le aoaiga ina ia poto ai. Aemaise lava i le fanau. E lua ituaiga aoaiga o lo o aumai e le Faataoto. (i) O le aoaiga a matua i fanau. (ii) O le aoaiga mo le tagata ua le savali i taiala o le ola ua uma ona faasino mai e le Atua.

O le mataupu e 2 o le tusi a Faataoto, e tutusa lava ma le tele o mataupu o le tusi lenei. O lo o aumai ai le natura o le ola e ala lea i le va o le tamā i lona atalii. Ua sauni le atalii e ulufale atu i le suiga tele o lona olaga o le avea ai lea ma tagata matua. O le a taoto foi ana filifiliga fai mo mea o le olaga nei ia te ia lava. Lea ua aoai atu le poto, ma o upu a le poto, ia avea lea ma oloa taua ia teufatu i lona loto.

O le mataupu mo le Aso Sa lenei, “Ua gagana le poto.” O lo o faamatalaina ai le aoaiga lelei, e ao ona aoai ai e le tamā lona atalii. Ia aoai le tama e avea ma atalii e ava ma mata’u i le Atua. Ia loto atu lona ola i ala o le Atua. A tumau i le ola

lena, ona avea lea ma atalii potō. E leai lava se tamā e manao e ola valea sona atalii.

Ia aua foi nei mate le a’oaiga. E i ai taimi e tutupu ma malolosi ai le fanau. Ua maua mea ma tamaoaiga. Taimi faapea e amata ona fefe ai le aoaiga a matua. Ia malosi le aoaiga. Aua nei lulu e matua le matagi ae nei selesele ai e le fanau le afa.

O le aoaiga, o le faasino ala lea mo le manuia o fanau, ae ia faasino le fanau i le Atua. “Ua gagana le potō.” Ua talafeagai foi ma le Aso Sa lenei o tamā. E amata mai le manuia o aiga i tamā. Ia muamua ona mata’u le tamā i le Atua, ma savali i ala o le Alii, ona avea ai lea o le tamā ma potō, e aoai lana fanau i upu lelei.

GALUEGA FAATINO: Tusiga Tala

Tusi mai sau tala i se Ulutala ua e filifili i ai.

Ulutala:-

- (i) “E taua le potō”
- (ii) E mai fea le potō?”

Filifili le vasega i ulutala ia e lua, e tusi mai ai ni latou tala, e tailua parakalafa o le tala. E mafai ona ave i le fale pe a le uma (togi- 10)

PESE: 79 (Pese ma Viiga)

A’OA’OGA:

1. Ua gaana le potō e ala i matua.
2. O le aia tatau a fanau – O le faalogo ma usita’i i matua.

.....

ASO SA: 16 AOKUSO 2020

MATAUPU: O LE TUSI I LE EKALLESIA I LAOTIKAIA

SINI: Ia malamalama le vasega, i le mafuaaga na tusi atu ai Ioane i le Ekalesia i Laotikaia. Ia a’oa’oina foi tamaiti i le talaaga o le nuu o Laotikaia.

TUSI FAITAU: Fa’aaliga 3: 14 – 21

FESOASOANI MO FAIAOGA:

O Laotikaia o se tasi lea o Ekalesia e aofia i Ekalesia e 7 lea na tusi atu ai le Aposetolo o Ioane e pei ona faamauina e le tusi lenei o Fa’aaliga. O Laotikaia e i totonu o Asia Itiiti (Asia minor) o se tasi o malo na pulea e Roma ina ua tulai mai le malosi o le malo o Roma.

E fa lava mafuaaga na mafua ai ona taua Laotikaia ina ona po.

- 1) Sa iloga ona lauiloa Laotikaia i na ona po, ona o lona tamaoaiga. Na avea ma nofoaga tutotonu o faafetauaiga ma teugatupe a tagata mauoloa. E le i faalagolago Laotikaia i le malo o Roma pe aafia i ni mala faalenatura. I le tausaga e 61 TTM (Taimi Tuanai le Mesia) na aafia ai Laotikaia i se mauga mu ma sa iloga ona afaina ai le nuu. E lei tapa e Laotikaia se fesoasoani mai nisi malo. Na toe fausia lava mea na faaleagaina i le mala i le tamaoaiga o Laotikaia lava ia. Le tamaoaiga tele lea o Laotikaia ua avea ma o latou mitamitaga, ua latou manatu ifo ai, latou te lē toe manaomia foi le Atua.

2. Sa lauiloa foi Laotikaia i le gaosia o lavalava. O le fulu mamoe paauli veloveta na fai lea mo latou mitamitaga. E laei i ofu taugata e sili on moomoo ai tagata. Laei ia ua faamaualuga ai Laotikaia, ae ua galo ai lo latou lelavalava i le silafaga a le Atua.
3. Sa lauiloa foi Laotikaia ona o vailaau faafomai. Sa gaosia ai vailaau mo le fofoina o ma'i o mata ma taliga. Na oo lava ina faavaeina le a'oga faafoma'i i Laotikaia ma latou gaosia ai fualaau ma vailaau mo le soifua malōlōina o ona tagata. Na avea nei fualaau ma vailaau ma alaga tupe tele mo Laotikaia ina ua latou faatauina atu i nisi o Malo (export) . O le latou tamaoaiga ua maua mai i fualaau ma vailaau mo mata ma taliga, ua galo ai lo latou tauaso ma lo latou logonoa faaleagaga.
4. Sa avea Laotikaia ma nofoaga ua tele ina lolofi atu ai tagata Iutaia ma nonofo ai. O tagata maumea ma sa iloga ona tetele lafoga na latou totogiina mo le malumalu. Ua faatupulaia le aofai o tagata i totonu o Laotikaia ma ua atili ai ona siisii le maualuga o lo latou tamaoaiga e ala i le lafoga o le malumalu. Ae o le mea ua tupu, ua lē mafai ona totogi e Laotikaia lo latou aitalafu i le Atua.

O le tusi atu ai o Ioane i le Ekalesia i Laotikaia, o lo o faailoa atu ai e Ioane i le Ekalesia le sēsē o mea ua mitamita ma faamaualuga ai o latou loto. Ua sui tulaga le oa i le Atua. Ua faalagolago le Ekalesia i le tamaoaiga ma ua saili ai lo latou viiga ae galo ai le viiga o le Atua.

Ua matagofie o latou tino i lavalava taugata ma le mafanafana. Ua fialia o latou loto e laei i le matagofie o le lalolagi, ae ua galo ai le matagofie ma le mafanafana o le Alofa o le Atua.

O le faamalōlōina o ma'i o le tino e ala i vailaau ua le mafai ai ona malōlōina o latou loto, ma ua le lagonaina ai le finagalo o le Alii. O le tele foi o tupe ua latou maua i lafoga o le malumalu, o lafoga ia ua latou lafo mo i latou lava ma ua faatuputupu laia ai lava lo latou agasala.

“Faauta ou te tu i le faitotoa ma tu'itu'i atu.” O le tu'itu'i o le Alii i faitotoa o le Ekalesia e ao ona tatala e ulufale ai le Alii, ona malamalama lea i le faamaoni o Keriso. Aua nei ola femoumoua'i Laotikaia i luma o le Alii.

GALUEGA FAATINO: Faamatala le uiga

Faamatala mai po o le a le uiga o faaupuga nei.

1. “E te le maalili pe vevela”
2. “Tauaso faale-Agaga”
3. “Logonoa faale-Agaga”
4. “Latou te le toe manaomia le Atua.”
5. “Le lavalava i le silafaga a le Atua”

PESE: 160

A'OA'OGA:

1. Ia faatulaga le ola i mea ua finagalo ai le Alii.
2. E silisili le matagofie o le Alii i mea uma o le ola nei.

.....

ASO SA: 23 AOKUSO 2020

MATAUPU: O FANAU I TATOU A LE ATUA

SINI: Ia malamalama le vasega, o e ua tauamionuina i le faatuatua, ua avea i latou ma fanau a le Atua i la le Agaga.

TUSI FAITAU: Roma 8: 9 – 17

FESOASOANI MO FAIAOGA:

O le ola i la le tino, o le tulaga tonu lea o lo o tatou i ai i le taimi nei. O mea tatou te mananao i ai ma mea tatou te moomia o mea faitino ia o lo o siosiomia ai i tatou ma e fetai ai pea ma la tatou vaai. A tatou maua mea ia, ona faamalieina lea o o tatou loto. Ae a vaivai le tino, ma oo ai ina vaivai lo tatou ola galulue ma le ola tauivi, ona tatou le maua lea o mea tatou te manana'o ai ma moomia, ona tatou nofo pologa lea i o tatou mo'omo'oga ma manao.

A tatou nofo pologa ona o mo'omo'oga ma manaoga faivavale, ona avea ai lea o i tatou ma fanau a le agasala. O le tusi atu o le Aposetolo o Paulo i le Ekalesia i Roma, o lo o faamalamalama ai e le Aposetolo tulaga o le avea ai ma fanau a le Atua i la le Agaga. O le ola ai i la le tino, e mafua lea ina ua tatou maua mea sa tatou manana'o ai ma mo'omo'oga ua taunuu. A o le ola ai i la le Agaga, e maua lea ina ua taumionuina le tagata e ala i le faatuatua. E ao ona iloa ma malamalama le tagata, o mea uma e manao ai, o lo o faasoaso mai pea e le Atua mo ia i aso uma, ae a mana'o tele loa, ona tuinanau vale lea ma tupu ai le ola soona fai ma i'u ai ina oti i la le tino. O le natura masani lava o le ola nei, a maua ua fiafia, ae a leai ona faanoanoa lea.

E le faapena le tagata ua ola i la le Agaga. O le Agaga o le Atua, ua avea lava lea ma Tamā mo i tatou, e pei ona avea ai ma Tamā o Keriso. O le avea ai o i tatou ma fanau a le Atua,

e maua lea ina ua tatou savavali ma usita'i ia Keriso ma ua tatou talia o ia ma le loto faamaoni. O le avea ai foi ma fanau a le Atua, ua avea foi i tatou ma ona sulii moni i le malo o i le lagi.

O mea uma lava tatou te ole atu ai i le Tamā, e foa'i mai lava e Ia ona o lona Alofa. E oo lava i mea faaletino tatou te manana'o ai e faia lava e Ia. Ae ia tatou malamalama, e sili ona nuanau le tamā e fafaga lana fanau i meaai faale-Agaga, auā a malosi le agaga ona malosi ai foi lea o le tino, e ala i le mafaufau lelei ma le loto lelei. “Auā o i latou uma ua ta'ita'iina e le Agaga o le Atua, o atalii i latou o le Atua.”

GALUEGA FAATINO:

E lua vaega ua vaevae ai le galuega faatino.

- i) Mea faaletino
- ii) Mea faale-Agaga

Lisi mai e le fanau ni vaega se 6 o le ola faaletino, e sili ona naunau ai le tagata (faataitaiga)

Mea Faaletino (i) tamaoiga

Ia faapena foi ni vaega se 6 o le ola faale-Agaga e ao ona naunau ai le tagata (faataitaiga)

Mea faale-Agaga (i) Alofa

A maea ona feauaua'i lea o tamaitai e lau mai a latou lisi i luma o le vasega.

PESE: “Aperaamo tamā”

A'OA'OGA

1. A malosi lo tatou ola faale-Agaga e manuia lo tatou ola faaletino.

2. O fanau i tatou a le Atua, ina ua tatou savavali i ala o Keriso.

.....

ASO SA: 30 AOKUSO 2020

MATAUPU: O FEAGAIGA E LUA

SINI: Ia malamalama le vasega i le eseese o feagaiga e 2 ia o lo o taua i le mataupu e 4 o le tusi lenei a Kalatia. O le Feagaiga i le Tulafono ma le Feagaiga i le Alofa. (Covenant of the Law and The Covenant of Love)

TUSI FAITAU: Kalatia 4: 21 - 31

FESOASOANI MO FAIAOGA:

“O le faaletino ma le faale-Agaga.” O vaega lava nei e 2 o lo o tele ina faamamafa i a’oa’oga a Paulo i ana tusitusiga. O le ‘faaletino’ ua faasino lea i le tulafono, a o le faale-Agaga ua faatusa i le faatuatua. E foliga mai o loo agai foi le feagaiga ia e lua i le tulaga lea. “O le feagaiga o le tulafono ma le feagaiga o le Alofa.”

Sei tatou agai muamua i le “Feagaiga o le Tulafono” (The Covenant of the Law).

O le feagaiga o le Tulafono, ua faasino lea ia Akara ma Isamaeli ma le feagaiga na osia ma le Atua. O Isamaeli o le atalii o Aperaaamo ia Akara le auauna fafine a Sarai. O le feagaiga o le tulafono, o lo o faatusa lea i le matai ma lana auauna. E nofo ma ola le auauna i faamalumaluga o tulafono a le matai. A soli e le auauna tulafono o le pologa ona sala lea. E faavae tulafono ia ona o le ola faaletino o le tagata.

O le ‘Feagaiga o le Alofa’ (Covenant of Love), o loo faasino lea ia Sarai ma tama o Isaako. O Isaako, o le atalii foi o Aperaaamo i lona toalua o Sarai. O le feagaiga o le Alofa, o lo o faatusa lea i le tamā ma lona atalii. E leai ni tulafono e ola ai le atalii, ae o le naunautaiga o le tamā, ia savali le atalii i mea ua aoa’i ma faatonu ai e le tamā, auā lona ola manuia. A le usita’i le atalii, e le faasalaina pe fasioti. O le feagaiga lea, e toe aumai ai le tala i le uii faamaumau oa ma lona tamā. E lua lava vaega o le ola, o lo o faamamafa i tusitusiga a le Aposetolo o Paulo, o le faaletino ma le faale-Agaga (Flesh and Spirit). O le faaletino, o lo o tulaia ai galuega faaletagata, a o le faale-Agaga o lo o taoto ai le talitonuga atoatoa ma le faatuatua o le tagata.

O galuega faaletagata e maua le manuia faale tino, ae le faaolaina ai le tagata. O le mafuaaga lea na faavae ai le feagaiga o le tulafono’ ia ‘aua nei agasala le tagata e ala i lona ola faaletino. O le faatuatua i la le Agaga, o le manuia faale-Agaga mo le tagata e faalogo ma savali i ala ua uma ona faasino mai e le Atua. O le manuia faale-Agaga lea e ala i le faaolataga ua maea ona saunia e le Atua e ala ia Iesu Keriso.

O mea lava ia o lo o apoapoi atu ai Paulo i le Ekalesia i Kalatia. E lē faaolaina se tagata i le’feagaiga o le tulafono,’ auā o le feagaiga o le nofo pologa. A o le ‘feagaiga o le Alofa,’ o le feagaiga lea o le saolotoga mo le tagata ma le agasala. Lea na faatino e Iesu Keriso i luga o le satauro. Lea ua avea ai i tatou, ‘O le Feagaiga Fou o le Alofa ma le Atua.’

GALUEGA FAATINO: Taliga Fesili

Tali mai i fesili nei:

1. O ai Akara?

Tali: O le auauna fafine a Sarai

2. O ai le igoa o le atalii o Aperaaamo iā Akara?

Tali: O Isamaeli

3. O ai tagata e tupuga mai iā Isamaeli?

Tali: O tagata Arapi.

4. O ai Isaako?

Tali: O le atalii o Aperaaamo iā Sarai

5. O ai tagata na tupuga mai iā Isaako?

Tali: O Tagata Eperu

6. O le a le uiga o le ‘Feagaiga o le Tulafono’?

Tali: Feagaiga o le pologa

7. ‘Feagaiga o le Alofa,’ o le a lona uiga?

Tali: Feagaiga o le saolotoga

- Faatino le tala i le uii faamaumau oa (5 minute)

A’OA’OGA:

1. O i tatou o le feagaiga o le Alofa.

2. O matua o feagaiga ia a le fanau.

3. O fanau o feagaiga ia a matua.

.....

MANATU TAIALA O SETEMA MA OKETOPA:

O LE ATUA GALUE

O le manatu taiala o Setema, ia faailoa i tamaiti o le Atua sa galue mo le faia o le foafoaga, ma o lo o galue pea e oo mai le taimi nei mo lo tatou lelei. Ua tuuina mai i tatou i le lalolagi e tatou te galulue faapaaga ma Ia, ina ia tumau le lelei o mea uma. O le taunuuga o le ola galue, o lo tatou malologa lelei faatasi ma le Atua.

ASO SA: 6 SETEMA 2020

MATAUPU: E TE ‘AI FOI AU MEA E AI MA LE AFU O OU MATA

SINI: Ia malamalama le vasega, o le ai ma le afu o ou mata, ua mafua ona o le lē usitai o le tagata i le Atua.

TUSI FAITAU: Kenese 3: 17 – 19

FESOASOANI MO FAIAOGA:

Fai mai le Kenese 2: 15 & 16. Ua ave foi le tagata, e le Alii le Atua, ma ua tu’u ia te ia i le faatoaga i Etena e galue ai ma leoleo ai. Ua fetalai atu foi le Alii le Atua i le tagata, o lo o faapea atu,”O laau uma o i le faatoaga e te ‘ai ai. A o le laau e iloa ai le lelei ma le leaga, ‘aua e te ai ai, aua o le aso e te ‘ai ai e te oti ai lava.”

Peitai, i le tatou mataupu i lenei taeao Kenese 3 fuaiupu 17 – 19. Ua fetalai ai le Atua ia Atamu, “Ua e usiusita’i i le upu a lau ava, ma ua e ai i le laau na ou fai atu ia te oe, ua faapea atu, e ‘aua e te ai ai, o le mea lea ua malaia ai le laueleele ona o oe, e te ai ai ma le tiga i aso uma o lou ola, e tutupu mai ai laau tuitui ma laau talatala ia te oe, e te ‘ai foi i laau afu o le fanua; e te ‘ai foi au mea e ‘ai ma le afu ou mata, se ia e toe

foi atu i le eleele, auā na faiina ai lava oe, aua o le efuefu oe, e te toe foi atu lava i le efuefu.

Ioe, ua mavae atu aso lelei ma le ola saoloto i mea uma o le foafoaga mo le tagata, e pei ona fuafuaina e le Atua. Ina ua lē usiusita'i le tagata i le faatonuga a le Atua, ona taunuu ai lea o lana folafolaga i le tagata. O laau uma o le faatoaga e te 'ai ai. A o le laau e iloa ai le lelei ma le leaga, 'aua e te 'ai ai, auā o le aso e te 'ai ai e te oti ai lava.

O le feau leo tele lea ua momoli mai e le Atua mo le tagata Ua malaia le laueleele ona o oe. O le faasalaga ua aafia ai mea uma mo le ola solo lelei ma le manuia saoloto o le tagata. Ua aafia le ola feso'otai o le tagata ma le eleele le ola feso'otai o le tagata ma meaola uma o le foafoaga, ma le feso'otaiga a le tagata ma le Atua, aemaise le ola o le tagata ua iu i le oti ma lona agaga ua toe foi atu i le Alii le Atua na ia faia mea uma.

O lona uiga ua leai lava se mea e maua ma le faigofie e le tagata. E oo lava i le fanau mai o le tagata i le lalolagi ua matua faigata lava. Ua fanau mai e le tinā ma le tiga lana tama. E le gata e lamatia le ola o le tinā a o le ola foi o le tamaitiiti e fia ulufale mai i le lalolagi. A o le mea lava e sili ona mafatia ai le tagata, o le galue malosi i aso uma o lona ola. Ina ia maua mea lelei e talafeagai mo le ola manuia mo ia ma lona aiga.

Ia iloa foi e le tagata, o le lalolagi o lo o ola ai ua faamalaiaina. E tatau ai i le tagata ona faalagolago ma faamoemoe ma faatuatua i le Atua ua na o Ia e maua ai le mafai e galue ai, e solo lelei ai lona ola i aso uma. E le faapea ua faamalaiaina le lalolagi, ona lafoa'i ai lea e le Atua, lana tagata ma mea uma na Ia faia. O le oo o le tagata i lenei tulaga, ua matua mutimutivale ai lona alofa tunoa, auā ua le oo atu le tagata i mea e manuia ai ma lona saolotoga faavavau, aemaise lava lona i ai faatasi ma lona mamalu. A ua fetalai foi le Atua i le tagata e pei ona faamanino i le Teuterenome 8 fuaiupu e 3 "E lē na o mea e ai e ola ai tagata a o mea uma e tulei mai i le fofoga o le Alii e ola ai tagata."

O lea foi na fa'aaoga e Iesu e tali atu i le faaosooso mai o le tiapolo ia te ia.

Ioe, le fanau o le uiga lea o le tatou mataupu i lenei taeao. Ua malaia le laueleele ma le lalolagi o lo o tatou ola ai. E tatau ai ona tatou filifili e galulue ina ia mafai ona tatou faia mea lelei mo lo tatou ola manuia. Ia manatua o lo o i ai faatasi le Atua ma i tatou i taimi uma, e tatou te galulue faatasi mo lo tatou manuia.

Ia filifiligā i le sailiga o le poto, ae sili ai ona outou naunau ia maua'a la outou fesootaiga vava lalata ma le Atua o le puna lena o le poto ma mea lelei uma, tou te maua ai le ola fiafia i aso uma. Ua fetalai mai lava Iesu, "Ia outou muai saili le malo o le Atua ma lana amiotonu, ona outou maua lea o le tamaoiga sili o lo o ia te Ia. O le ola galue sili lena o lo o finagalo ai le Atua. Ia manuia tele outou le fanau i le alofa o Iesu Keriso le Alii ma le Faola.

GALUEGA FAATINO:

Ia ta'u mai ni mea se lima ua aafia ai le ola solo manuia o le tagata.

1. ua malaia le laueleele
2. e 'ai ma le tiga
3. e te 'ai male afu au mea e ai
4. ua tutupu mai laau tuitui ma laau talatala
5. ua toe foi le tino o le tagata i le efuefu.

PESE: Pese ma Viiga 179

A'OA'OGA:

1. Ia galue ma faatuatua i le Atua.
2. E manuia le tagata galue.
3. O lo o galue le Atua e oo mai le taimi nei

ASO SA: 13 SETEMA 2020

MATAUPU: IA GALUE

SINI: Ia malamalama le vasega o le ola galue e finagalo i ai Iesu Keriso.

TUSI FAITAU: 2 Tesalonia 3: 6 – 13

FESOASOANI MO FAIAOGA:

Ia galue. O le upu faamamafa lea a le Aposetolo o Paulo i ana upu mulimuli i lana tusi lona lua i le Ekalesia i Tesalonia. Ua avea le folafola atu e Paulo o le toe Afio faalua mai o Iesu Keriso ma le aso o le Alii e vave ona oo mai i le Ekalesia i Tesalonia, ua fai ma ala ua lē galulue ai le toatele o tagata, a ua nofo fifilemu ma faatalitali i le toe Afio faalua mai o Iesu ma le oo mai o le aso o le Alii, e pei ona taua i le Mataupu e 4 ma le 5 o le tusi muamua a Paulo i le Ekalesia i Tesalonia.

Ua toe faamamafa e le Aposetolo o Paulo i le Ekalesia i Tesalonia. E le tatau ona tuua galuega faifai pea i aso uma, mo le ola solo lelei o tagata e lē na o le faatalitali i le toe Afio mai o Keriso. E oo mai lava le aso o le Alii, ae lelei pe a taunuu mai lea taimi, o lo o galulue pea ma le faatuatua.

Fai mai Paulo, o tagata uma ua latou lafoa'i a latou galuega ma tiute masani e tua i ai le ola manuia, ua taua i latou o tagata amio faatalanoa. Ua tuua le upu o le Tala Lelei a Keriso e pei ona a'oa'o atu ia te i latou. E tatau ona fa'aa'oa'o mai ia i matou, a'o matou ia te i latou. Matou te le'i aai fua foi se mea e tasi, a ua matou galulue i le galuega mamafa ma le tigā i le po ma le ao, ina nei mafatia so outou. O le fa'aa'oa'o ua avatu, ina ia outou faata'ita'i i ai.

Ioe, na galue foi Iesu i le faiva o le kamuta, na ia faia amo i ua o asini ma povi, ma faatau atu i tagata Iutaia, ua maua ai tupe ma tausi ai lona tina o Maria ma lona aiga. Sa matua galue ma le filifiliga i le galuega faaola mo le lalolagi. Na

faatoa maua lava lana malologa lelei, ina ua maea tapena le faaolataga mo tagata uma o le lalolagi.

Ina ia sagatonu mafaufau ma maua e tagata Tesalonia le loto fuatia ifo lelei, ua ta'u atu ai e Paulo o ia lava le faataitaiga lelei. O lona olaga atoa sa ia galue ai i ona lima, ia maua ai le manuia mo ia ma ona tagata sa manaomia lona alofa faasoa. O le faailoga o tagata Kerisiano o le fiafia e galulue e atiae mea lelei. O le tamā e le a'oa'oina lana fanau e galulue ma saili taleni e fa'aaogaina ai lo latou ola e atia'e mea lelei, ua ia a'oa'o atu lava lea o i latou e gaioi ma ola faalagolago i isi tagata i mea latou te manaomia.

Ia galue, aua o galuega e faamasinoina ai i tatou e le Atua. O le ola galue mo mea lelei, o le auala sili lea ona lelei ma leo tele e folafola atu ai le Tala Lelei. E tautala galuega lelei ma e manatua pea i le olaga atoa.

O le toaga ma filifiligā i le aoga, o le amataga lea o le olaga galue. Auā afai e manuia le aoga, ona maua lea o agavaa eseese, e mafai ona fa'aaogaina le ola i galuega e manuia ai i aso uma. A o le galue ma faalagolago ma faatuatua i le Atua, o le tagata sili lea ma manuia, ma maua le loto faamalieina i mea lelei.

E oo mai le aso o le toe Afio faalua mai o Keriso o le aso o le Alii, ona taunuu ai lea o le fetalaiga a le Alii, *“Le auauna lelei e, ma le galue faamaoni, ulufale maia i le fiafia o lou Alii.”* Aua o tatou galuega lelei e mulimuli mai ia i tatou. Ia galue o le finagalo lea o Iesu Keriso lo tatou Alii mo i tatou uma. Ia manuia tele outou le fanau.

Uiga o Upu:

- i) faatalanoa - ola i mea maua fua/ola faasamasamanoa
- ii) uputu'u - o upu tai ala/upu ma tgala mai anamua

GALUEGA FAATINO: Faamatalaina

Faamatala mai ni galuega o lo o faia e tagata o lou aiga mo le lelei o le aiga.

PESE: Pese ma Viiga 177

A’OA’OGA:

1. Ia fiafia e galue
2. Ia fa’aaoga lou ola mo galuega lelei
3. Aua le ola faatalanoa.

.....

ASO SA: 20 SETEMA 2020

MATAUPU: E TĀUA GALUEGA UMA

SINI: Ia malamalama le vasega, o tagata uma lava, e galulue mo le tau i o galuega ua faia.

TUSI FAITAU: Kenese 29: 15 – 27

FESOASOANI MO FAIAOGA:

O le tatou mataupu i leni taeao, e fia faailoa atu o galuega uma e i ai le tau i. Afai e lē tauia au galuega e le tagata o lo o faafaigaluegaina oe, ia e manatua, o lo o sisila mai fofoga o le Atua, o Ia lava e na te tauia mai galuega uma a tagata o lo o punonou ai.

O le tala na tatou faitauina Kenese 29: 15 – 29. Ua taunuu Iakopo i Patanarama, i lana solaaga mai ia Esau lona uso. Ua galue Iakopo i totonu o le aiga o Lapana le tuagane o lona tinā. Ona manatu lea o Lapana, e lē lelei ona galue Iakopo i

lona aiga e leai se tau i, auā ua lagona e Lapana e tataua ona umi se taimi e i ai Iakopo i lona aiga.

Ona fai atu lea o Lapana ia Iakopo e pei o le fuaiupu e 15, “A e auauna fua mai ea ia te a’u auā o oe, o lo’u uso? Ia e fai mai ia te a’u pe se a lou totogi. Ona fai atu ai le o Iakopo, “Ou te auauna ia te oe i tausaga e fitu ona Rasela lou afafine laitiiti.” Ona fai mai ai lea o Lapana, “E lelei ona ou avatu ai o ia ia te oe, a e leaga ona ou avatu i se isi tagata, ina ta nonofo ia ma a’u.

E fitu tausaga na galue ai Iakopo mo lona tau i, ina ia maua mai Rasela ia te faaipoipo. Fai mai le tala ua peiseai o nai aso itiiti i le manatu o Iakopo tausaga e fitu, ona o le naunau o lona loto ia Rasela e fai ma ona to’alua.

Peita’i, ua oo i le afiafi, ona ave ai lea e Lapana o lona afafine matua o Lea ia Iakopo, ae lē o Rasela. Ua oo i le taeao ona vaai atu lea o Iakopo o Lea. Ua fai atu o ia iā Lapana, “Se a leni mea ua e faia ia te a’u? Ou te le’i auauna ea ia te oe ona o Rasela? Se a foi le mea ua e faa’ole’ole mai ai ia te a’u? Ua tali sisio mai Lapana iā Iakopo, o le tu i lo matou nuu e muamua ona avatu le ulumatua, ona faatoa mulimuli lea ona avatu le itiiti.

Ia e toe auauna ma ia te a’u i le isi fitu tausaga, ona avatu ai foi lea ma Rasela. O le naunau lava o Iakopo ia Rasela e fai ma ana avā na ia auauna ai i galuega o le aiga o Lapana. Ua avatu e Lapana ia Iakopo lona afafine itiiti o Rasela e fai ma ana avā. O le tau i lava lea na mana’o ai Iakopo, mo ana galuega na faatino i le aiga o Lapana.

Fai mai ua sili ona alofa Iakopo ia Rasela nai lo Lea na mua’i fai ma ana avā, auā o le tau i lava lea na naunau i ai, na afua ai ona galue punoua’i i galuega uma i totonu o le aiga o Lapana. E ui ina fesuia’i e Lapana lona totogi, a e ua galue faamaoni, ina ia maua lava le tau i o lona galuega na ia naunau i ai. Ioe, e leai lava se galuega e le tauia.

E tusa lava pe lē amiotonu lē ua na faafaigaluegaina i tatou, i lona fesuia’i, pe leai foi se tau i mo tatou galuega, ae ia tatou iloa mautinoa, e tauia lava lo tatou tautigā e le Atua. Auā o

au galuega lelei e mulimuli mai lava ia te oe. Na matuā faamanuiaina e le Atua Iakopo, ona o lona faamaoni, ma le naunau o lona loto i le tauī mo ia. Na manuia ai foi ma Lapana ona o Iakopo ma ana galuega lelei na faatino i totonu o le aiga.

Le fanau, o le tauī sili lava mo tatou, o le naunau e atia'e mea lelei. O le ola a'oa'oina ina ia maua le potō ma le atamai, e mafai ona tatou taunuu ai, ina ua tatou galulue faamaoni i le a'oga i aso uma ma su'esu'e i mea aoga, e tauia mai lava e le Atua. O tamaiti faamaoni faapena, e tulai mai i tulaga maualuluga i totonu o galuega a le malo ma Ekalesia, ma o ni ta'ita'i e faamoemoe i ai tagata uma. Ia e manatua, o lou galue ma le faamaoni o le a le pine ona e maua o le tauī mai le Alii.

O Iesu Keriso, na Ia osia le Taulaga o le faaolataga, o le tauī lava lea mo i latou ua salamō ma faatuatua faamaoni iā te Ia.

GALUEGA FAATINO: Taliga Fesili

Tali mai i fesili nei:-

1. E fia tausaga na auauna ai Iakopo mo Rasela?
Tali: E sefulu fa tausaga
2. Aisea na filifilia ai e Iakopo Rasela?
Tali: O Rasela e lalelei le tino, ua lelei foi ma ona mata.
3. Aisea na fesuia'i ai e Lapana le tauī mo Iakopo?
Tali: E le faapea le tu i lo matou nuu, e mua'i avatu le itiiti ae mulimuli le matua.
4. O le a le manatu o Iakopo e toe auauna ia Lapana mo le isi fitu tausaga mo Rasela?
Tali: E leai se manatu, e faigofie ia Iakopo, aua ua naunau tele lona loto ia Rasela e fai ma ana ava.

PESE: Pese & Viiga 177

A'OA'OGA:

1. Galue faamaoni e maua lava lou tauī.
2. Galue ma le faatuatua, e tauī mai e le Atua au galuega.
3. Galue mo le lelei o le isi tagata.

.....

ASO SA: 27 SETEMA 2020

MATAUPU: O LE FAAILOGA O LE FAATUATUA O LE GALUE

SINI: Ia malamalama le vasega, o galuega lelei e faatino o le faailoga lea o le faatuatua e ola.

TUSI FAITAU: Iakopo 2: 14 - 20

FESOASOANI MO FAIAOGA:

O le tatou mataupu i lenei Aso Sa, o lo o faamamafa mai ai e le Aposetolo o Iakopo i le vaega o le tatou tusi faitau, o galuega lelei uma o le fua faatatau lena o le faatuatua ola. Fai mai Iakopo o le faatuatua nofonofo, e leai ni galuega, o le faatuatua mate lena. O galuega lelei e tautiga ai, e faailoa atu ai le ituaiga faatuatua o i totonu o le tagata. O le uiga o le faatuatua e pei ona faamauina i le tusi a le au Eperu 11: 1. O le faalagolago lea i mea ua faamoemoe i ai, o le mautinoa lea o mea e lē o vaaia. O le faamoemoe o tagata uma o le Atua lea, e faalagolago i ai, e na te faaosofia le loto, e unaina galuega lelei ia faatino. O le faatuatua foi, e iloa tino ai mea e le o vaaia i ona mata i le taimi nei, a ua i ai le talitonu mautinoa, e na te vaaia ma taunuu i ai i le lumanai.

O le mea lea tatou te iloa ai tagata faatuatua, e fialia ma galulue e faatupu mea lelei. O lo o tatou molimauina i tagata lolotu o le Ekalesia EFKS, lo latou naunau e galulue mo mea sili ina ia atia'e ai le galuega a Iesu i le lalolagi. Tigā le mativa ma le lima vaivai, a o le faatuatua ua ola a'e i le loto, e fai ai ma latou mea fialia le atia'e mea lelei mo le galuega a Iesu. O le tagata tatalo ua fialia i le ola mafuta ma le Atua. E pei ona fai mai le Perofeta o Isaia (Isaia 40: 29). Na te avatua le malosi i e vaivai, a o e leai se malosi, e na te faatupu tele i ai le malosi.

O le manatu o le Aposetolo o Iakopo, o le faatuatua nofonofo, e lē lava lea, e mafai ai ona taunuu i le ola faavavau. O le faatuatua ma tatalo, e faaosofia le loto e galue e atia'e mea lelei mo le manuia o isi tagata ma le galuega a Iesu i le lalolagi, o le ala tonu lea e tau atu i manuia e faavavau.

O le faatuatua ma galue punoua'i mo mea lelei, o le faailoga o le tagata ua maua'a le nofoaga o le Agaga Paia i le loto. Ua i ai le malosi e filifiliga ai mo galuega lelei uma, e tusa po o a mea faigata e faalavelave mai, ua lagona le loto fuatia ifo lelei e galue ai pea. Ua faigofie mea uma, auā ua mautinoa le tino mai o mea ua vaai mamao atu i ai.

Le fanau e, o le uiga lea o le tatou mataupu i lenei Aso Sa. Po o le a le faigata o le sailiga o le poto, e maua pea le malosi e tauivi ai, auā ua ia i tatou le faatuatua e faalagolago atoa ai i le Agaga Paia o Iesu Keriso, o le na te matua fa'aatoatoa mai lona mana, ina ia taunuu o tatou faamoemoega i le manuia i le lumanai.

O Iesu Keriso, o lona faatuatua ua molimau lava le galuega o le faaolataga na ia tauivi ai. Ua taunuu i le faaolaina o tagata faatuatua uma o le lalolagi.

GALUEGA FAATINO: Faamatalaga

Faamatala mai ni au lava upu, se galuega lelei o e faia i lou aiga po o le Ekalesia e iloa ai lou faatuatua galue.

PESE: Pese ma Viiga 180

A'OA'OGA:

1. Ia faatuatua ma galue.
2. E mafai mea uma i le faatuatua.
3. Ia fai ma au mea fialia le galue.

.....
OKETOPA:

ASO SA: 4 OKETOPA 2020 Tapenaga mo le Lotu Tamaiti

ASO SA: 11 OKETOPA 2020 Lotu Tamaiti

ASO SA: 18 OKETOPA 2020 Malologa Lotu Tamaiti

.....
ASO SA: 25 OKETOPA 2020

MATAUPU: O ARETO E LIMA MA I'A ITI E LUA

SINI: Ia malamalama le vasega, e i ai foi lo latou sao i le galuega faaola o le Tala Lelei.

TUSI FAITAU: Ioane 6: 8 – 14

FESOASOANI MO FAIAOGA:

O le tala lenei i le vavega na faia e Iesu na fafagaina ai le 5,000 o tagata, na fa'aogaina ai areto karite e lima ma nai ia iti e lua lau. O le meaai a le tamaitiiti na tapena e lona tinā, ina nei fia ai, a'o faalogologo i a'oa'oga ma vavega ofoofogia o le Alofa Tunoa o le Atua, ua faia e Iesu. E leai ni tala tele

ua maua mai i le Tusi Paia e uiga i lenei tamaitiiti, a o ai foi lona igoa. Pau le mea ua tatou iloa, o lana meaai na alu atu ma ia, na fa'aaoga e Iesu, e fafaga ai tagata le 5,000 ua fia aai. A o lona sao taua lea i le galuega o le faaolataga na tapena ma saunia e Iesu.

O le mea ua tatou iloa, po'o fea lava e tala'iina i ai le Tala Lelei e auga tupulaga foi i latou e faalogologo i ai, e tala'iina ai foi lava le tamaitiiti ma lona sao i le galuega faaola a Iesu Keriso.

E i ai le manatu na i ai foi isi tagata na o atu ma a latou meaai, peitai e leai se tasi na i ai le agaga lea, na i ai i le tamaitiiti, o le ofo atu o lana meaai e faitalia Iesu ma ana gaoioiga e fafaga ai le motu o tagata ua fia aai.

Fai mai ua tepa a'e fofoga o Iesu, ua silasila atu foi ua mulimuli mai pea le motu o tagata ia te Ia. Ua manatu ai, ua fia aai auā ua leva le aso. Ona fesili atu lea, ia Filipino, ua tali mai, e leai se faamoemoe e mafai ona tofu tagata e toatele i ni meaai e faatau mai i le 200 tenari.

Ua faalogo atu i ai Aneterea, ona fai atu lea ia Iesu, o lo o iinei le tamaitiiti ma ana areto karite e lima, ma nai i'a iti e lua lau, ae auma ea ia mea ia i latou e toatele? Ua manatu Aneterea, ua ia iloa le mea e tatau ona fai. O le ave o le tamaitiiti ia Iesu, ma faailoa i ai lana meaai o areto karite e lima ma nai i'a iti e lua lau, ua ia faatuatua lava Iesu, na te faia se galuega ofoofogia i lenei meaai faatauvaa.

Na ona oo atu lava o le tamaitiiti ma lana meaai, faatonu loa e Iesu ona so'o, ia fai atu ia taoto tagata i le mutia. Ona tago lea o Iesu i le meaai, ua tepa ae ona fofoga i le lagi ua faafetai. Ua tufatufa atu ua aai ai tagata e 5,000. Ua 'ai ai foi ma le tamaitiiti e ona le meaai. Ua maona, a ua totoe pea toe aiga.

Ioe, tamaiti e fa'aaoga e Iesu tagata uma i Lana Tala Lelei o le faaolataga. O le fa'aaoga e Iesu o le meaai a lenei tamaitiiti, na mafai ai ona faia le vavega ofoofogia i le fafagaina o le 5,000 tagata. Na vaaia ai foi e lenei tamaitiiti ma tagata e toatele le mamalu ma le silisili ese o le Atua.

Tatou o ia Iesu, ma ofo atu i ai o tatou loto ina ia mafai ona vaaia e tagata, le alofa ofoofogia, o le Atua i o tatou olaga. Ia fai so tatou sao i le galuega o le Tala Lelei a Iesu. Toaga i le lotu ma le a'oga Aso Sa. Fiafia e tatalo ona foa'iina mai lea e Iesu lona Agaga Paia e galue ia i tatou, ina ia vaaia le mamalu o le Atua i o tatou olaga.

O le soifua atoa o Iesu na ofoina atoa mai mo lo tatou faaolataga. Na maliu tigā i le satauro, na tanuia i le tuugamau. O lona toetu mamalu, ua ia faaolaina ai i tatou i le ola pea faavavau.

GALUEGA FAATINO: Faamatalaga

Faamatala mai i ni au lava upu le tamaitiiti ma lana meaai na ave e Iesu, ma sou lagona i le ituaiga tagata e i ai le tamaitiiti lenei.

PESE: Pese ma Viiga 130

A'OA'OGA:

1. Fai sou sao mo le Tala Lelei.
2. Alu ia Iesu ma 'ave i ai ou faafitauli.
3. Ia fiafia e faalogologo i tala ia Iesu.

.....

MANATU AOA NOHEMA: O MANUIA MAI LE ALOFA TUNOA

Ia iloa ma manino i mafaufau o tamaiti le mea moni e uiga i le Alofa Tunoa. O le Alofa Tunoa o le Atua, o lo o ola ma tutupu a'e ai tagata uma. E matuā matilatila lava le iloa lelei o le Alofa Tunoa i taimi e feagai ai tagata ma puapuaga ma mafatiaga o le ola. Afai e faasaoina le ola mai aafiaga matuiā, ona e iloa lelei lea o le Alofa Tunoa.

ASO SA: 1 NOVEMA 2020

MATAUPU: O MANUIA MAI LE ALOFA TUNOA.

SINI: Ia malamalama le vasega, o le Alofa Tunoa o lo o solo lelei ai lo tatou ola ma maua ai manuia mai le Atua.

TUSI FAITAU: Esoto 1: 15 – 21

FESOASOANI MO FAIAOGA:

O le tatou tusi faitau Esoto 1: 15 – 20 ua fai ma tatou mataupu i lenei Aso Sa, ua faatonu malosi mai ai e le tupu o Farao, fafine faatosaga e toalua o Sepela le igoa o le tasi, o le igoa foi o le tasi o Pu'a, ua faapea mai. Pe a oulua faatosaga i fanauga o fafine Eperu, a oo ina a fanau mai afai o se tama ia fasioti ia te ia, ae afai o se teine ia ola ia.

O tulafono lava a le lalolagi ia, e faatino ina ia faapologaina ai ma sauaina ai tagata vaivai ma le maualalo ma le lē taualoa, ae manuia atili ai i latou e taitai, ma e maualuluga ma tele le tamaoiga. E faia ia tulafono ina ia maua le pule ma le malosi faaletagata (power and authority).

O lo o ta'ua i le tatou tusi faitau le upu Eperu. O le upu Eperu o lona uiga o tagata feoa'i solo (nomad). O tagata e leai so latou faasinomaga. O lona uiga o tagata e leai ni eleele, ni fanua, ni aiga ma se atunuu e faasino tonu i ai. O tagata maualalo ma le le amanaiaina. I se isi faaupuga o tagata matitiva, e fai ma auauna a isi tagata. Ua taua ai tagata Isaraelu o le au Eperu (Hebrews).

Ua popole le tupu o Farao o Aikupito, ina ua faatuputeleina le faitau aofai o tagata Isaraelu. O le popolega o Farao ina

nei osofaia Aikupito e ona fili, ma 'au faatasi lea ma Isaraelu ona faatoilaloina lea o i latou.

O le mafuaaga lea o le faia o le tulafono, ma poloa'iina malosi ai fafine faatosaga i fanauga o fafine Eperu, e fasioti uma pepe tama tane e fananau mai ae faaola pepe teine. O fafine faatosaga e toalua o Sepela le igoa o le tasi, o le igoa foi o le tasi o Pua. Ua faalogo i laua i lenei poloagai a Farao, ona matata'u ai lea o i laua i le Atua. Aua ua la iloa o lo la valaauina mai le Atua, o le faaulufale mai o le tagata fou i le lalolagi e tutupu ma ola ai. E leai se avanoa mo i laua la te taofia ai se ola o se tagata e fanau mai i le lalolagi. O le luma ma le ola faiaina mo i laua pe afai ae oti se tagata fou ua fanau mai.

Ua le fefefe i laua ia Farao, a ua sili ona la matata'u i le Atua, o le puna o le ola ma le manuia. Ua aami mai e Farao o Sepela ma Pua ma fai atu ia te i laua; "Se a ea le mea ua oulua fai ai lenei mea ina ua oulua faaolaina tama tane?"

Ona foa'iina atu lea e le Atua le upu i gutu o Selepa ma Pua, ma la fai atu ia Farao, Aua e le pei o fafine o Aikupito o fafine Eperu, aua e malolosi lava i latou, ua uma ona latou fanau mai, a o le'i oo atu ai lava le faatosaga i fanauga.

Fai mai le tatou tusi faitau. Ua agalelei le Atua i nei fafine faatosaga ma ua ia fai ai aiga mo i laua.

Ioe, o le alofa tunoa o le Atua, e maua ai manuia e faamalieina ai i mea lelei uma. O lo tatou iloa o le alofa tunao o le Atua, tatou te matata'u ai ia te Ia, ma mafai ai ona tete'e atu i le leaga ae tatou fiafia e faatino mea lelei uma. Ona tatala lea e le Atua le lagi ma liligi ifo ona manuia mo i tatou uma.

O Iesu o le faailoga lea o le Alofa Tunoa o le Atua. Ua afio mai i le lalolagi ina ia lē fano se tasi e faatuatua ma mata'u ia te Ia, a ia maua le ola faavavau.

GALUEGA FAATINO: Faatinoga

Faatino le tala e le vasega.

PESE: Pese ma Viiga 70

A’OA’OGA:

1. Ia mata’u i le Atua o le puna o manuia.
2. Ia loto tele e faatino le alofa.
3. O le alofa tunoa o le Atua o lo o tatou ola ai.

.....

ASO SA: 8 NOVEMA 2020

MATAUPU: IA FAATUATUA I LE ALOFA TUNOA

SINI: Ia malamalama le vasega, o le alofa tunoa o le Atua, e ao ina tatou faatuatua i ai e faaolaina ai i tatou mai mea faigata uma.

TUSI FAITAU: 2 Korinito 12: 1 – 10

FESOASOANI MO FAIAOGA:

O le tatou mataupu i lenei Aso Sa, o lo o faamatalaina mai ai e le Aposetolo o Paulo le mea moni na tupu ia te ia, ma le vaaiga mai le Alii o Iesu, e faamalosi au ia te ia, a o feagai o ia ma faigata, ua faalavelaveina ai le galuega tala’i o le Tala Lelei i nu’u ese.

Na iloa e Paulo le vaaiga, ua musu e tautala i ai, ae na ona ia faamatogi mai mea ua ia vaaia. O le tagata o Keriso, ua sefulu fa tausaga talu ona segia i le lagi. O lona uiga o le tausaga 41 – 42 AD le taimi o le vaaiga lenei ae 14 tausaga talu le taimi na faasola ‘ese mai o ia mai Tamaseko, ina ua

lamalama Kovana o Areta le tupu e faaumatia lona ola (2 Korinito 11: 33). O le mau lea a le au su’esu’e o le Tusi Paia. O le lagi tuatolu i le talitonuga o Iutaia, o le afioaga o le Atua Soifua, e maua ai faamanuiaga uma e malie ai le loto ma le agaga.

Na segia foi Keriso i le parataiso. O le parataiso i le gagana Peresia o le park, o le Faatoaga: Etena (Garden of Eden) ae i le Feagaiga Fou o le nofoaga o le olioli, lea na leiloa i Etena i le amataga o le foafoaga ae na toe maua ona o Keriso, ua fai ma faasinomaga mo Kerisiano faatuatua uma. Na ia le manatu e tautala i le atoaga o le vaaiga, auā ua silafia e le Atua mea uma.

Na maua le Aposetolo i le ma’i, e le o iloa le ma’i na faataotolia ai Paulo, o lo o ia ta’ua o le tui a Satani ua faalavelaveina ai lana galuega folafola o le Tala Lelei. E atu tolu ona tatalo ia Iesu e ave ese lenei tui a satani ua faalavelaveina ai lona folafola atu o le Tala Lelei. Na afua ai ona faailoa mai e Iesu ia te ia le vaaiga e pei ona faamatalaina atu muamua. E le gata i lea a ua fetalai tuusao mai Keriso ia te ia e faapea:

O lo’u nei alofa tunoa e lava lea e fesoasoani ia te oe, auā o le vaivai e fa’aatoaina ai lo’u mana. Na lagona e le Aposetolo o Paulo lona faatauvaa i luma o Keriso ma tautino mai, “O lea ua tele ai lava lou fiafia i le mitamita i mea ua ou vaivai ai, ina ia tumau i ou luga le mana o Keriso, auā pe a ou vaivai ona malosai ai lea.

Ua iloa e Paulo le vaaiga na ia iloa e pei ona faamatalaina e uiga i le Keriso, o lona taunuuga manuia foi lea pe a ia matuā faatuatua i le mana o le alofa tunoa o Keriso.

Ioe, le fanau e, po’o a faigata ma puapuaga e oo mai, o ma’i, o le mativa, o le faigatā o mea a’oga, ma le tele o faafitauli tatou te fetaii, ua fetalai mai Iesu, o lo’u alofa tunoa e lava lea e fesoasoani ia i tatou, aua o puapuaga e oo mai ia i tatou e fa’aatoaina ai lona mana.

O Iesu Keriso na faatuatua i le alofa tunoa o le Atua lona Tama, na mafai ai ona atoatoa le faaolataga mo i tatou i le ola faavavau. Ia tatou faatuatua loa i le alofa tunoa o le Atua.

GALUEGA FAATINO:

Tau mai ni mea se lima o lo o e vaivai ai:-

- (i) i lou aiga
- (ii) i lau aoga
- (iii) i lau galuega

PESE: Pese ma Viiga 45

A'OA'OGA:

1. Ia faatuatua i le alofa tunoa o le Atua.
2. Aua le atuatuvaile pe a oo mai faigata o le olaga
3. Ia toaga i le tatalo.

.....

ASO SA: 15 NOVEMA 2020

MATAUPU: O LE MATAU I LE ATUA E
FAAOLAINA AI

SINI: Ia malamalama le vasega, o le mata'u i le Atua e faaolaina ai ma e taua ai foi latou o tagata popoto.

TUSI FAITAU: Iosua 6: 22 – 25

FESOASOANI MO FAIAOGA:

E muamua ona fia faatepa la tatou vasega i le mataupu e 2 o le tusi a Iosua, o lo o faamatala mai ai le mafuaaga, na afua ai ona faaolaina le fafine o Raava ma lona aiga atoa e le Atua.

I le Iosus 2 na auina atu ai Iosua, taulele'a e toalua, e asiasi e pei o ni sipai i le nuu o Ieriko, ina ua sauni Isaraelu e sopoia le vaitafe o Ioritana. Na iloa e tagata Ieriko, taulele'a nei e toalua, ona latou saili lea e fasioti ia te i laua. Peitai, o le fafine o Raava na lavea'i i nei taulele'a ina ua ia faalafi ma toe foi saogalemu ai ia Iosua ma Isaraelu. A o le'i toe foi taulele'a ia Iosua, na fai atu ai Raava i taulele'a ua faapea atu: Iosua 2: 8 – 14. Ua ou iloa ua foa'iina atu e le Alii le nuu ia te outou, ua oo mai lo outou mata'utia ia te i matou, ma ua faavaivaia ona o outou o i latou uma e nonofo i le nuu. Aua ua matou faalogo na faamateina e le Alii, le suasami o le sami ulaula ona o outou, ina ua outou o mai mai Aikupito, i le ma mea ua outou faia i tupu e toalua o sa Amori o Sekono ma Oko, o e sa i le la itu o Ioritana, na outou faaumatia i laua. Na matou faalogo i ia mea, ona liu suavai ai lea o matou loto, ua le toe i ai lava se malosi i se tagata auā o le Alii lo outou Atua, o le Atua ia i le lagi i luga ma le lalolagi i lalo nei. O lenei se i oulua tauto mai ia te au i le Alii, auā ua ou agalelei atu ia te oulua, ia oulua agalelei mai foi i le aiga o lo'u tama ma ia oulua tuu mai i ate au se faailoga faamaoni, ma ia outou faaolaina lo'u tamā, ma lou tinā, ma o'u tugane ma o'u uso ma i latou uma ua ia te i latou, ma ia lavea'iina i matou ia le oti.

Ona tali mai ai lea o ia taulele'a e toalua, o maua ola e sui ai ia te outou i le oti, pe afai tou te le ta'ua la maua nei feau. A oo ina foa'iina mai e le Alii le nuu ia te i matou, ona matou agalelei ai lea ma faamaoni ia te oe.

O le tatou mataupu o lenei Aso Sa Iosua 6: 22- 25, o lo o faamatalaina mai ai le faaolaina o Raava le fafine tali tane ma lona aiga atoa e Iosua ma Isaraelu. Ua faataamilo faafitu Isaraelu i le aai o Ieriko ma ili ai lea o pu e fitu o le iupeli,

faatasi ma le alalaga leo tetele o le nuu, ona solo ai lea i lalo o le pa malosi ma le maualuga na siomia ai le aai o Ieriko. Ua aea foi le aai, ona matua faaumatia ai lea e Isaraelu o tagata uma o Ieriko.

Ua fai atu foi Iosua i taulele'a e toalua na asiasi i le nuu, ina o atu i le fale o le fafine talitane, ma aumai le fafine, ma i latou uma ua ia te ia, e pei ona oulua tauto ai ia te ia. Ona o ai lea o taulele'a na asiasi le nuu, ma latou aumai ia Raava, ma lona tamā, ma lona tinā, ma ona tugane ma i latou uma na ia te ia. Ua aumai e i laua ona aiga uma, ma tuu atu ai i tua o le togalauapi o Isaraelu. A o le aai ma mea uma na i ai, ua faamuina e Isaraelu i le afi. Ua faaumatia le ola o tagata uma o Ieriko, a ua faaolaina Raava ma lona aiga atoa.

Ioe, o le faatuatua o lenei fafine o Raava i le mana o le alofa tunoa o le Atua, ua faaolaina ai o ia ma lona aiga. O le faailoga o le mata'u o lenei tinā i le Atua o Isaraelu o lo o faamauina i le Iosua 2: 11 “Na matou faalogo i ia mea ona liu suavai ai lea o matou loto, ua lē toe i ai se malosi i se tagata ona o outou, auā o le Alii lo outou Atua, o le Atua ia o le lagi i luga, ma le lalolagi i lalo nei.” Sei oulua tauto mai ia te au e tou te faaolaina a'u ma lo'u aiga uma.

Ona moni ai lea o fetalaiga a Iesu ia Toma – Ioane 20: 29, Amuia o e lē vaai mai, ae faatuatua mai pea. O Raava e le'i vaai i vavega o le alofa tunoa o le Atua i totonu o Aikupito ma le sami ulaula, a ua lava tala ua oo mai ia te ia i le matautia ma le ofoofogia, ua mata'u ai i le Atua ma faatuatua ai i le Atua.

Ou te talitonu foi, ana faapea tagata uma o Ieriko e pei o Raava e faaolaina foi i latou e le Atua, ma fai ai i latou ma tagata nuu o Isaraelu. Auā o le finagalo lea o le Atua ia Isaraelu o lona malamalama lea e pupula atu i le lalolagi atoa, ma i'u ina gauai ma avefa tagata uma ma nuu o le Atua, a ua fai le Atua ma le Atua e toatasi o le lalolagi atoa.

Le fanau e, o le mata'u i le Atua e faaolaina ai tagata uma. O le mana o le alofa tunoa o le Atua e maua ai lo tatou malosi e

tatou te matata'u ai ma faatuatua i lona alofa tunoa e faaolaina ai i tatou uma.

O Iesu Keriso lava ua Ia faamalosi'a'u mai ia i tatou, ina ia faalagolago ma faatuatua atu ia te Ia e faaolaina ai i tatou i le ola faavavau.

GALUEGA FAATINO: Faamatalaga

Faamatala mai ni au lava upu ou lagona pe mata e faaolaina tagata uma o Ieriko pe ana pei i latou o le tinā ia Raava.

PESE: Pese ma Viiga 98

A'OA'OGA:

1. Mata'u i le Atua e faaolaina ai.
2. E silisili 'ese le mana o galuega a le Atua.
3. Ia loto alofa i isi tagata e pei o Raava.

.....

ASO SA: 22 NOVEMA 2020

MATAUPU: O GALUEGA O LE ALOFA TUNOA

SINI: Ia malamalama le vasega, o galuega o le alofa tunoa o le Atua, na faatino e Iesu i lana galuega faaola mo tagata uma o le lalolagi.

TUSI FAITAU: Luka 7: 18 - 23

FESOASOANI MO FAIAOGA:

A o i ai Ioane le Papatiso i le falepuipui, e pei ona faamauina e Mataio 11: 2, na oo atu ai ia Ioane le logo e uiga i galuega o le alofa tunoa, ua faia e Iesu.

O le Luka 7: 18 – 23, ua fai ma tatou mataupu i lenei Aso Sa, ua oo atu ai so’o o Ioane le papatiso ma faamatala atu ia te ia galuega o le alofa tunoa o le Atua, ua faia e Iesu, e pei ona faamauina i le Luka 7: 1 - 17. Ua faamaloloina le ma’i o le auauna a le tasi ta’ita’i o le toaselau, ua toe faatuina mai le oti, le tama e toatasi a le fafine mai le aai o Naina, ma isi vavega e tele. Ua faailoa atu ia Ioane le papatiso nei mea, e lona au so’o ona ia aauina ai lea o lona au so’o e toalua ia Iesu. Ua faapea atu, Po o oe ea le maliu mai, pe matou te faatali atu i se tasi?

O le fesili, aisea lava ua toe fesili ai Ioane le papatiso? A o lea e faamauina e Mataio 3: 16 & 17 e faapea, Ua papatisoina e Ioane Iesu, ona maliu a’e lea o Ia nai le vai, faauta foi, ua fa’aavanoaina le lagi ia te ia, ua iloa atu foi le Agaga Paia o le Atua ua afio ifo e peiseai se lupe, ua oo i ona luga. Faauta foi, o le siufofoga mai le lagi, ua faapea mai, “O lo’u Atalii pele lena, ua ou fiafia lava ia te Ia.”

E lei lava ea ia faailoga e maua ai e Ioane le mautinoa, o Iesu lava le Mesia, na valoia, o lea ua afio mai i le lalolagi e pei ona folafola mai e auga Perofeta? Ua faalogo i galuega o le alofa tunoa, ua faailoa atu e ona so’o, ae le’i faamalieina ai lava Ioane le papatiso. Ua o mai ia so’o ia Iesu, ua faapea mai, Po o oe ea le maliu mai, pe matou te faatali atu i se tasi? E le’i faavaveavea ona tali e Iesu, le fesili a le au so’o e toalua o Ioane le papatiso. Fai mai le fuaiupu e 21 o le tatou tusi faitau. O lea lava itu aso ua faamalōlō e Ia tagata e toatele sa i ai ma’i, ma ma’i tigā, ma agaga leaga, ua foa’i atu foi ina ia vaai o e tauaso e toatele.

Na mae’a loa ona faia e Iesu galuega o le alofa tunoa a o vaavaai i ai so’o e toalua, ona faatoa liliu atu loa tali le fesili a Ioane le papatiso. Ona tali atu lea o Ia ia te i laua. “Ina o

atu ia oulua ma faailoa atu ia Ioane o mea ua oulua vaai i ai, ma faalogo i ai, ua pupula tauaso, ua savavali pipili, ua faamāmāina lepela, ua logo tutuli, ua faatutuina e na oti, ua folafolaina le Tala Lelei i ē matitiva. E manuia foi se le tausuai ia te au.” O le faafaigofieina o lenei fetalaiga a Iesu e faapea, Ia oulua fai atu ia Ioane ua oo mai le faaolataga i le lalolagi. O i latou uma e fia faaolaina ia te Ia, o mai uma, auā o Ia e maua ai le malologa lelei mo latou agaga. Ua taunuu valoaga a le au Perofeta, ma ua oo mai tausaga ua finagalo malie mai ai le Atua i ona tagata i le lalolagi. Ua faia e Iesu vavega ofoofogia, o galuega o le alofa tunoa mo i latou uma na sulufa’i atu i ai i faigata uma, na faamalōlō e le Alofa Tunoa. E manuia foi tagata uma latou te faalogo ma talitonu, ma o mai loa i le Faaolataga ua afio mai i le lalolagi.

O le tatou mataupu lena i lenei taeao. O Iesu o le Alofa Tunoa o le Atua mo le lalolagi. O le faailoga ua finagalo malie mai le Atua, ina ia faaolaina tagata uma ia Iesu lona Alofa Tunoa.

Ia ‘aua lava ne’i tatou fesiligia le galuega a le Alofa Tunoa, na tigaina ai lo tatou Alii o Iesu Keriso le Faola. Auā e leai lava se malosi o i le lalolagi e tatou te maua mai ai le filemu, ma le malologa lelei mo tatou agaga mafatia ma puapuagatia. Ua na o Iesu Keriso lava, le Alofa Tunoa o le Atua e tatou te taunuu manuia ai i lona malologa lelei. O Iesu Keriso i lona faasatauroina, o galuega o lona Alofa Tunoa, ua faamagaloina ai a tatou agasala ma ua finagalo malie mai ai le Atua, ina ia faaolaina tagata uma o e faatuatua moni ma fia mafuta ma ia e faavavau. O galuega ia o le Alofa Tunoa o le Atua.

GALUEGA FAATINO: Faamatalaga

Faamatala mai i au lava upu sou lagona i le uiga o le fesili na fesili ai Ioane le papatiso ia Iesu, pe o Ia le ua Afio mai, pe latou te faatali i se isi tagata?

PESE: Pese ma Viiga 8

A’OA’OGA:

1. Aua le fesiligia le Alofa Tunoa o le Atua.
2. Ia e talitonu i le Alofa Tunoa o le Atua.
3. O le Alofa Tunoa o le Atua o lo o tatou ola ai.

.....

ASO SA: 29 NOVEMA 2020

MATAUPU: O LE FAASOA ALOFA

SINI: Ia malamalama le vasega, o le faasoa alofa, o le faasoa e tonu i le silasila a le Atua.

TUSI FAITAU: 1 Samuelu 30: 20 - 25

FESOASOANI MO FAIAOGA:

O le tatou tusi faitau o lenei Aso Sa 1 Samuelu 30: 20 – 25, o lo o faamatala mai ai le faasoa alofa a Tavita, o mea na maua mai, e ta’ua o le vete mai le itu a Ameleka.

Ua foi mai Tavita ma ona tagata na o atu e fia ‘au faatasi ma Filisitia i le taua ma Isaraelu. Ae foi mai, ua faamuina le aai o Sekeleka o le nuu o Filisitia sa nonofo ai Tavita ma ona tagata e tagata Ameleka.

Fai mai le 1 Sasmuelu 30: 3: Ua oo atu Tavita ma ona tagata i le aai, faauta, ua mu i le afi, ao a latou avā, ma o latou atalii, ma o latou afafine atoa ma e matutua, e le’i fasiotia a ua avea i latou ma latou ō.

Ona ofu ai lea o Tavita i le efota, ona fesili ai lea o ia i le Alii, pe ou te tuliloa i lenei au a Ameleka? Ou te maua atu ea

ia te i latou? Ona fetalai mai lea o le Alii ia Tavita; Tuliloa ia, auā e te maua atu ai lava, ma e maua mai lava mea uma.

O le tatou mataupu la o lenei taeao, e pei ona faailoa muamua atu, o le faasoa a Tavita i le tamaoiga e ta’ua o le vete na maua mai i le itu taua a Ameleka. O le vete o lona uiga, o le tamaoiga o le itu taua, ua faatoilaloina e le isi itu taua. O oloa e aofia ai tupe, auro, ario, o lafumu mamoe ma povi, ma isi mea, o mea totino a le itu taua ua faiaina, ua avea e le itu taua manumalo.

Fai mai le fuaiupu 9 & 10, e toaono selau na ia Tavita, o le a o atu e tau le taua ma Ameleka ina ia toe faasaoina mai ona tagata. Peitai, e toalua selau tagata na faavaivai, na lē mafai ona ō ma Tavita, ona ua le lavavā, ia pe palaai foi. Ua o ai Tavita ma tagata e faselau e tuliloa ia Ameleka.

Ua foi mai Tavita ma le toa faselau, ma le oloa tele o le vete faatasi ai ma tagata uma ma mea uma na ave e Ameleka, e leai ma se mea na leiloa, e pei o le fetalaiga a le Alii le Atua ia Tavita. Ua faafetaia’i, e tagata e lua selau na le lava ona o ma Tavita, sa nonofo i le alia o Pesora, ua latalata atu ia i le nu’u, ona alofa atu lea o ia ia te i latou. Peitai, ua fai mai nisi o tagata fa selau na o ma Tavita e tuliloa Ameleka, ē agaleaga, manatu faapito ma tagata ulavavale, ua faapea atu, ona ua lē o i latou ma i tatou, o le mea lea tatou te lē avatu ai ia te i latou ni vete na matou fao mai, na ona taitasi ma ta’ita’i atu lana avā ma lana fanau ma ia latou ō.

Ona manatua ai lea e Tavita le fetalaiga a le Alii le Atua ia te ia, 1 Samuelu 30: 8, ona fesili lea o Tavita i le Alii, ua faapea atu; Ou te tuliloa i lenei au? Ou te maua atu ea ia te i latou? Ona fetalai mai lea o le Alii ia te ia, Tuliloa ia, auā e te maua atu ai lava, ma e maua mai ai mea uma.

Ua faamanatu atu e Tavita i ona tagata na latou o, o le tamaoiga o le vete tele ua maua mai, o faamanuiga a le Atua. Aua na Ia tauina le taua mo i latou, ua toe maua ai tagata uma ma mea uma na ave e Amaleka, atoa ai ma le tamaoiga tele o le vete.

Ona fai atu ai lea o Tavita, Ou uso e, ‘aua le faapea ona fai i mea ua foai mai e le Alii ia te i tatou, ma tuuina mai i o tatou lima le ‘au na o mai ia te i tatou. O ai foi se faalogo ia te outou i lenei mea? Auā e tutusa le vaegaoa o le na alu ifo i le taua, ma le na faamuli i oa, e faagatasi lava o latou vaegaoa. Na afua mai lea aso, ua faatuina lenei faasoa e fai ma tulafono i Isaraelu.

Ioe, o le faasoa e fua i le alofa tunoa faasoa mai o le Atua. E te alofa ai i lou uso a tagata i mea ua e maua, ua e talitonu, o mea na faasoa mai e le Alii le Atua i lona alofa tunoa.

Afai ua tatou mautinoa i lo tatou faatuatua, o le tamaoaiga ma le ola ua tatou maua, o le potu ma le atamai ua fa’aaogaina ai lo tatou ola mai le Atua, e faapena foi ona tatou fiafia e faasoa atu i ia mea i o tatou uso a tagata ma le galuega a le Atua. Aua ua i totonu o tatou loto, o mea lelei uma ma le tamaoaiga i le tino mafaufau ma le agaga, o le faasoa mai lea o le alofa tunoa o le Atua. O Tavita o le tagata ua mafanafana le ola mafuta ma le Atua, o ana gaioga uma o lo o faailoa mai ai lona faalagolago i le Atua ma lona alofa tunoa.

O Iesu Keriso, lo tatou Alii Faaola, o le faataitaiga sili i lona alofa faasoa mai, ia faamagaloina a tatou agasala e ala i lona maliu tiga i luga o le satauro. O lona Toetu manumalo, ua faaolaina ai i tatou i le ola faavavau. Ia manuia le Aso Sa.

GALUEGA FAATINO:

Tau mai ni mea se lua e eseese ai le faasoa faaleaganuu ma le faasoa faa-Kerisiano.

PESE: Pese ma Viiga 73

A’OA’OGA:

1. Aua le faasoa faailoga tagata.
2. Ia tatou maua le alofa faasoa.

3. O le Alofa Tunoa o le Atua e faagatasi mo tagata uma.

.....

MANATU AOA O TESEMA:

**TALAI TAUSAGA E
FINAGALO MALIE MAI AI
LE ATUA:**

O le finagalo malie mai o le Atua, ua faailoa mai lea i lona afio mai i le lalolagi e ala i le Pepe o le Kirisimasi lo tatou Faaola o le Alii ia Keriso

ASO SA: 6 TESEMA 2020

**MATAUPU: E ALOFA LE ATUA I Ē
AMIOTONU**

SINI: Ia malamalama le vasega, o le Alofa Tunoa o le Atua, e fai lea mo i latou uma, o ē amiotonu.

TUSI FAITAU: Malaki 3: 13 - 18

FESOASOANI MO FAIAOGA:

O le tatou mataupu i lenei taeao o le Aso Sa, e alofa le Atua i e amiotonu, a o le tatou tusi faitau Malaki 3: 13 – 18. Na soifua mai le perofeta o Malaki ma valaauina i le galuega faaperofeta i le taimi na uma ai ona toe fausia le malumalu i Ierusalema e sui ai le malumalu na faatafunaina e Papelonia. Ina ua toe foi mai Iuta mai le tafeaga i Papelonia, ma toe atia’e Ierusalema ma taumafai e ola e pei ona latou ola muamua ai. Peitai, na latou le maua le ola manuia ma le solo

lelei i aso uma e pei o anamua. Ua faigata le olaga i aso faia soo. Ua feagai ma mugala, ua faatamaia mea toto ma lafu manu. Ua naumati ma oge le nuu. Ua siomia i latou e o latou fili, o Etoma ma nuu o Arapi. O nisi o i latou ua nofoia eleele o Isaraelu ma ua faiava ma nofo tane atu i ai tagata Iuta.

O le manuia na folafola mai latou te maua pe a foi mai le tafeaga, ua le vaaia, ae na o le ola tigaina. Ua latou vaavaai atu foi, i tagata Etoma ma Arapi ma Samaria, o lo o ola manuia, ma ola solo lelei i aso uma. Ua latou lafoa'i ai le Atua, a ua taumulimuli i amioga a tagata faapaupau o nuu ese. Ua latou le avatua a latou mea e sefulua'i i le Atua. Ua latou faoa mea tatau ona avatu i le Atua. Ua latou faitaulaga i mea leaga ma mea faatauvaa o fua o faatoaga ma lafu mamoe. O tagata lava ua sili musa i le amio leaga, o le au faitaulaga a le Atua, na Ia faapaiaina mo lana feau ma galuega o lona Alofa Tunoa.

O le vaega o le tusi faitau ua fai ma tatou mataupu i lenei Aso Sa, ua matua faailoa atu ai e le Perofeta o Malaki i tagata Isaraelu, ua oo atu a latou faaupuga ma lagona i le fofoga a le Atua. Ua latou fai ane, E le aogā ona auauna i le Atua, se a foi se mea ua maua ina ua tatou tausiusi i ana sauniga, ma tatou feoa'i ma ofu eleelea i luma o le Alii o au? O lenei ua tatou fa'aamuia i e faamaualuluga, ua atiina a'e foi e amio leaga, ua latou tofotofo lava le Atua, a e sao i latou ma manuia mea latou te faia. O manatu ia o tagata amioletonu o Isaraelu, o tagata ua leai se faalagolago, le faamoemoe ma le faatuatua i le Atua.

Peitai, e i ai lava tagata toaitiiti o e matata'u pea i le Atua, o i latou ua tausiusi pea ma tumau i le feagaiga na osia ma le Atua, e le'i avea mea tiga ma puapuaga o le ola, e faavaivaiina ai lo latou alolofa i le Atua ma faia lana amiotonu.

Ua liliu mai foi e le Alii ona fofoga, ma ua faafofoga mai ia i latou. Ona tusia lea o le tusi e faamanatu i ona luma, mo i latou nei, o e matata'u i le Alii, ma mafaufau i lona suafa.

E fai i latou ma A'u oloa tāua, ua fetalai mai ai le Alii o au i lea aso ua Ia tofia, ou te alofa foi ia te i latou, e pei ona alofa o le tagata i lona atalii ua auauna ia te ia.

O le a lava aso tou te toe iloa ai le eseese o le amiotonu ma le amio leaga, e ese le ua auauna i le Atua, ma le ua le auauna ia te Ia. O le aso lea o lo o tautala ai le Perofeta o Malaki, o le aso e taua o le Aso o le Alii. O le aso o le faamasinoga amiotonu a le Atua e na te tauia ai i lona alofa tunoa le au amiotonu, ae faaumatia ai le au amio leaga.

Ioe, o le tatou mataupu lena i lenei taeao, ina ia tatou iloa ona ola ile amio lelei ma fai le amio sa'o, e alofa mai ai le Atua ia i tatou ma tatou iloa ai o le Atua o le Amiotonu lava Ia. E pei ona fetalai Iesu, "Ia outou mua'i saili le malo o le Atua ma lana Amiotonu, ona faaopoopo atu lea ia te outou o manuia uma mai ia te Ia. O Iesu Keriso o le Amiotonu a le Atua, ua faaolaina i tatou ia te Ia i lona malo faavavau.

GALUEGA FAATINO:

Tau mai ni amio se lima, e iloa ai le amiotonu.

1. Alofa
2. Faamaoni
3. Toaga e galue
4. Tautala sa'o
5. Amio lelei

PESE: Pese ma Viiga 147

A'OA'OGA:

1. Ia alofa i le Atua ma lou tagata atoa.
2. Ia fiafia e fai le amiotonu.
3. Ia faaitaitai ia Iesu le amiotonu a le Atua.

.....

ASO SA: 13 TESEMA 2020

MATAUPU: O LE FAAILOGA UA FINAGALO MALIE MAI LE ATUA

SINI: Ia malamalama le vasega, o le faailoga ua finagalo malie mai le Atua i le lalolagi ina ua Afio mai e ala i le Pepe o le Kirisimasi.

TUSI FAITAU: Luka 2: 8 - 14

FESOASOANI MO FAIAOGA:

O le tatou mataupu i lenei Aso Sa ua faaulutalaina ‘*O LE FAAILOGA UA FINAGALO MALIE MAI LE ATUA*’

O lona uiga o le fanau mai o le Pepe o le Kirisimasi o Iesu Keriso le Alo o le Atua Soifua, o le Atua ua liutino tagata, ua Afio mai i le lalolagi, o le faailoga ua finagalo malie mai le Atua i ona tagata i le lalolagi, ia faaolaina ia te Ia le lalolagi uma.

I le Isaia 61: 1 – 4 o lo o faaupuina o le Pese a le Alii ua faauuina, o lo o valoia ai i se vaega o le fuaiupu e lua o lenei valoaga e faapea, “*Ua i o’u luga le Agaga o le Alii le Atua, aua ua faauuina a’u, e le Alii e tala’i le tausaga e talileleia mai ai le Alii.*”

O le tatou tusi faitau la o lenei taeao ua fai ma tatou mataupu, o le fanau mai o le Pepe o le Kirisimasi, o le faailoga lea ua tatou iloa ma le mautinoa, ua finagalo malie mai le Atua i ona tagata i le lalolagi. O le taunuuga foi lea o valoaga a le au Perofeta ma tulafono.

O lo o faailoa mai lava e le feau a le agelu i leoleo mamoe e faapea, Luka 2: 10 “*Aua tou te matata’u, aua faauta, ou te au mai ia te outou le Tala Lelei o le olioli tele e oo mai i le nuu*

uma, auā o le aso nei ua fanau ai ia te outou i le aai o Tavita le Faaola, o Ia o Keriso le Alii.”

Luka 2: 13 & 14. Ona faafuasei lea ona faatasi mai ma le agelu o au mai le lagi e toatele, ua vivii i le Atua, ua faapea ane, “*O le viiga i le Atua i mea aupitoaluga ma le manuia i le lalolagi i tagata ua alofagia e Ia.*”

O nei lava Afioa a le Atua, ua matua manino mai ai, lona finagalo malie i lona alofa mutimutivale, ina ia faaolaina le lalolagi o tagata ma ia latou tufi tufao ana faamanuiaga.

E lē o se amiotonu a tagata, po o se amio ua lelei i le silafaga a le Atua, po o le ola ua sa’oloto mai le agasala. Peitai, o le Alofa Tunoa o le Atua, e i ai pea i ana mea uma na fai, aemaise lana tagata na fai i lona faatusa, o le palealii o lana foafoaga aoao, ua mafua ai lona finagalo malie mai, ia faaolaina tagata uma ia te Ia. E pei ona molimau le Evagelia a Ioane 3: 16, “*Auā ua faapea lava ona alofa mai o le Atua i le lalolagi, ua ia aumai ai lona Atalii e toatasi, ina ia lē fano se tasi e faatuatua ia te Ia, a ia maua e ia le ola faavavau.*”

Ioe, o le feau lea mo tatou le fanau i lenei Kirisimasi, o Iesu Keriso o le Pepe o le Kirisimasi o le faatinoga lea ua finagalo malie mai le Atua ia i tatou tagata o le lalolagi, ina ia tatou maua ona manuia faavavau.

O lea na matua faailoa mai e lo tatou Alii Faaola o Iesu Keriso i le faaolataga o le lalolagi o tagata i luga o le satauro ma lona toetu mamalu.

GALUEGA FAATINO:

Faatino le Tala o le Kirisimasi.

PESE: “Silent Night”

A'OA'OGA:

1. O Iesu Keriso o le tino mai lea o le finagalo malie o le Atua.
2. Amio lelei o le meaalofa sili lea mo le Atua.
3. Ia alofa i so o se tagata.

*IA MANUIA LE KIRISIMASI
MA LE
TAUSAGA FOU*